

中華文史叢書之九十五  
清·道光刊本影印  
王有立主編

# 籌海初集(一)

關天培撰

華文書局股份有限公司印行



中華文史叢書之九十五  
清·道光刊本影印  
王有立主編

# 籌海初集

(二)

關天培撰

華文書局股份有限公司印行



道光丙申孟冬

籌海初集

本衙藏板



籌海初集序

籌海集者記公事也何為而  
記也重籌海也培幼攻儒術  
長習韜鈴執戟淮陰分符揚  
郡調金陵而卓薦改外海而  
越升革吳淞口之陋規清川

沙營之虧項道光乙酉秋漕  
河淺阻議以蘇松常鎮太四  
府一州漕白糧米創由海運  
其時制軍琦靜齋通侯中丞  
陶雲汀夫子軍門王竹亭夫  
子議派督運大員頗難其選

培不避毛遂之嫌力請身任  
丙戌仲春兌運開行斯役也  
以一百二十四萬餘石

天庾

正供作為頭運分載民船一  
千二百五十四號行五千數  
百里汪洋大海數遇驚風駭

浪漂入高麗夷境者三百餘  
船卒皆化險為平迨挽入津  
門不但斛收無缺且有盈餘  
總計各船舵水三萬餘人一  
丁未損良由

聖天子德隆福厚



海神效靈豈人力所能致哉  
是夏即以培升署太湖副將  
復奉

恩綸從優議敘道光七年仰蒙

特旨補授蘇松總兵壬辰春署江

南提督是秋屆當述職

奏蒙

俞允冬月下澣趨叩

闕廷五蒙

召對

天語褒勞交軍機記名十四年九

月仰沐

聖恩補授廣東水師提督奉

命馳驛速赴新任於冬月六日會

城受事培何人斯肩此鉅任  
受

恩愈重報稱愈難况粵東為邊海

要疆我

朝

列聖視天下為一家雖外夷亦同

赤子且以四夷仰食於

天朝者不下萬萬而中華之茶葉

大黃尤為夷人保命之原是

以一視同仁准於粵洋貿易

設海關監督理其稅務而撫  
育之此誠

覆載

之鴻恩也惟是事久弊生趨  
利若鶩之奸夷漸形鴛鴦而  
勾引煽惑之匪徒又從而唆  
誘之十四年夷目喑嘍啤之

事不已概可見乎是備禦之  
籌誠不可刻緩而馭夷之要  
更不可不曉然使吾人之有  
以盡知之也歷稽往籍自古  
聖王之於四夷其犯順也則  
嚴禦之去不窮追其納款也

撫之以恩去則不問蓋蠻夷  
之性譬之禽獸適其欲則搖  
尾乞憐違其願即狂顧反噬  
其同類也勢均則相爭不知  
禮義力絀則相屈不羞服屬  
惟當順其所利而因以制之

非禮樂法度所可馴服而繩約者所謂治之以不治耳故禦之之道守備為本以逸待勞以靜制動嚴防出入禁絕內奸震之以威則懼而逸示之以怯則驕而聚若撫之有



聖心

道處之有法上可體

之無外下可使鴛獷以咸賓  
然必寓經營於鎮靜之中慮  
禍患於未萌之日此備禦之  
所以不可刻緩者也培蒞任  
以來如臨如履凡思慮所能

及力量所能到事之所能力  
肩者莫不次第舉行期於有  
備惟近性健忘是將一切稿  
件錄而存之愈積愈多久而  
成帙爰即飭承摘分四卷名  
之曰籌海初集首錄

上諭次記題名碑文以及籌議海

防整飭營伍訓練弁兵並摘  
抄奏稿書稿設立義學諭告  
衆兵各示稿均次第列入敢  
效賈誼之治安竊仿子文之  
必告以冀水師寅僚咸知禦

夷要旨一覽而瞭然於胸臆  
間也雖絳灌無文知不免方  
家之笑而海疆有備庶稍伸  
報  
忱云爾淮陰關天培自敘



籌海初集目錄

卷之一

虎門海口十處炮臺全圖

沙角號令炮臺圖

大角號令炮臺圖

南山炮臺添建威遠月臺圖

鎮遠炮臺圖

橫檔炮臺月臺圖

橫檔山後添建永安炮臺圖

蘆灣山脚添建鞏固炮臺圖

大虎炮臺圖

蕉門海口炮臺圖

新涌海口炮臺圖

恭錄

上諭四道

歷任水師提督題名碑記

補授提督謝

恩奏稿

入境告示

奏報到任摺稿

奉到

硃批復奏片稿

查勘虎門扼要籌議增改章程稿

重勘虎門炮臺籌議節畧稿

護順德都司張玉堂不知檢束咨請撤任降補

稿

奏復查明澳門夷人炮臺原委請免驅拆摺

總督  
主稿

札飭勤加訓練稿

逐月捐廉發給中軍修理各炮臺軍械稿

虎門海口添製排鍊無礙商船稿

分撥探防籌添臺兵口糧各件催督院速覆稿

咨復督院必須添製兩層排鍊以資阻截稿

配造火藥復稿

核計炮臺兵數籌議歲需口糧稿

虎門緊要臺兵口糧遵示減定再行面覆稿

設立義學曉諭衆兵子弟肄業告示



通行訓練章程挑選精壯士卒稿

請留千總周國英仍署右營守備稿

札飭各營查明儲備歲需火藥造冊呈覆稿

庫存炮子銹蝕當出陳易新並趕造火藥稿

分兵訓練指地專防稿

查驗庫存銹蝕炮子札營出陳易新稿

蕉門海口炮小兵單札飭右營遊擊議覆稿


通行各營趕購硝磺配造火藥以資儲備稿



虎門糖廿十壹日香


十臺全圖








虎門糖口十壹號








魯淮三夜身


大角號令炮臺

卷一


大開海禁君王德

四





南山威遠明臺





善治衣集


卷一

鎮靖狂瀾澄碧海

二

鎮遠堦


武山



等  
舟  
行

家  
一  
遠  
揚  
大  
武  
攝  
紅  
彝

一



橫檔大月臺





等手刀長

長一橋回萬項洪濟

山前橋橫




卷之二  
永安炮臺

永安鎮虎山北門鎖鑰



長城

卷一 安耕龍穴南四長城



會  
翠  
固  
炮  
臺  
一  
羣  
我  
強  
國  
資  
保  
障


山  
汝  
南




管子地員篇

夫一國之政，必先於地。地者，國之基也。故管子曰：『地者，國之基也。』

一



大虎山





善濟不集  
蕉門炮臺

卷一

蕉門黃角東西海

十一






香海刀美

一門頭香山早晚潮

上二




新涌炮臺

卷一

新安山海關處

二二



等年刀長

卷

一浦口魚蓋轉運途

三





恭錄

上諭四道

道光十四年九月初三日奉

上諭本日據盧坤等由驛馳奏嘆咭喇國兵船闖入內河調兵驅逐一摺此次嘆咭喇國喇啣啣來粵貿易不遵法度該夷兵船二隻番梢三百餘人寄泊外洋經該督於六月間卽咨會水師提督李增階派委叅將高宜勇前往海口防範並檄行提標將弁督飭炮臺嚴密看守迨該督等照例封船以後又復咨會防堵勿任夷船進

口乃竟疎於防禦致該夷兵船於八月初五日乘潮水漲發闌進海口各炮臺水兵開炮轟擊該夷船放炮回拒隨拒隨行駛至離省七十里之黃埔河面停泊現經該督等調派水師嚴行驅逐廣東水師提標中軍叅將高宜勇於六月間卽經派往海口堵禦輒任該夷兵船駛至內河已屬疎玩復據稱夷船乘潮駛風阻當不及更難保非有心掩飾高宜勇著先行革職枷號海口示衆仍著該督查明如有玩縱掩飾情弊卽行從嚴叅辦再降諭旨所有炮臺怠玩各弁旣經派人接替俱著先

行枷號各炮臺示儆仍查明疎縱情形一併嚴叅水師提督李增階海防是其專責乃該夷船闌駛入口徑行越過炮臺守臺各弁兵於兩隻夷船不能擊退殊堪痛恨看來各炮臺俱係虛設武備廢弛一至於是提督平日所司何事李增階旣因病請假亦斷不堪起用著先行革職事定後再降諭旨兩廣總督盧坤旣稱於六月間分飭防堵並非措手不及事出意外者可比自應遴派得力將弁嚴行堵禦何致任令該夷船駛入內河不能防阻是該督無謀無勇咎無可辭有損國威深負委

任盧坤著革去太子少保銜拔去雙眼花翎先行革職  
暫畱兩廣總督之任帶罪督辦如果辦理迅速諸臻妥  
協尙可稍從末減倘因循貽悞致貽後患定當以軍法  
從事斷不寬貸凜之慎之

道光十四年九月初三日內閣奉

上諭廣東水師提督著關天培補授欽此

道光十四年九月初四日內閣奉

上諭關天培昨經簡放廣東水師提督著卽馳驛速赴新  
任毋庸來京請訓所有江南蘇松鎮總兵著陶澍卽棟



員署理欽此

道光十四年九月十一日奉

上諭本日據哈豐阿等由驛馳奏嘆咭喇兵船均已押逐出口一摺覽奏均悉已明降諭旨分別加恩並賞還盧坤太子少保銜雙眼花翎矣此次嘆咭喇夷目嘍嘍啤來粵貿易不遵法度並將兵船二隻闖入內河經官兵開炮攔截膽敢放炮回拒節經盧坤將該夷船進出之路全行堵塞該夷目瞭見柴草船隻惟恐火攻寔形惶恐現據該國散商咖啡啞等投稱嘍嘍啤自認不諳例

禁是以未領牌照兵船實因護貨悞入虎門自知錯誤  
乞求恩准下澳兵船即日退出求准出口該督派文武  
委員於八月十九日將嘍嘍押逐出口該夷兵船業  
於二十二日押出虎門海口並將所調官兵撤回歸伍  
辦理尙爲妥善該督等務飭所派將弁加意防範不得  
因該夷船業經出口稍存怠玩又另片奏該省水師營  
伍人材甚少俟新任提督到粵後從長商辦又各處炮  
臺有無應行更定事宜俟親往查勘酌量辦理至該國  
公司旣散仍應另派大班管理方可相安等語喚咭喇

夷人與內地通市向來不通文移然必須有統攝之人專理其事著該督卽飭洋商等令該散商等寄信回國另派大班前來管理貿易事宜以符舊制至沿海各處炮臺尤當力加整頓不可有名無實著該督於校閱營伍時親往虎門一帶逐細查勘如有應行更定事宜務當悉心妥議總期有備無患實在得力方足以壯聲威而資防禦其營務海防一切章程著俟新任提督關天培到粵後該督等會同籌商設法整飭力除從前怠玩積習俾該將弁等有勇知方悉成勁旅至關口進出稽

查全在粵海關監督廉以飭躬嚴以馭下方能懾服諸  
番著該督等會同新任監督彭年將廢弛積弊痛加整  
頓其如何釐剔弊端之處著卽商酌詳議釐定章程據  
實具奏欽此

廣東歷任水師提督題名碑記

天生五材去兵未聞於自古

國張九伐治隆莫尙於當今顧秋獮春蒐本寓習戎之  
術而揆文奮武原無偏廢之時司馬法曰天下安忘  
戰危故建帥設營雖自古帝王未有能去兵者况粵  
東海道東聯閩浙西達雷瓊番舶夷船遠來絕徼漁  
舟商艇絡繹重洋龍穴之外則汪洋浩渺虎門以內  
又港汊分歧審扼要情形虎門海口誠中路咽喉也  
至於藩籬穗郡控馭羣夷提督責成實水師鉅任也

歷稽往籍虎門自康熙年間創設副將繼因任重事繁改設左翼鎮總兵迨嘉慶年間海氛不靖經兩廣制軍百公齡籌議改設水師提督於嘉慶十五年奏蒙

俞允以廣東陸路提督童公鎮陞調授繼則孫公全謀李公光顯沈公烜陳公夢熊李公增階接踵陞授其間暫權斯篆者則有南澳鎮羅公鳳山陽江鎮吳公紹麟碣石鎮譚公安後先視事道光十四年七月有暎咭喇夷目擘嘮啤者護貨來廣私進洋行爲奸夷所

誘欲違禁入城與督撫抗禮經盧制軍坤稍示兵威而犬羊膽裂醜類潛逃斯時也李公增階臥病在牀偶以疎防致干例議幸

天恩高厚念其事先病臥僅予奪職而李公旋亦謝世矣是年九月余在江南蘇松總兵任內仰蒙

特旨簡授廣東提督復奉

恩命馳驛赴任迨冬月六日會城受事其時盧制軍已將咻嘍啤泥首畏罪悔懼乞恩並委官將其押禁澳門各情形具奏

聖德汪洋念彼化外冥頑免罪釋逐該夷目幸逃顯戮旋  
伏冥誅其妻負屍回國議者頗慮狐羣免黨罔識高  
深余下車伊始親歷重洋遍觀扼塞籌增大炮議建  
新臺改大角沙角爲號令炮臺築鞏固永安堵潛逃  
捷徑會商兩院意見僉同聯銜具奏悉奉

允行惟是慮不先定不可以應卒兵不閒習不可以當敵  
爰卽通行訓練章程挑選精壯士卒設誌椿測潮水  
之長落添木墊定炮口之高低精製火器修整戈矛  
凡百所需悉加籌備猶慮積習難移先定專條遍示



分兵教練指地專防不遺一士之技能不乖衆人之  
性習非敢謂撫以惠感而不驕臨以威肅而不怨孔  
子曰臨事而懼好謀而成孫子曰不患其來患我無  
備至哉斯言誠督兵之要旨籌海之津梁也余雖不  
敏無日忘之第識淺才疎深漸固陋兢兢十月麤定  
規模仗寅友之勳勩賴屬僚之忠告重申紀律整肅  
軍容練虎門之勇士操龍穴之師船水馬飛騰火龍  
閃掣震雷霆於八方臺上揚威武於九洲洋中梟獍  
聞風膽落犬羊目擊心寒賞不逾時鼓動三軍銳氣

言字不集 卷一  
罰以懲懦追回七校頽風乃知難御莫如兵而易感  
亦莫如兵也於是止鼓鳴金聚軍蠶下訓於衆曰武  
侯有言國之大務莫先於戒備吾儕身列戎行同舟  
共濟感蒙

皇上  
豢養深恩當矢忠心報效勤練技能勇敢任事守廉  
知恥畏法懷恩信乃立身大本和爲處世良箴志欲  
圓而行欲方膽宜壯而心宜細居常奉公守法臨陣  
奮勇當先鼓進金退毋違號令耳聽目視毋許誼譁  
毋躁進毋畏縮毋恃血氣毋憚煩勞毋犯邪淫毋貪

利慾毋酬酒滋事毋欺虐良民有犯必誅雖功不宥  
爾衆士悉聽余言從此互相策勵果能立志建功雖  
今日之弁兵卽他年之將帥勉之曷哉勿辜余望竊  
念籌海防夷調度當知緩急選兵練士王法本乎人  
情喜逸惡勞慨常人之通病勸勤懲惰乃將帥之權  
衡援筆籌思咨商定議如防夷調派摘要三十三條  
春秋訓練籌備一十五款添儲備以數軍實撥款項  
而卹兵艱備火船於臨事練水卒於平時炮子鑄連  
環截鯨奔之要路箭箱貯羣虎斷鸞逸之餘魂臺設

渡船便吾兵之樵採歲增藥袋免微弁之捐攤旂壯  
觀瞻椿量深淺臺防險隘船逐狂瀾斷外洋之接濟  
絕內地之勾聯凡議定之章程悉載登於檔案所冀  
同寅砥礪勗我未能追思前輩儀型勒名不朽計石  
旂建帥以來於今二十五載體

聖主懷柔之德共享億萬斯年豈不麻哉是爲記

道光十五年歲次乙未仲冬望日廣東全省提督軍  
門節制各鎮提調水師官兵加三級淮陰關天培讓

補授提督謝

恩奏稿

新授廣東水師提督臣關天培跪

奏爲恭謝

天恩仰祈

聖鑒事竊臣於道光十四年九月十九日接准兩江總督

臣陶澍咨開准兵部火票遞到軍機大臣字寄道光十四年九月初四日內閣奉

上諭關天培昨經簡放廣東水師提督著卽馳驛速赴新

任無庸來京請訓所有江南蘇松鎮總兵著陶澍卽棟  
員署理欽此

臣聞

命之下感激涕零悚惶無地伏念

臣

江左庸材毫無知識

仰蒙

皇上知遇之恩由太湖協副將

簡授水師總兵去歲屆滿六年奏蒙

天恩俯准入

陛疊蒙

召見五次面聆

聖訓鉅細周詳回任以來兢兢奉職愧無報稱茲復渥荷  
恩綸畀以提督重任臣自顧何人膺此

高厚受

恩愈重圖報愈難伏思廣東水師外接夷洋內聯江面實  
屬地廣務繁以臣駑鈍之資深慮弗克勝任循衷揣  
分凜慄彌增惟有勉竭血誠矢諸寤寐凡分應當爲  
之事隨在悉心經理以期仰答

鴻慈於萬一臣現俟委員到日交卸總兵印務遵

旨馳驛前赴新任再將交接各日期另疏

題報外所有臣感激悚懼下忱理合繕摺叩謝

天恩伏乞

皇上聖鑒謹

奏

道光十四年九月二十日

道光十五年正月二十九日奉到

硃批知道了



入境告示

新授廣東水師提督軍門關 爲諄切預示事照得  
本軍門欽承

恩命補授粵東奉

旨馳驛速赴新任遵卽交卸馳行於十月二十九日已至  
南雄尅期到省卽在省城接印視事凡我水師同寅  
晤談伊邇何須贅筆惟是本軍門久歷戎行性甘儉  
樸水師之積習異地或有不同而大概之因循普海  
諒均一轍茲當入境之初預告屬僚振精神共相策

勵滌舊染匡我未能本軍門持躬勤儉一切推誠恐  
不我知開誠預告望我屬僚毋違我示如仍拘於積  
習藉事朋讎不諒予心卽是抗違我示果爾則莫謂  
言之不預也特示

計開

一頭接僅准巡捕官一員戈什哈目兵各二名此  
外不准多派

一二接僅准十餘人均在省城伺候不准遠迎

一本軍門在省接印止令中軍護印前來其餘官

弁概不准擅離職守

一存營官弁在汛者於汛界接見存城者署中接見一概不准遠迎

一省中本有公館止令打掃不准懸掛燈彩

一巡洋官弁各有專司不准藉詞迎謁私離洋境

一衙署不准粉飾修理鋪墊桌椅不准添備本軍門家丁僅止三人行李衣箱亦止十件住房止用三間亦不准裱糊修飾

一提轄水師各營不許差官遠接至應呈官兵船

械營制輿圖洋圖等件許派外委一員賚呈其  
冊面圖面概不許費用綾錦裝訂

一所屬將備概免披執

一經過所轄營分概免出隊

以上十條仰中軍照錄星速通致各營一體遵  
照毋得違誤本軍門一秉至誠毫無虛偽各宜  
自愛幸勿試嗜並示

道光十四年十月二十九日

奏報到任摺稿

新授廣東水師提督臣關天培跪

奏爲恭報微臣到任日期叩謝

天恩仰祈

聖鑒事竊臣於九月十九日准兩江總督臣陶澍咨開准

兵部火票遞到道光十四年九月初四日內閣奉

上諭關天培昨經簡放廣東水師提督著卽馳驛速赴新任毋庸來京請訓所有江南蘇松鎮總兵著陶澍卽揀員署理欽此臣當卽恭摺叩謝

天恩於九月二十八日署總兵沙序元到崇明洋次臣卽

將總兵關防移交卽日起程遵

旨馳行兼程赴任茲於十一月初五日馳抵廣東省城初六日准署提督譚安將

欽頒嘉字六十五號提督廣東水師總兵官銀印一顆委員賚送到省臣卽恭設香案望

闕叩頭謝

恩祇領任事伏念臣一介庸愚由太湖副將渥荷

恩綸擢授蘇松水師總兵兢兢供職寸效毫無遽蒙

皇上簡畀提督重任

鴻施高厚實夢想所弗期駑鈍滋慙豈捐糜之能報查廣東水師海洋遼濶爲各外夷貿易聚集之所武備最關緊要臣惟有倍竭駑駘督率所屬激發天良認真訓練務使兵力日漸精強威能懾衆以冀稍報

鴻慈於萬一至於臣初到廣東一切情形尙未深悉適督

臣盧坤先期出省閱兵尙未會面臣接印後卽親歷

所屬洋面細心查察如有應添應改各事再與督臣

妥商次第辦理所有臣感激下忱並到任日期除恭

疏

題報外理合繕摺恭謝

天恩伏乞

皇上聖鑒謹

奏

道光十四年十一月初六日

道光十五年二月十七日奉到

硃批廣東風氣浮而不實加以歷任廢弛水師尤甚朕看汝頗知向上尙有幹濟之才是以特加擢用務要激發



天良公勤奮勉實力操防秉公去取一洗從前惡習海疆務期靜謐勉益加勉毋忽

奉到

硃批復奏摺片

臣關天培跪

奏再臣恭報到任日期一摺於道光十五年二月十七

日奉到

硃批廣東風氣浮而不實加以歷任廢弛水師尤甚朕看汝頗知向上尙有幹濟之才是以特加擢用務要激發

天良公勤奮勉實力操防秉公去取一洗從前惡習海疆務期靜謐勉益加勉毋忽欽此仰見

聖主慎重海疆

訓誨策勵跪聆之下欽感既深悚惶彌切查廣東水師

情形

臣

到任之時正值督

臣

盧坤校閱之後嗣於省

城接晤

臣

備細告知共籌整飭總須將領得人督率

千把總實心教練專以責成獎勤懲惰以期力挽虛浮積習有不率教者卽行叅劾不敢姑容將領之趨向正則營伍之習氣自正

臣

以庸鈍下質渥荷

殊恩自問具有天良能不感激思奮惟有恪遵

聖訓正已率屬勤勉奉公務使訓練巡防事事咸歸實在

海疆永臻安謐仰副

高厚成全於萬一所有感悚微忱謹附片具

奏伏乞

皇上聖鑒謹

奏

道光十五年二月二十九日

道光十五年五月二十三日奉到

硃批知道了

查勘虎門扼要籌議增改章程咨稿

爲查勘中路外海內洋各扼要分別哨探防禦謬擬  
辦理章程咨請衡奪事接管卷查道光十四年十月  
初六日准貴部堂咨會道光十四年九月十一日奉  
上諭另片奏該省水師營伍人材甚少俟新任提督到粵  
後從長商辦又各炮臺有無應行更定事宜俟親往查  
勘酌量辦理等語至沿海各處炮臺尤當力加整頓不  
可有名無實著該督於較閱營伍時親往虎門一帶逐  
細查勘如有應行更定事宜務當悉心妥議總期有備

無患實在得力方足以壯聲威而資防禦其營務海防一切章程著俟新任提督關天培到粵後該督等會同籌商設法整飭力除從前怠玩積習俾該將弁有勇知方悉成勁旅著卽商酌詳議釐定章程據實具奏將此諭知欽此等因竊本提督奉

命由驛於十一月初五日馳抵省城初六日在省接印適貴部堂巡閱公出拜摺後卽至虎門檢閱洋圖稽查文卷選帶將備二員隨同赴洋自沙角炮臺放洋由龍穴金星門過九洲至澳門查勘香山十字門雞頸

山萬山一路形勢復轉帆東向由九洲洋外過伶仃石笋勘屯門大嶼山東涌急水門等處收回收大角炮臺查虎門設立重兵內護省城外捕奸匪緝盜防夷與香山爲犄角而香山逼近澳門巡防更關緊要昨本提督接見該協副將秦裕昌應答一切頗合機宜似一可靠之員至老萬山在內伶仃之南離虎門約三百里萬山之外一派汪洋渺無畔岸該處兩山對峙爲商夷船隻出入標準雖設有東西炮臺奈一片深洋處處可行守臺官兵僅供瞭望而已應請於大

鵬香山巡洋船內酌撥二船駐守兩山遇有夷船收  
針到山大鵬一船則專報中營巡員傳知沙角守臺  
汛弁知會前途撥兵飛報提督香山一船則專報澳  
門巡員轉報香山副將探報既勤有事則諸般有備  
無事亦藉以稽察巡員其兩營船隻弁兵仍按月輪  
換以均勞逸而專責成並請飭行澳門同知轉飭各  
引水凡遇夷船到山查明後卽知會萬山師船畫一  
稟報至於虎門之外萬山以裏島嶼叢雜最易藏奸  
巡海師船各營本有段落應請仍循其舊以免更張



本提督連日接見各營將備詢悉昨者暎夷兵船不遵法度闖入黃埔迨官兵四集該夷目方惶恐認罪眾夷商代爲乞恩

貴部堂念其無知恩寬一線派委妥員分道押逐出口該夷目夷兵自此次懲誡之後自應知畏知恩但聞該夷目未獲生還而犬羊之性旣詐且疑則備禦之籌自當先其所急查各夷商船來粵貿易至萬山收針向由澳門同知派引水迎往萬山查明繕文通報由引水執持印憑報明沙角防弁知會前途然後

放入黃埔此歷久之章程也查虎門控制以沙角大角兩炮臺爲第一重門戶南山鎮遠橫檔三處炮臺爲第二重門戶大虎炮臺爲第三重門戶議者咸以爲多備炮火選派得力官兵層層防守何患不能阻截茲本提督率同署叅將余清署守備陳魁倫親勘得大角沙角兩炮臺係東西斜峙丈量口門共寬一千一百一十三丈潮水退定中泓量深四丈二尺兩傍水深自三丈餘至二丈三尺止全係泥底試演三千斤大炮炮子僅及中流強弩之末無濟於事是第

一重門戶炮火已不得力復移舟至南山橫檔大虎  
一帶查南山鎮遠兩處炮臺建在武山脚下南北相  
聯中離一百三十三丈南山炮臺係康熙五十六年  
建形勢稍小僅安炮十二位應改建寬大如橫檔月  
臺之式該處臺面斜對下橫檔山中隔水面三百餘  
丈下橫檔之東北隔水一百二十餘丈有礁石一處  
俗名飯籬排再北隔水九十二丈卽是上橫檔月臺  
橫檔炮臺斜對鎮遠炮臺中隔海面量寬二百七十  
二丈潮水至此爲之一束以致中泓刷深至十二丈

兩旁淺處均在三丈以外潮汐長落溜甚湍急演試  
南山炮位炮子能至下橫檔山根鎮遠炮子直過飯  
籬排石面大橫檔炮子能及對岸山根是第二重門  
戶形勢既屬聯接炮火極其得力而猶失於疎防者  
蓋有故焉查外夷兵船闖駛入內亦甚畏此炮火是  
以必候南風長潮乘流水漲發之際風水皆順飛駛  
而過夷船本極堅厚船之兩旁又支掛檣被各臺炮  
位縱能接聯施放平時並未演準何能炮炮中船且  
一炮之後趕裝二炮船已闖過是外勢雖屬雄壯而

終難阻截議於南山鎮遠適中山根安釘大椿再將斜對之飯籬排正中石峯修鑿成椿添製粗大鐵鍊三百二十丈勻作八條成造兩端做就接扣以便聯合另用四五丈長大木紮成圓扁木排十八吊於鐵鍊接扣處及各條適中處逐段細實以資擎托而免下墜再於木排左右結就纜扣收紮兩邊錨本鐵鍊兩端預細於椿從中分而爲二如開闔門戶之式泊於兩岸選派弁兵預演啟閉演熟後卽令該弁經管一年毋須更換以資熟手再南山炮臺議請改建毋

庸修理其鎮遠橫檔兩臺必須將炮洞石牆及鋪地  
石塊全行更換用三合土改築緣炮子打上石牆係  
以堅擊堅則石碎四飛必致傷人一兵受傷衆兵氣  
沮若改用三合土築成炮洞須用內外八字式庶柔  
能尅剛堪期有濟至炮下墊石本係粗石高低不平  
一炮放出炮與座均退後四五尺不等以三五千斤  
大炮欲推歸原位石既不平粗尤滯濇非十二三人  
不能運動逐炮如此難期迅速必須以土易石而土  
面又加細沙俾挪移滑溜四人即可攙回此必不可

緩之事也再於鎮遠橫檔之北相離不遠照前再加鐵鍊木排一道如式啟閉則重關阻截添備兵船火船於上流一入殼中欲進則爲排鍊所阻欲退則風水不容而三臺大砲連環轟擊上流火船趁風下壓兵船繼之雖鐵骨銅身恐不免於灰燼縱使闖斷一層已傷其半第二層排鍊又豈能飛越果能設此重關啟閉由我演練隨時無事則排列於山邊有用則橫檔於海面使之見而知懼則威可振而患可消又何疎防之慮此議於橫檔鎮遠添設之大略也再自

橫檔炮臺向北水程約計五里卽是大虎炮臺對出  
水面甚濶當從炮臺脚下丈量水面至九十八丈之  
外卽係暗沙沙面水深五六尺不等其九十八丈  
之內深處自七丈五六尺至一丈五尺止全是泥底  
是第三重門戶炮火亦甚得力惟慮大汐長潮沙面  
水高防其遠避炮火議於暗沙面上拋石下椿使之  
不能繞越尤爲得勢商之將備據稱南山鎮遠大虎  
一路向係夷船出入所必由若能如此備禦可期有  
濟等語本提督復勘得大角之內由上下橫檔大虎



各山之後仍有海面測量水勢寬而且深雖云夷船  
向不由此行走焉可無備查下橫檔西面山根向南  
有暗沙一道斜對湖洲山嘴自湖洲山脚量至對面  
暗沙共濶一百六十丈水深自一丈四尺起至五丈  
止暗沙之上水深八九尺不等暗沙之外全係泥底  
議於此處安釘品字操手樁三道以作南段扼要又  
查上橫檔西面山根與南沙山之蘆灣嘴相對中隔  
海面量寬五百一十六丈自蘆灣山根向東測水自  
八九尺起漸深至五丈止全係坭底又自橫檔山脚

向西測水自二丈起漸深至五丈止計寬八十餘丈半係石底半係沙底此處不能着力查橫檔山後本有小炮臺一座因建置過高久廢不用應請照奈將官前稟移建山下稍加寬大再於蘆灣山脚就山取石另建炮臺一座與橫檔山後改建炮臺參差對峙以作北段扼要另於新建兩炮臺南首淺處拋石成堆深處安釘梅花大椿佈成坎卦之式既無阻於行船亦斷不能揚帆直過不獨夷船至此轉舵欠靈卽快蟹私船亦難迅駛中段有此曲折則兩臺炮火得

以施爲矣此謬議沙角以內東西兩路之大略也至於炮口高低全憑誌椿爲準今視各臺未立志椿則水之消長幾何已無証據再南沙山背後全係海面直達蕉門率同將備親詣該處炮臺登高察看亦係緊要之區蕉門南向炮臺正面朝東對面卽南沙山之尾相聯小山土名金洲山水面量寬二百八十丈由炮臺脚下一路淺灘測水自二三尺起至八尺止計寬一百丈零中泓水深一丈三尺計寬一百二十丈過此漸量漸淺又係坭灘計六十丈至金洲山脚

止議於此處下椿五道使船隻過此曲折而行炮火  
方能有濟此阻遏蕉門之大畧也此外仍有新漏口  
一處外臨大海內通虎門爲商漁出入之捷徑率同  
奈叅將親往查看該處炮臺一座係嘉慶十五年造  
臺面西南向炮洞兩層量寬水面一百一十二丈退  
潮測水深止一丈亦不甚寬炮臺南首河之正中有  
小山俗名豬頭山山之前後因流水迴環積成洲渚  
洲西水深一丈以外洲東水深止六七尺洲之上下  
又均合爲一水詢之弁兵據稱潮滿時大號米艇能

於出入等語查此處逼近虎門便民海道固不可塞亦應預防以上各路形勢現已目擊身經籌議各條亦逐件商之將備意見大概相同其一切瑣屑事宜亦俱妥籌文內不能細載惟謬議添改各件需用不  
少

國家經費有常尙希碩畫再各炮臺炮位仍須添製八千斤者二十位六千斤者二十位勻配各臺庶足以壯聲威而資猛烈惟是本提督甫蒞虎門情形尙未明悉諸事均祈

貴部堂衡奪辦理俾有濟於公則叨益無既合就咨  
會爲此合咨云云

一咨

督

撫二院

將軍

道光十四年十一月二十八日

重勘虎門炮臺籌議節畧稿

一沙角炮臺一座建在海口之東沙角山側係嘉慶六年造臺面朝西向屬卯酉週四十二丈臺上炮洞十一個配大小生鐵炮十一位臺門配炮一位另貯五百斤生鐵炮一位防弁一員防兵三十名臺上神堂官廳四間官房三間兵房十七間臺面堞口炮洞均粗石砌就

一大角炮臺一座建在海口之西南沙山東嘴係道光十二年造臺面對東向屬辛乙週九十三丈臺

上炮洞十六個配大小生鐵炮十六位臺門配炮一位防弁一員防兵五十名臺上神堂三間官房三間兵房十七間軍火局二間臺面塚口炮洞均粗石砌就

勘得沙角大角兩炮臺東西斜峙量寬口門一千一百一十三丈中泓水深四丈二尺東岸至淺處水深二丈三尺西岸至淺處水深三丈南通大海北達黃埔係往來洋船必經之路爲進省第一層門戶地居衝要形勢得宜所惜口門太寬兩臺大



炮正子僅及中泓以致不能得力但扼要之區聲勢不宜削弱應請將沙角炮臺防弁改派把總一員俾呼應較靈兵丁炮火仍循其舊改作號令炮臺此後遇引水引帶番舶到口防弁驗明印憑卽放大炮一聲知會前途一面開單報明提督如無引帶文憑卽係奸夷則於臺面高處插立大纛一杆知會大角弁兵立卽開炮轟擊固不能截其不前亦可挫其銳氣前路各臺聞炮聲聯接一體預備仍耑派一兵飛報虎門接應至大角炮臺與沙

角互爲聲援止須撤去防兵二十名仍畱外委一員防兵三十名炮火一切仍舊以資接應

一南山炮臺建在武山脚下在沙角之北相離十餘里係康熙五十六年造臺對西南向屬艮坤週五十二丈五尺臺上炮洞十二個安大小生鐵炮十二位另貯五百斤生鐵炮六門又貯熟鐵小炮二門防弁一員防兵三十名臺上神堂二間官兵住房共十二間藥局一間炮洞石砌臺面堞口均係磚砌

勘得南山炮臺歷年久遠形勢稍小離海面中泓止一百五十餘丈炮火最爲得力臺前臨水正面現有空地直出量寬一十二丈空地之外水面仍現小礁石數處議於此處量出六丈添建月臺一座面寬六十丈如橫檔月臺之式月臺之前仍畱空地六丈俾臺根堅固下用丁字長石堆砌臺面加築三合土二尺再築三合土炮洞四十個厚五尺五寸內外均築八字式添配八千六千斤大炮十位五千四千斤炮十位餘配二三千斤炮八位

湊足炮四十位則聲威益壯炮火更加猛烈矣

一鎮遠炮臺建在南山炮臺之北中隔陸地一百二十丈均在武山脚下係嘉慶十二年造週一百二十丈臺對西南向屬丑未臺上炮洞四十個安置大小生鐵炮四十位另貯八百斤生鐵炮三位防臺千總一員防兵六十名臺上神堂三間官房三間兵房二十間軍火局房二間炮洞壕口地面均係粗石砌就應用三合土改築換下石塊另候撥用

一橫檔月臺建在上橫檔山脚與鎮遠炮臺東西斜對係嘉慶二十年建週九十一丈正面朝北向屬丁癸炮洞四十個安設大小生鐵炮四十位防臺千總一員防兵六十名臺上神堂一間官房三間兵房十間炮洞堞口地面均係粗石砌就應用三合土改築換下石塊另候撥用

勘得鎮遠橫檔東西斜峙與南山品立三臺聲勢既獲相聯炮火又能湊接該處爲商夷出入所必經要隘巖關於茲爲最第內海水性逢寬大之區

則浪高而水淺遇束窄之處則湍急而泓深是以沙角之外山雖多而海濶測水止二丈四五尺不等一至沙角爲兩山收束中泓之水則在四丈以外從此測量漸北漸深至南山橫檔間水面更窄以致中泓刷深至十二丈之外一過鎮遠海面稍寬水則稍淺量至大虎正泓深處水止七丈以外大虎之北又止六丈內外非海底本有淺深實水面寬窄所致也至於沙角口門因寬不能得力惟南山鎮遠均與橫檔氣勢相聯實爲海口第一扼

要再將南山添建月臺更爲得勢前車可鑒亟應設法使之懼而不來縱犬羊之性愍不畏死重關旣設任其自入網羅然後振我軍威方可化其鴛鷺至兩重排鍊所費雖多然扼要之中添此堵截之具則軍威愈壯奸宄潛消查外夷商船例准收泊黃埔夷情叵測良莠難分果能設此重關不獨堪禦外侮兼可懾服內奸思患預防一舉兩得矣

一大虎炮臺建在大虎山正面係嘉慶二十三年造週一百二十丈面對東北向屬坤艮炮洞三十二

個配大小生鐵炮三十二位防臺把總一員防兵五十名臺上神堂五間官房三間兵房二十九間軍火局房三間臺面炮洞梁口均粗石砌就

勘得大虎炮臺獨當一面形勢雄壯初覺海面稍寬及測量水勢深泓僅寬九十八丈此外卽是暗沙惟大汐長潮沙面之水仍有一丈四五尺不等議於沙面用大石塊拋疊成堆如七星之狀約高六七尺石堆之中間以明椿高出石堆二尺俾石仗椿力不致衝坍椿爲石護不得鬆浮夷船畏石



畏椿不得不由中泓行駛則炮火較近更爲得力  
一蕉門炮臺建在黃角山根係嘉慶十七年造週四  
十二丈五尺臺面朝東向屬酉卯炮洞十四個配  
一千五百斤炮二位一千二百斤炮四位一千斤  
炮八位臺上神堂二間官署二間兵房十五間藥  
局一間防臺外委一員防兵一十六名炮洞堞口  
石砌地面係三合土築

勘得蕉門口一處外聯大海內通獅子洋直達省  
城爲商漁出入門戶且爲夷人脚船往來捷徑亦

屬走私要隘該處兩岸淤灘中泓深處潮水退定  
尙存一丈三尺計寬一百二十餘丈大汐長潮水  
深在二丈以外此處最關緊要潮水進口勢稍灣  
曲是以口內未能刷深若照南河築堤之法尙易  
堵塞設不可塞卽安釘品字揸手椿對面五道使  
之不能迅駛炮臺上必須添換五六千斤大炮六  
門防弁須換把總防兵添足四十名方期有濟然  
究不若堵塞之爲妙也

一新涌口炮臺建在亭埗口之內係嘉慶十五年造

週四十二丈五尺炮臺正面朝南向屬丑未上下兩層炮洞共十三個安設二千五百斤至五百斤大小生鐵炮十二位臺內神堂一間官房三間兵房九間藥局一間防弁一員防兵二十名地面炮洞均石砌堞口磚砌

勘得新涌口一處外通大海內達虎門由內河直通省會爲商漁出入捷徑炮臺之前水面量寬一百一十二丈中泓水深一丈亦不甚寬大汐長潮水深一丈七八尺杜漸防微似須築壩堵塞設恐

不便於民亦應於稍寬處拋石下椿以資扼截

至於鎮遠橫檔南北添製木排鐵鍊二道仍須添造  
守椿兵房五處兵房下脚砌石成臺約長三丈前後  
約濶一丈高三尺如小月臺之式上置千餘斤鐵炮  
三門以期週密其下橫檔與對面之湖洲山一帶議  
安品字操手椿五道又上橫檔山後移建炮臺與對  
面之蘆灣嘴添建炮臺暨中段拋石下椿各節前文  
業已聲明如獲照行臨時再爲核辦再查水師大概  
第一以選擇將備爲目前急務將備得人則各用其

所長或專司訓練或分任巡防總領派以叅遊駐守  
任之千把庶上呼下應各有責成再嚴定賞罰懲惰  
勸勤繼則選練精勇之兵分配各臺每一炮臺安釘  
測水誌椿二根各炮尾後添製墊木一規劃清分寸  
視誌椿知潮水之長落安墊木定炮口之高低如此  
練熟則炮出有準矣第水師弁兵窮苦者十居八九  
月支餉米本屬無幾而經費有常萬難周卹獨是防  
臺之兵更難形狀緣沙角大角南山鎮遠橫檔大虎  
六處炮臺四面環水各兵駐守於斯不容稍曠月支

餉米分養眷屬所剩無多已難果腹若再遇急風暴雨不能過渡購買薪米枵腹啼饑實所不免籌思乏術可否於籌議借款生息項內每兵每日賞給口糧三分自來年正月起六處炮臺將來配定駐防計兵三百名通年需銀三千餘兩如此則士飽氣騰選派得力千把嵩司訓練均勻勞逸養其氣而責其成將備按旬考核提督每月一臨賞功罰過一秉大公務使官兵聯爲一氣積習漸就湔除惟是各處炮臺恃炮爲威必須添儲火藥多備炮子火藥以硝磺炭配

合而成礮去根渣硝務提淨炭以桺木桑條爲佳縱用杉木亦必燒透存性礮灰細羅舂力要足製成晒乾色宜帶白粒粒如珠仍令監造者撮藥於手燃火試之手無點跡火力高冲烟係白色以此爲最炮子則有封門子羣子交杯子擔杆子之分封口羣子用以擊船打賊擔杆交杯專用打桅均宜添備各營師船歸廠修造久已仰邀洞鑿可否稍爲通融減造數船卽以所減料值加於新船之上俾工堅料實堪禦風浪矣製造大小鐵鍊鐵宜多鍊則可垂久火船雖

應指備於臨時必須預爲配就撥定數船先用空船  
派輕捷舵水試演如式方免臨期棘手至於添設排  
鍊浮排仍應添製大划船八隻鐵錨棕本一百二十  
副南山臺脚仍須砌石馬路一道以作安收排鍊關  
欄添造大炮或可將各處廢炮查出添入融製以上  
大畧情形瑣碎難以細載均候鴻裁酌定章程委員  
辦理以便隨時妥商期於核實

道光十四年十二月

初六

日



護順德都司張玉堂不知檢束咨請撤任降補稿  
爲護都司不遵

功令有意窺探咨請撤究以儆將來事竊本提督初蒞  
粵東甫經一月於所屬各營官弁尙未週知而各營  
內河汛境亦未身經是卽選派從人於本月初四日  
親詣順德新會一帶查看形勢稽察巡員一路以來  
有順德新會等營將備弁委先後來船接見本提督  
均諭以湔除積習振刷精神體卹兵艱正已率屬巡  
防以捕盜爲先存營以練兵爲要諄諄告誡衆所共

聞迺有護順德協左營都司張玉堂差代理巡河外  
委蘇燦邦送來洋錢三十四圓並分派各行單賬一  
紙交隨行千總會應元分給會應元不敢徇私立卽  
面稟前來本提督當卽傳到來弁蘇燦邦再三詰詢  
據稱係護都司張玉堂交給令其送交會應元轉給  
各行等語及詢以此錢從何措出其意何居蘇燦邦  
則吱唔不能應對本提督立飭千總會應元將原封  
面交蘇燦邦迅卽送回查蘇燦邦係順德協右營額  
外代理該協左營外委汛務張玉堂係伊本轄護理

都司差其賚送非能自專應請毋庸追究惟張玉堂以提標前營千總護理順德左營都司自應奉公守法方爲無忝厥職迺不遵

禁令是積習已深罔知振作且難保其不藉此朋攤從中漁利此等劣弁應請卽行撤任降補把總俾各營知所戒懼不敢效尤積習冀可漸除公事方能振作爲此合咨貴部堂請煩查核選員接署順德協左營都司印務實爲公便仍祈衡奪示覆施行

一咨 督院

道光十四年十二月 十二 日

爲檄行查覆事道光十四年十二月十三日准督部  
堂盧 咨開道光十四年十二月十三日准貴提督  
咨開竊本提督初蒞粵東甫經一月於所屬各營官  
弁尙未週知而各營內河汛境亦未身經是卽選派  
從人於本月初四日親詣順德新會一帶查看形勢  
稽察巡員云云 同前文 等因到本部堂准此查護都  
司張玉堂於貴提督巡河因何差弁致送洋錢應卽  
撤任查辦除將順德左營都司事務委員接署併行

順德協轉行遵照立將護都司張玉堂撤任查明該  
護都司因何行賄有無朋攤從中漁利情弊刻日據  
實稟覆以憑核辦毋稍徇隱仍將撤任日期具報併  
行東藩司查照外相應咨覆查照施行等因到本軍  
門准此合就檄行爲此牌仰該署副將照依事理卽  
便轉行遵照立將護都司張玉堂撤任查明該護都  
司因何行賄有無朋攤從中漁利情弊刻日據實稟  
覆督部堂核辦毋稍徇隱仍將撤任日期通報毋違

一行順德協

道光十四年十二月十四日

奏復查明澳門夷人炮臺原委請免驅拆摺

總督主稿

漢軍副都統臣左廷桐

廣東水師提督臣祁天培

兩廣總督臣關天培

廣州將軍督臣盧坤

廣東陸路提督臣哈豐阿

滿洲副都統臣曾勝

粵海關監督臣彭忠

奏爲遵

旨查明澳門炮臺番梢係西洋夷人設立起自前明並非

嘆咭喇夷商建設將築造原委及實在情形恭摺奏

祈

聖鑒事竊臣盧坤閱兵途次於道光十四年十一月二十

六日准臣祁項咨准軍機大臣字寄道光十四年十月二十五日奉

上諭有人奏廣東澳門夷商有自築炮臺訓練番梢情事請嚴飭該省大吏設法拆毀驅逐一摺據稱廣東省澳門地方距省城三百餘里向有夷商攜眷寄住已歷一百餘年各國夷人恭順奉法惟暎咭喇夷情狡悍該夷等於澳門自築炮臺六座日東望洋炮臺置炮七位日西望洋炮臺置炮五位日娘媽閣炮臺置炮二十六位日南環炮臺置炮三位日噶斯蘭炮臺置炮七位其最



大者曰三巴炮臺置炮二十八位各貯火藥於左側此外尙聞置炮百餘位約計置炮共二百餘位有大炮六十餘位餘炮差小其最大者重三千斤長二丈炮口能容蛇行而入者三人又有番梢三百餘人皆以黑鬼奴爲之終年訓練無間寒暑詭形異服彌滿山海加以奸民貪利被其噉誘導之凌轢居民蔑視官法該夷中如瑪噠成等通曉內地語言文字粵省虛實情形及官民動靜無不確知本年該夷目噠嘮啤擅令兵船闌入海口若非見澳夷終年練兵該省地方官漫無查察特爲

聲援安敢出此該澳夷安居內地築臺列炮日練夷兵如謂自備洋盜有內地沿海文武衙門代爲巡防卽謂該夷兵寄居內地萬無能爲但內地邊疆豈容外夷設險屯兵置之不問該省歷任文武大員從未以此情奏聞請嚴飭該省大吏務將澳門地方該夷自築炮臺炮位拆卸銷毀驅逐番梢盡行回國等語夷人遠涉重洋在內地通商貿易自爲牟利而來但犬羊之性反覆無常全在地方官辦理妥善申明法制曉諭飭遵懾其玩心奪其所恃威信旣布各夷自俯首帖耳惟命是從不

徒折服其心併可柔馴其性倘漫無查察致啟玩侮之心任令在內地設險屯兵置之不問該地方文武大員狃於目前因循怠玩不思潛除芽蘖消患未萌設縱恣不法勢不能容必至振我國威大加懲創彼時卽治以辦理不善之罪亡羊補牢於事何濟該督等務將澳夷自築炮臺訓練番梢情形確切查明是否屬實如果通省皆知地方大員豈能毫無聞見若知而不言於意何居天良安在撫馭外夷之道柔之以所貪尤必制之以所畏該督等迅將該澳夷實在情形設法辦理據實具

奏如稍有含混諱飾尙不認真查辦將來激生事端釀成後患惟該督等是問試問能當此重咎耶凜之慎之將此各諭令知之欽此遵

旨寄信前來等因仰見

皇上慎重海防消息未萌至意跪誦之下不勝悚惶欽服

之至

臣

郝墳承准前因當與

臣

哈豐阿等傳諭粵海

關監督彭年一體欽遵並行藩臬兩司嚴查

臣

盧坤

接准咨會卽在途次密札香山營縣暨澳門同知會同委員確訪去後茲據署布政司李恩繹兼署按察

司李振翥並委員候補同知郭際清會同香山縣知縣田溥香山協副將秦裕昌等稟覆前來隨會查澳門距廣州府之香山縣城一百四十五里查明史嘉靖年間先有番人佛郎機人香山濠鏡澳爲市天啟元年大西洋人來中國亦居此澳終明之世未常爲變卽今之澳夷也該夷人歲輸租銀五百兩由縣徵解其建設炮臺六座載在縣志檢查舊案西洋人在澳居住以後有紅毛國夷人卽今之啖咭喇窺伺澳門常欲脅奪市利西洋夷人遂設立夷兵建立炮臺

以爲居守之計亦係前明時所設嘉慶十三年噶咭喇夷兵擅入澳門佔踞東西炮臺經前督臣吳熊光奏奉

諭旨曉諭退出嗣於十四年署督臣韓崱督臣百齡先後議設前山營官兵案內又將澳夷舊設炮臺情形奏聞有案本年噶咭喇夷目喇嘮啤擅至省城不遵法度臣盧坤慮其至澳生事並因西洋夷人近年貧弱恐爲噶夷誘脅密派員弁在澳門水陸預爲調度併開導西洋夷人許以派撥官兵協守炮臺杜其反側

之心密作牽制之計亦經奏

聞在案其啖咭喇夷商貿易往來有時領牌赴澳暫寓或安頓家眷往來無常卽如本年啱嘮啤押逐出省以後在澳門店戶寄寓旋卽病故其眷屬卽已搭船回國是澳夷與啖咭喇並非一氣其設立炮臺番梢所以防禦啖咭喇諸夷而非啖咭喇之聲援由來已久惟該夷建築炮臺實在年分並無確切志載且該夷人如果有凌轢居民蔑視官法及奸民勾結情事卽使章程久定亦必應嚴行驅除當經委員會同地

方文武密訪茲據委員查得西洋夷人建設炮臺係在前明天啟年間初造有三巴門伽思蘭娘媽閣炮臺三處後因噶嘯國爭佔又添建東望洋西望洋南灣三處炮臺並將初建炮臺加修寬大添設炮位現在三巴門炮臺安炮四十七具伽思蘭炮臺安炮十八具娘媽閣炮臺安炮二十九具東望洋炮臺安炮二十具西望洋炮臺安炮十三具南灣炮臺安炮五具此外尚有大小炮三十餘位安放西洋稅館其炮口自濶八寸至五寸五分不等並不能容三人蛇行



而入所用火藥均由小西洋運來收貯娘媽閣炮臺  
臨時取用其番梢原設四百八十名嗣因經費不足  
裁汰二百四十名又頭目兵總五六十人番梢分守  
炮臺每日早晨或鳴鼓換班或開放鳥鎗並非終年  
訓練住澳夷人共五百餘家男丁大小一千餘人黑  
夷奴二百餘人該國派有唛嚟哆一名兵頭番差各  
一名在澳管理該夷人遇天氣晴明三五人馳馬海  
旁謂之運氣納涼從無多人遍游山海之事其各國  
夷人到澳向西洋人暫時租屋居住並無在澳長住

之人現在啖咭喇夷商在澳者十九人此外花旗嘑嘑  
嘑各國自一二人至七八人不等徧查澳夷並無  
嗎嘑成其人惟查啖咭喇前有夷商嗎哩啞業經病  
故或係傳聽之訛亦未可定以上各情據在澳居住  
開店民人眾口一辭亦與<sub>臣</sub>等平日見聞相符此澳  
夷設立炮臺番梢原委及現在訪詢之實在情形也  
<sub>臣</sub>等復審度地勢體察夷情澳門東西南三面濱海  
其南面係萬山外洋爲各國夷船入粵海口惟北面  
陸路通香山縣城該夷人所設炮臺均在東西南三

面望洋而建南面爲獨多北面並無炮臺是其設險屯兵專爲防禦外洋而非意在抗衡內地形制顯然距澳門五里卽係前山營所轄之關閘汎爲限制澳夷之界該處向就河內通海沙脊障以石垣設立一門以通行旅派有把總帶兵四十六名防守自關閘西北十五里卽係前山營從前設立陸路遊擊守備各一員嗣於道光十年將守備移駐大鵬右營裁減兵額改遊擊爲內河都司管帶千把總外委四員兵三百六十三名與海防同知駐劄防守臣盧坤前赴

該營閱兵周覽形勢前山營控制澳門實有拊脊扼吭之勢關閘咽喉界限尤爲險要天成是澳夷雖有炮臺番梢亦無險可恃而我內地層層扼要控制卽使夷情反覆亦不敢肆其玩侮之心且西洋夷人住澳二百餘年久已涵濡

聖澤與澳中民人偶居無猜該夷人近年生理日微並無可噉之利閩廣商民在澳營趁亦從無被凌爭訟之案其完租納稅事事恪遵法度臣盧坤前次經臨該夷人鼓吹伺接十分恭順惟有乞憐之心毫無倔強

之狀其貿易進出船隻有委員查驗並有住澳縣丞隨時稽察一切造船修屋等項工作均須稟明地方官撥給工匠不敢自專造作設夷人卽有時出外遊行從不越關開半步是澳夷之馴服與暎夷迥不相同向來立法彈壓亦甚爲周密該夷人距本國海程甚遙非一年半載不能到遠方寄跡孤而無援惟奉天朝爲依歸亦視澳門爲世業常恐爲外國所奪是以別國夷商雖在彼暫寓總不能聯絡久居是澳夷之列炮練兵各國夷人亦共知其實爲暎夷之敵不能倚

全書前集 卷一  
以爲援惟啖咭喇圖爭澳門以爲貿易駐足之地蓄  
志已久西洋人僅番梢二百餘名強弱不敵所以能  
久安樂土者皆仰藉

聖朝怙冒之仁諸夷不敢凌侮查嘉慶十四年前督

臣因

澳門自伽思蘭炮臺至西望洋炮臺迤南沿海一帶  
石坎低矮曾爲啖夷爬越奏奉

諭旨令該夷人加築女牆增高培厚俾資防護亦因啖夷  
桀驁恐澳夷力不能禦故爲之固其圍以自保柔澳  
夷以所貪卽制啖夷以所畏以夷防夷正與現奉

聖諭先後同揆該夷人久在

皇仁覆幬之中此時如遽行拆毀炮臺驅逐番梢二百餘年久設之藩籬一旦裁撤數百戶澳夷未免轉滋疑懼且使各國夷人以西洋人爲

天朝所屏棄必致咸生鳩佔之心轉非綏靖海隅之道卽以內地海疆而論澳門爲廣東門戶本應建臺設守該炮臺雖建自夷人設遇海防緊要之時內地派員檢兵督同防護亦未始不可得其捍衛之力臣等公同酌議所有澳門炮臺番梢應請仍循其舊邀免拆

毀驅逐仍嚴加查察不使稍有違玩以杜弊端臣等  
渥沐

天恩畀以海疆重任固不敢好大喜功妄開邊衅亦斷不  
敢因循畏葸養癰貽患惟有恪遵

聖訓於撫馭外夷時刻加意馭服者孚之以信狡黠者懾  
之以威並於水陸營汛嚴整武備俾夷情不敢縱恣  
地方永臻安謐仰副

皇上教誨裁成於萬一所有查議緣由謹合詞恭摺覆  
奏伏乞



皇上聖鑒訓示謹

奏

道光十四年十二月十七日會奏

道光十五年三月初六日奉到

硃批所奏甚屬明晰京師傳言原難憑信第有人陳奏豈能不降旨查詢且檢查舊存圖籍造辦處現貯乾隆初年洋畫澳門圖一幅朕詳加披閱其門戶牆垣宛然在目並有高臺數處俱設有炮具其三巴門等名目俱係清書標識與卿等所奏大同小異自可毋庸查辦仍循

其舊惟諸夷貨船暨澳門居住夷人均當隨時畱心照  
例妥辦天朝體制斷不可失外夷衅端斷不可啟爲此  
特諭卿等知之毋忽欽此

札飭勤加訓練稿

爲札飭勤加訓練事照得虎門海口之沙角大角南山鎮遠橫檔大虎各炮臺俱爲商夷船隻進省必經之路而蕉門新涌又爲商漁出入之捷徑其南山鎮遠橫檔大虎炮臺四座形勢联接炮火得力尤爲防範夷船第一要隘果能實力把守炮無虛發奚有疎失之虞曩者竟被暎夷兵船乘風闖入口內直至黃埔推原其故實因守臺弁兵積習因循並未演練大炮旣無準頭又弗聯絡以致貽悞貽羞思之令人憤

懋况訓練兵丁爲營官首務而各炮臺守禦全賴大炮以振聲威前車旣覆後轍宜防所有南山等處各炮臺撥配軍火炮械亟應整飭鮮明派防兵丁均須訓練精熟以振揚威武而懾服夷心除揭示各臺曉諭外合先諄飭爲此札到該參將遊擊即便遵照將各炮臺派防員弁務須遴選歷練老成撥配兵丁務須挑選強壯精勇嚴飭各防弁認真操練各兵並將防臺需用旂幟軍械隨時整頓其得力大炮應移於正面得用之處舊小炮位移於兩旁器械均應磨拭鮮明

有應更換者立即查明稟請更換應加配者立即加配足數仍先將各炮後尾墊木遵照示諭另製堅實墊木一規以硃漆劃定分寸每臺設立誌樁二根視誌樁知潮水之長落安墊木分炮口之高低並製炮靶數個每日以潮水半長時演練大炮苗頭應用墊子若干分寸于潮水長平時應用炮墊若干分寸至大汐潮水半長及長平時演練苗頭又應用墊子各若干分寸如此日演兩次另限日期入藥進子安靶水面演放以試準頭並擬定設有奸夷船隻乘風趁

潮飛駛而來則苗頭一對船頭卽可施放自必中其  
船身若來船遲緩則苗對其頭桅方可施放必看風  
色之順逆潮水之緩急來船之遲速酌量燃火之疾  
徐總之人爲萬物之靈必須學而後成練而後熟更  
須各該防弁平日勤加教練一一講論明白循循善  
誘務使各兵了然胸中兵知將心將知兵情至臨事  
時自如身之運臂臂之運指可無僨事之慮該參將遊擊  
按旬親往督演察其勤惰優劣分別賞罰一秉至公  
毋濫毋縱兵丁中有演練純熟者非干犯軍紀勿率

更換致爲新手貽悞至於火藥炮子固應多備火藥布袋亦應預籌常常晒晾不可受潮在臺防兵日則分班瞭望夜則更替鳴鑼吹螺務均勞逸不可偏累大小官員愛兵如子則各兵視之爲父母矣火箭火礮則於操演各兵技藝之期習練均使精熟爲要本軍門隨時親臨閱驗或密差訪查倘該弁兵等仍前怠玩或不認真訓練仍前生疎無準及查有懶惰偷安者官則立予革究兵則插耳責革決不寬貸該管將備督飭不力視爲泛常者均卽奏叅各宜凜遵甚

勿因循泄視自取咎戾至於防臺兵丁餉米不敷分  
膳家口本軍門昨已面商督部堂籌款津貼矣毋違

一札署本標中軍 署本標右營

道光十四年十二月 二十一日



逐月捐廉發給中軍修理各炮臺軍械稿

爲札飭遵辦事照得南山鎮遠橫檔大虎四處炮臺  
爲防夷扼要之區一切器械炮火及零星需用之物  
必須件件整齊俾有備無虞以期得力而沙角現議  
改爲號令炮臺必須於望樓前添製高杆一根大旂  
一面仍須預備柴草百十束堆集望樓之內一遇緊  
要日則懸掛大旂夜則集薪燃火知會大角橫檔各  
臺一齊開炮第重大工程自應咨商督撫籌款

奏辦其零星之件卽應由營捐辦卽如各臺水面設立

誌椿各臺大炮安置墊木大角炮臺立杆添旂各臺  
整理器械在在均須籌備既不便事事咨請籌款營  
中又無閑項可支應由本軍門按月捐廉今先發銀  
二百兩交該叅將隨時動用卽行次第興辦不敷若  
干下月再行請給務將各炮臺一切軍械修整鮮明  
鋒銳不任短缺爲要合亟札發爲此札仰該叅將卽  
將發來養廉銀二百兩兌收隨時支用以免掣肘用  
完再行請領切勿拘泥吝費是爲切囑毋違特札  
道光十四年十二月二十一日一札本標中軍

虎門海口添製排鍊無礙商船稿

昨肅丹函度登青覽頃奉台翰並錄示查明澳夷請免驅拆器

奏摺稿仰見撫馭兼施恩威並用廣播懷柔之至意欽佩良深承示添建南山暨蘆灣山脚等處炮臺實屬首尾相聯深得拊脊扼吭之勢一舉兼備尤佩神謀所有添鑄炮位已令舖戶承辦取具保固其添改及修築各工已飭東莞李令與洪署將勘估將來興辦之時委令洪署將李令及余叅將協同辦理諸當就

近稽查以副台囑洪署將久經戰陳深明炮火事宜  
務祈委飭前來不獨守臺弁兵得其教導一體練習  
施放有準卽弟亦獲指臂之助叨益無窮至前議排  
鍊業經面陳無事則排列於山邊有事則橫檔於海  
面如門開闔並非常隔中流本於來往商船毫無阻  
礙嗣又深慮或有不肖弁兵藉以演試啟閉之名而  
爲斷流漁利之舉擬逢演試之期親往督率如荷允  
行將來製造齊備尙祈頒示曉諭設有藉端需索等  
情許商人扭稟嚴辦以杜其弊迂拘之見非敢執一

第有此排鍊兩層實與炮臺互得守望相助之益可  
否敬祈衡奪又承示籌有款項會銜覆

奏實深沐幸之至合先肅謝云云

道光十四年十二月 二十一日



分撥探防籌添臺兵口糧各件催督院速覆稿

二十一日肅覆寸函度已上登台覽前議於大鵬香山巡洋船內酌撥二船駐守萬山兩臺遇有夷船收針到山大鵬一船專報中營巡員傳知沙角守臺汛弁知會前途撥兵飛報提督香山一船專報澳門巡員飛報香山副將兩營船隻弁兵按月輪換以均勞逸而專責成因巡弁向無稽查夷船之責且不通夷語是以敬請飭行澳門同知轉飭各引水凡遇夷船到山查明卽知會萬山師船分報巡船以便沿途接

應瞬屆正初如荷允行卽須分飭各營遵照派撥或不必行卽望示覆並將沙角炮臺改爲號令炮臺凡遇引水執持印憑引船到口報明汛弁該汛弁卽放炮一聲知會南山鎮遠各臺官兵一齊上臺佈列照看夷商船隻過境以示威嚴日間分派兵丁登高瞭望夜晚輪替支更看守炮位設遇夷船到口並無引水持文赴臺呈請照驗者或因引水來遲或係奸夷應照向來章程先放大炮一聲不必下子令其落帆下旋守候引水到臺再行驗放如該夷船聞炮仍不



落蓬下旋再下子開炮一門且不必對準施放如再  
不下旋則係奸夷卽應開炮下子轟擊一面飛報虎  
門一面於望樓高處日間懸旂一面夜則集薪燃火  
知會大角炮臺弁兵一體開炮下子轟擊其南山鎮  
遠各臺聞炮聲絡繹卽一體預備至沙角炮臺現係  
外委一員在臺防守應選諳練把總一員於正月初  
一日赴臺更換其兵丁炮火仍循其舊又大角炮臺  
原派外委一員防兵五十名應撤去防兵二十名仍  
留外委一員兵丁三十名炮火仍舊不動至鎮遠橫

橫兩炮臺原派千總二員分臺防守查調署千總萬國勝人尙老練請仍畱鎮遠防守其橫檔千總王殿安人雖老成稍覺魯鈍應請以右營署千總黎志安更換卽以王殿安換防大虎炮臺其大虎原防把總歐清飭調回營耑操兵技至各臺防兵現已飭營挑選精壯者分別更換均於年內配定正初分赴各臺以上各節僅就管窺尙祈核示以便轉行中右二營一體辦理再派防沙角大角南山鎮遠橫檔大虎六處炮臺除大角議撤兵二十名外現僅二百六十名

將來南山添建寬大月臺仍須添兵三十名兵丁苦  
況前已面陳仰荷概允籌款每兵每日賞給口糧三  
分將來配定駐防計兵三百名或自明年正月起抑  
自二月爲始敬望示下傳諭各兵遵期支領統希衡  
奪祇候遵行云云

道光十四年十二月 二十二日



咨復督院必須添製兩層排鍊以資阻截稿

爲咨會事本年十二月二十二日准貴部堂咨開照得虎門一帶炮臺經本部堂親歷查勘並委東莞縣李令會同洪署叅將詳細勘覆除應需添置大炮現在飭辦外查南山炮臺原建過高應在臺前餘地添築月臺橫檔鎮遠南山各臺炮洞過大牆垛亦薄應照大虎炮洞尺寸改小內八字樣牆垛加築堅厚大虎炮臺炮洞合式而牆垛亦應加厚以資抵禦其橫檔背後海道應將橫檔西首小炮臺移建山脚加增

寬大並於蘆灣山脚就近採石添建炮臺以上各項工程本部堂酌定一切辦工銀錢委李令經理俟籌有款項卽交該令收貯支發事竣核實報銷其辦理工程委該令與洪署叅將會同督率查察該令與該署將均屬老成練達辦事實心本部堂所深知務須加意料理工堅料實以重海防斷不可如尋常辦理官工工匠任意支銷丁役得規庇縱以致有名無實想該令與該署將亦斷不致此現在應將各項工程先行確估以憑入

奏除札委東莞縣李令會同署叅將洪發科將南山等炮臺應行添建及修改炮洞加築牆垛各工何處應如何辦法勘明長寬高低厚薄各丈尺應用工料若干需銀若干逐一確實估計詳晰開摺稟覆核辦辦工時如需派員差委該令卽自行遴員具稟以憑派撥均毋延率及札署叅將洪發科會同李令詳細勘估稟覆並將前項工程妥爲督率稽查以重海防並札東藩司遵照外相應咨會查照等因到本提督准此查南山鎮遠橫檔大虎四處炮臺參差對峙中間

海道爲商夷船隻出入必經之路建臺設守已得扼  
喉之勢今酌定將南山一處添建月臺橫檔鎮遠炮  
洞收小改砌內八字式加築堅厚大虎牆垛一律加  
厚以資抵禦併防其繞越又將橫檔山後及蘆灣山  
脚另造炮臺仍添鑄大炮四十門分配各處是重門  
之下又添猛虎之威仰見鴻謨實深拜服惟是本提  
督數詣橫檔察看水勢每逢長潮水從外海漲進因  
沙角口門寬大溜勢尙不見急迨漲至南山橫檔間  
水爲諸山所束以致溜急泓深若大汐南風船隻過



此勢如奔馬雖欲寄旋竟有欲罷不能之勢疊詢將  
弁知今歲外夷兵船卽係乘順風長潮闖駛入內前  
車已覆本提督安敢不作未雨之籌是以前議請製  
兩層排鍊承示因經費難籌未議及此今將次興辦  
不得不再懇籌添俾遇事則移排鍊橫檔中流以作  
截阻之具况擘嘍啤自逐出之後在澳門病故犬羊  
之生安能必其不來目下添鑄大炮猛烈無以加矣  
增建炮臺周密無以過矣然必須添製兩層排鍊方  
能阻其不前蓋夷船能於迅駛而炮臺則寸步難移

添臺添炮非有排鍊阻截則無以顯炮火之威添鍊  
添排又必須炮火轟擊方有以助排鍊之勢准咨俟  
各項工程勘估後方行入

奏是以謹據管窺咨請採用非敢固執尙希衡奪核示  
施行

一咨 督院

道光十四年十二月 二十四日

配造火藥復稿

頃間連接二十五二十七日兩次回玉併承錄示廣西陳雨峯軍門信底諭稿二件誦閱之餘備領一切至雨峯提軍久任封圻洞澈鉅細素所欽服深愧萬不及一教弟到粵後詢查所造火藥不甚精工前日面呈籌議條內亦經慮及昨又親詣造藥處所逐細查勘卽面諭各將備另置石臼論以配合數目亦係仿照辦理以期致遠摧堅今荷通飭水陸各營一體仿造將來委員洪署叅將前來襄司其事先演各臺

炮火次及烏鎗俾獲資助卽所以仰副綏靖海疆整頓營伍之至意也至教弟初蒞粵洋諸多未諳是以每事不敢固執不辭瑣屑悉請鈞裁茲承示夷船各節得所遵循矣惟前議防臺兵丁口糧業將慨允籌款賞給一層傳示各兵無不踴躍靜候恩施萬望設法先行籌款庶使示以恩信遇有懈怠加之嚴罰而無怨也是爲翹祝佇盼者耳

道光十四年十二月二十八日

核計炮臺兵數籌議歲需口糧稿

新正初一日接奉鈞函捧讀再三感銘無既承示各炮臺兵丁口糧必應添給資以薪水方可專其責成必須行司籌款議詳定案究竟舊設各臺向有防兵若干如何支領着詳晰查明用印文咨會以憑行司籌辦等因仰見慎重海防體卹兵艱之意查沙角炮臺原設防兵三十名鎮遠橫檔兩臺各原設兵六十六名大虎炮臺原設兵五十名以上四處炮臺原派兵數應請仍循其舊至大角炮臺原派防兵五十名因

口門太寬不甚得力應酌畱防兵三十名其南山一處現議改建寬大月臺造成後須配兵六十名又橫檣山後移建炮臺蘆灣山脚添造炮臺工竣後仍須各派兵三十名是舊設新添炮臺八處約計防兵三百五十名以每名每日籌給口糧三分計每月需銀三百一十五兩除行中右兩營將領悉心核議俟議覆至日再行核實咨請衡奪外緣奉台函合先肅覆道光十五年正月初一日

虎門緊要臺兵口糧遵示減定再行面覆稿

新正初五日祇奉初三日差賚還雲聆悉種種承示  
賞給防守炮臺兵丁口糧爲數過多命再酌核分別  
最要次要將最要處所量給津貼每年總以一千兩  
爲度設遇有事之時如應加給兵糧臨時酌定較爲  
圓活亦昭激勵更爲得力云云仰見於樽節庫項之  
中仍寓體卹兵艱之意豈但防臺衆兵共應感激教  
弟亦深欽佩敢不仰體以慰仁慈忠盡之懷查虎門  
爲中路海防扼截其炮臺亦較各處更關緊要開篆

後卽擬親詣各臺逐日施演至南山暨蘆灣山脚等處添建之臺須俟工竣後方能派定防兵其餘各臺現在遵示酌減俟將來議定如何辦理之處容俟赴省再當面罄

道光十五年正月

初五日



設立義學曉諭衆兵子弟肄業告示

爲曉諭肄業事照得本軍門蒞任以來察看虎門寨城內外均係兵丁住屋其中攜帶子弟同居者諒必不少惟僻處海濱附近又無村館鄉塾以致讀書之聲竟渺焉于耳爾等子弟終年無事嬉戲閒遊白日青春殊爲可惜本軍門擇於二月初二日在於

關帝廟兩廂設立學館二所籌備束修延師課讀諭爾兵丁知悉如有願將子弟送學攻書者可赴中軍衙門報名引送入學不獨可以收束童心且可藉圖上進

古來名將建功立業忠

君孝親未有不從讀書中來况爾等年幼子弟將來造就正不可量本軍門不忍坐視少小曠閒又深知爾等無力從師之苦故有此舉並非虛襲義學之名實則不外家塾之意也爾眾兵丁其各率爾子弟就學從師毋自暴棄本軍門實有厚望焉此示

道光十五年正月初十日一出示寨城三門

通行訓練章程挑選精壯士卒稿

爲

申明訓練章程派定千把經管以專責成而行賞  
移咨轉飭各營遵循訓練章程一體認真操演以

罰

收實效

事照得廣東水師各營官兵軟弱技藝欠精

前已見諸邸報是以本軍門於蒞任後卽通飭各營

上緊操練並咨行各

鎮

營挑選備戰勇壯兵丁認真

練習務使一兵一技悉成勁旅庶邊海地方有備無

患得以上報

皇恩下伸已志惟是水師營分無論內河外海均應分駕

船隻逐段巡查緝盜防夷在在俱關緊要是操練巡

防二者不可缺一自應分投辦理俾兵技漸就精強  
巡防亦不致貽誤查上年冬季督部堂巡閱水師各  
營疊准來咨內開中營革去一鎗不中兵八名又僅  
中一鎗勒限兵二十三名左營革去一鎗不中兵十  
一名勒限兵三十四名右營革去兵三名勒限兵二  
十三名前營革去兵一名勒限兵五名後營革去兵  
一名勒限兵六名香山協左右二營革去兵十八名  
勒限兵三十九名前山營革去兵三名勒限兵七名  
大鵬左右二營革去兵十二名勒限兵三十一名順

德協左右二營革去把總一員降去外委一員革去兵十九名勒限兵四十七名新會左右二營革去兵二名勒限兵十一名本軍門展閱來咨不禁汗下查大閱之年督部堂奉

命巡閱通省各營將領挑選弓箭鳥鎗兵丁呈送考閱不過十分之三四且係選送之兵何至五箭全空一鎗不中又僅中一箭止中一鎗者如此之多足見該管將備一味因循經搯千把全不認真似此疲玩成風廢弛伊于胡底今本軍門酌定條規通行各營仰各

營將脩轉飭經操千把洗除舊習認真操練各保功名毋得自棄本軍門再三申令一秉至公定於秋末

巡閱本標徑轄各協營悉照後開章程分別賞罰各

宜自愛切勿身試

合再諄諄札飭爲此札仰該營卽除行本標徑轄各協營

便遵照嚴飭脩弁激發天良認真訓練務使各弁兵

已精者精益求精未精者漸就精強總令一兵得一

兵之用餉不虛糜一弁有一弁之能官不尸位本軍

門不憚瑣碎誥誨諄諄其各凜遵仍將遵辦緣由及

派定經操官弁銜名挑選各技兵丁花名一併造冊

呈送

毋違切切  
外爲此合咨貴鎮煩爲查照希卽轉飭所屬各

營一體遵照認真操演務至精純施行

計開

一各營兵數多寡不一總以每百名挑出精壯兵四十名認真操練謂之備戰兵務使技藝純熟鎗箭有準俟練熟後再行更替巡防如此替換操練三年則閱營無不練之兵矣設該營洋面遼濶汛防寬廣不妨呈明稍減或先練三成亦可

一經操千把總派定承操一年一年之內不准更換

以專責成而免推諉其實力操兵一年之內著有成效者予以陞擢其委靡不振者該管將脩隨時查明卽行降革則責無旁貸矣

一 弓箭兵遵照部定章程官兵步弓總以六力爲準能於八力十力十二力挽強命中者卽破格獎拔如弓不及六力者卽有違部式該管官卽隨時勒令練習若不見長進卽革退另募如漢仗年力均好不妨改技烏鎗藤牌總在該管將脩核實辦理一 弓箭兵以弓勁有準者爲最每兵十名內有漢仗



長大在六名以上者爲合式十名共射箭五十枝能中箭二十六枝以外者爲合式如兵丁十名內有漢仗可觀在七八名者準頭在六分以上者兵則立予獎拔官則記名陞補設使漢仗準頭不及分數者卽照所欠分數官兵均分別降革責處一鳥鎗爲行軍利器鎗兵以健壯爲佳每十名打靶三十鎗以中靶十八鎗爲合式如準頭在七分以上者爲優不及六分者爲劣此後分別優劣總以準頭多寡以定賞罰

一定例鎗兵打靶第一鎗站打第二鎗跪打第三鎗  
伏打自應仍照舊式操演至於整隊排鎗卽大陣  
中之九進十聯環最爲得力分排則爲九子合攏  
則爲整隊各營必須演練進退出入總以齊整爲  
要提標中右兩營刻已教演各營均當效法

以上六條既簡且明各營將備千把務宜效法努力  
從公用心訓練本軍門先教後懲一切均循舊制毫  
無杜撰自此次通行之後敢有不認真訓練者法令  
具在莫謂言之不預也

一咨四鎮 一札中左右前後五營 香山協

順德協 新會營 大鵬營

道光十五年正月 二十二日



請留千總周國英仍署右營守備稿

月之二十四日接奉回玉知前肅謝牋已登記閣併奉到廣西陳提軍轉寄之函有費清心銘泐無似承示砲臺事宜俟勘估覆到卽會銜發摺仰徵關照尤切欽承側聞二月中浣卽有粵西較閱之行教弟遠

隔獅洋未克躬送俟節旌回省再當趨達積忱昨准鈞咨署陽江鎮右營都司何文光撤回左營本任其於營伍公事如何因未見其人無由知悉查其本缺係右營守備林騰鶴署理何備旣回本任林備亦應

遞回本任惟林脩曾見三次詢其一切不甚了了教

弟業將訓練章程通飭各營於各枝兵丁內先挑四成選派得力千把不准更換經捺一年視兵技之優劣知千把之勤惰以定勸懲親標中右兩營已於開印日開操專派署右營守備周國英經營並派署遊擊何駿龍署中營守備曾應元督率南山鎮遠橫檔大虎四處弁委演練各臺大炮準頭分別大汐小汐水勢長落炮口高低務使各兵手熟眼準心定力齊俟操練稍合準繩擬於二月半後親往較閱賞罰兼

施以冀漸見就緒惟是一切公事均須得有實心任  
事之員方能起色守脩林騰鶴人欠勇往難期得力  
議將林脩另請委署別缺所遺右營守脩仍以千總  
周國英署理詢據兩營將領稟稱該千總周國英人  
甚勇往操兵頗能得力可否俯准俾公事不致掣肘  
叨益無窮矣

道光十五年

正月

二十九日





札飭各營查明儲備歲需火藥造冊呈覆稿

爲札查事照得火藥一項爲軍火要件本軍門每年保題軍裝冊內僅將額設儲備數目造報但火藥例應出陳易新該營每年動墊若干每年買回硝磺造成火藥若干歸補儲備亟應確查以歸核實此外有無奉撥到營奉撥出營火藥各若干均應隨時報明茲查檔案該營並未報有四柱清冊事關軍火要件合就議定冊式札飭札到該營照依事理卽便轉飭遵照刻日查照粘來冊式逐細分晰據實開造四柱

清冊限十日內呈飛專差稟覆併嗣後遞年務須照辦切勿稍延干咎毋違

計粘冊式一紙

舊管

額設儲備火藥若干斤

內有續奉撥出撥入者均註明

新收

購回某年硝磺各若干斤

造成火藥若干斤

開除

一墊用歲需火藥若干斤

實在道光十四年底

除墊歲需火藥外仍局存儲備火藥若干斤

又該營買回十三年分硝若干磺若干應該造成  
火藥若干斤俟造成另報合併聲明

一札本標中左右前後五營 香山協 順德協

大鵬營 新會營 前山營

道光十五年二月初二日



庫存炮子鏽蝕當出陳易新並趕造火葯稿

頃由貴中衡專差千里馬梁得超賚到初三日所發  
回玉仰承俯准所請仍以千總周國英署理右營守  
備林備另行改委具徵虛懷若谷和神當春曷勝欽  
佩至挑選兵技試演炮準皆係分所當然猶承宏獎

更切懷慙

教弟

於開篆後親詣本標中右兩營點查

軍火葯彈尙無虧短惟查缺封門彈以及鍍羣子全  
行鏽蝕皆有孔眼難期得力檢查冊載均係康熙十  
六七八九等年自省局領回大約年歲久遠海邊濕

重所致幸本年正月發到新鑄大小封口子二千九百六十五個昨已分貯各臺此時按期操練炮準必須炮炮下子現擬卽以此項銹蝕炮子量爲配演將來彙總補造似亦出陳易新之一道又查水師各營存局儲備火葯多寡不一而兵數在千名以內者每年歲需火葯均在三千斤以外每年動用照例出陳易新此間亦然惟江南各營均於五六月間成造本年歲需火葯八九月間卽一律造成歸補儲備連日檢閱各營購買硝磺文冊均係十四年冬甫購十三

年分歲需硝磺卽使趕緊配造總須十五年秋間方能造竣是存局儲備之藥旣已墊用十三十四兩年歲需仍須墊用十五年上半年操用火藥比如歲需火藥額造三千斤者存局之藥不過儲備三年多則儲備四年若不急急造成則愈墊愈少似此年壓一年必致儲備漸少海疆營分儲備最關緊要昨已通行提屬十四營速將火藥一項趕造四柱清冊一俟呈覆至日核清後卽飭各營趕購十四年分硝磺接續配造庶幾儲備有資而領存公費亦免虧挪矣容

俟逐管核明另請通飭各管遵辦先此肅復云云

道光十五年二月

初四

日



分兵訓練指以專防稿

爲預期派定專司自行選練弁兵以資從容得力而免臨事周章事照得上年八月暎夷兵船不遵法度闖入黃埔上煩

宸念譴責立加前車是鑒亟宜預防是以本軍門蒞任之初卽親詣各洋履勘形勢已將各扼要處所繪圖備文咨商督撫籌款次第興辦並行知在案至於操練兵技演習炮準配造火藥整理軍械亦均節次通行又在案卷查上年六月夷目擘嘍啤不領牌照私進

洋行於七月十二日准督部堂咨開除札香山協縣  
水師中軍大鵬營東莞縣會同督率兵役及巡洋舟  
師沙角橫檔各處炮臺守口弁兵將各臺炮位配定  
彈藥晝夜瞭望倘該巡船膽敢闖入內河滋事卽行  
開炮轟擊如該員弁守禦不慎致該夷兵船闖入內  
河定以軍法從事凜之勿悔等因迨暎夷兵船二隻  
於八月初五日闖過鎮遠初七日又過大虎停泊黃  
埔於八月初十日又准來咨內開查貴標中軍叅將  
經本部堂札飭速赴虎門等處炮臺預先整備晝夜

瞭望如再有夷兵船進口卽用頭號大炮轟擊等因  
各在案查其時前軍門李 患病沉重不能理事而  
叅將高宜勇並不預籌方畧頗預從事失於疎防弁  
革官叅咎由自取查虎門爲粵海咽喉省城外衛有  
備無患豈可忽略須臾本軍門蒞茲三月已悉大概  
情形特與爾將備等預定專司庶責無旁貸自今以  
往若調度乖方則責歸提督若督率不嚴則咎歸將  
領軍械不利則守備之咎難逃兵技不精則千把之  
罰不追其各炮臺防兵每月兩次操練炮準並按三

八日期操練九子五子等鎗仍責成以九子五排配成一隊專責守臺弁委經管該將備每月輪替前往較閱俟演練稍精本軍門親臨較閱公行賞罰至於南山炮臺整理軍火炮械一切操練事宜專派中營叅將督理仍兼管鎮遠炮臺將來南山添建月臺仍須添炮添兵均委該叅將經理其橫檔砲臺整理軍火炮械操練一應事務專派右營遊擊督理仍兼管大虎炮臺將來橫檔後及蘆灣山新建炮臺仍須配炮添派弁兵

遊擊悉心籌辦其鎮遠炮臺專

派中營守備整理砲械軍火一切操防事件其大虎  
砲臺專派右營守備整理軍火砲械一切操防事件  
該將備四員接札之後各於本營內選派勤幹弁委  
一人挑選勇壯兵丁年在二十以外四十以內者各  
一百二十名每兵十名爲一隊每隊選拔隊長一名  
專管戶下兵九名以資鈴束卽交所選之弁用心操  
練該將備每月親閱一次分別賞罰練熟後本軍門  
親臨較閱以定勸懲如此操練旣勤則技藝自精技  
藝精則膽力益壯官兵日漸日親則官知體卹兵艱

兵能仰遵官法上下同心自可聯爲一氣矣當無事之日均令在營操練俟南山月臺及橫檔後蘆灣山各臺築成即可於此項兵內酌量派撥倘有外夷兵船一過萬山該將倫等卽各帶本身練熟弁兵飛赴所派炮臺鼓勇堵截設外夷兵船愍不畏死膽敢闖入沙角該將倫遵照文內所載卽用頭號大炮對準轟擊合先預行札派以免臨事周章爲此札仰該

遊擊  
中軍  
守備

叅將立卽遵照實力經理仍限十日內將遵文辦理緣由及所選弁兵花名具文造冊各自呈覆以憑彙

咨脩案事關籌脩邊防各宜努力趨公毋得稍存泄  
視本軍門言出法隨該將脩幸勿自悞毋違特札

一札本標中軍 右營遊擊

中營守脩

道光十五年二月初七日





查驗庫存銹蝕炮子札營出陳易新稿

爲札飭遵辦事照得本軍門於正月二十二日親臨  
中右二營軍火局閱驗軍裝甲械藥彈等項驗得局  
內有存貯大小生銹炮子均已銹蝕全有孔眼若用  
以禦敵難期得力查係康熙十六七等年由省局領  
回自係年久之故因思現在各臺按期演練炮準每  
炮均須下子試靶若以此項銹蝕炮彈運往配用甚  
合出陳易新之法合就札飭爲此札仰該參將遊擊即便  
轉飭遵照將此項銹蝕炮子酌量各臺每次演靶應

用多寡隨時運送各臺配用俟將來彙核總數報明  
補鑄歸局仍將遵辦緣由稟覆切勿遷延毋違特札

一札本標

中右

二營

道光十五年二月

初九

日

蕉門海口炮小兵單札飭右營遊擊議覆稿

爲札飭議覆事照得蕉門海口外達大洋內通省會  
爲商漁船隻出入口門亦外夷脚船及走私快蟹往  
來捷徑前因海氛未靖於嘉慶十七年建臺設守添  
製炮火在於右營內派撥弁兵專司守禦上年冬月  
本軍門親臨察勘該處水面量寬二百八十丈零中  
泓深處計寬一百二十餘丈大汐測水均在二丈以  
外大小商船往來無滯誠慮夷船由此竄越亟應設  
法籌防查蕉門炮臺止設防臺外委一員防兵二十

六名安貯一千五百斤炮二位一千二百斤炮四位  
一千斤炮八位雖該處水面不甚寬濶然海口要隘  
砲小兵單若不預爲籌備殊非慎重海防之道其應  
如何添備之處合行飭議爲此札仰該署遊擊悉心  
妥議或抽換大炮數門或選派得力弁兵務使預備  
於事先免致疎虞於日後通盤籌計妥議呈覆以憑  
確核毋違毋忽特札

一札本標右營遊擊

道光十五年二月初九日

通行各營趕購硝磺配造火藥以實儲備稿

為

咨請通飭水師各營札行

趕購道光十四年分歲需硝

磺乘時配造以實儲備事竊查水師營分巡查海面  
防守炮臺能致遠於汪洋攻堅於口岸全恃鎗炮是  
以定制無論大小營分均照歲需火藥數目儲備四  
年或五年者出陳貯新有備無患法至善也昨承

貴

督部堂以火藥欠精通飭水陸各營加工製造務令

力能致遠業已一體通飭各營照造在案本軍門復  
查儲備火藥例應實在局雖間墊歲需止准暫挪

十之一二歲需火藥卽於本年配造歸還庶陳陳相  
因足資緩急茲查水師鎮協各營上年冬季呈報遵  
文購買者均係十三年分歲需硝磺卽使趕緊配造  
必須本年秋季方克完工計儲備項下目前已墊去  
十分之六若夏季雨水稍多造藥更難迅速墊用愈  
多儲備益少於海疆營分大有關係除

通飭水師各  
營會督部

營

堂轉飭

藩司札飭理事同知核明現在存局硝磺

以便各營購買外

合就

咨移札飭爲此合咨貴鎮請煩轉

札仰該營照依事  
理飭遵照卽將領存十四年分歲需硝磺銀兩備具批

文派弁赴省購運回營接續配造其領存十五年硝磺銀兩務於年底一律購足回營精工煉製以實儲

備

外合就咨會爲此合咨  
施行毋違

貴部堂請煩查照一體飭催並祈轉飭藩司札飭理事同知核明現在存局硝磺以便各營購領施行

一咨 督院 一咨 四鎮

一札香山協 順德協 新會營 大鵬營

本標中軍

道光十五年二月 二十二 日





籌海初集目錄

卷之二

會奏籌議增建炮臺添鑄炮位摺

總督主稿

札飭各營官弁練習技藝振作自新稿

恭錄

上諭札行各營練習弓力稿

嚴懲任性妄爲之外委以儆刁風稿

儋州營添改水師官兵分管洋面籌議章程稿

新建炮臺籌添防兵抽撥炮位稿

風聞夷船在洋遭風被搶委弁查拿賊犯稿

派員四出兜拿槍犯稿

加派龍門千總吳廷珍馳赴雷瓊設法會緝稿

勘定失事洋面飛飭嚴緝稿

委員署守備周國英訪悉匪踪贓銀稿

據稟新鑄大砲須用石船運送並催鑄連環炮

子稿

新建炮臺籌議抽撥防兵咨商稿

籌議虎門新舊炮臺仍需添鑄新炮二十二尊

稿

沿海窮民每遇遭風船隻硬行拆搶情形咨復

稿

防範外夷巡船出示曉諭防臺弁兵函商稿

札飭中右將備示諭各臺弁兵稿

委員周國英緝獲搬搶夷船正盜真賊稿

委員獲犯獲賊請飭司嚴訊稿

緝獲正盜真賊咨行鎮營上緊跟拿各犯稿

批署中營守備曾應元稿

全書卷之二  
批署陽江中軍遊擊楊德雄稿

委員周國英等續獲賊盜咨稿

崙弁密拿寄賊犯人黃有廣札稿

批署遊擊楊德雄稟

批護廣海寨遊擊周弼稟

虎門海口風潮暴作淹漫田禾稿

籌議提鎮各標抽兵七十名添防新建炮臺稿

據稟引線拿賊轉遭波累咨請察釋稿

札委署中營守備曾應元馳赴雷瓊督緝稿

委員追獲寄賊犯人呈繳洋銀咨請訊釋稿

劄新安縣核案摘釋武生黃大英稿

委員周國英遭風覆船淹斃船戶幼女稿

南澳鎮請補千總於例未符咨請駁飭稿

犯供贓銀顯有不實札飭楊署將會縣設法追

繳稿

拔補千總李英隆撤委另選考拔咨稿

札右營遊擊選弁防臺挑考糧缺稿

札飭防弁整飭器械稿



會奏籌議增建炮臺添鑄炮位摺

總督主稿

兩廣總督臣盧坤  
水師提督臣關天培跪

奏爲查勘虎門海口炮臺籌議增建修改添鑄炮位事  
宜分別興辦恭摺具

奏仰祈

聖鑒事竊臣盧坤上年會奏嘆咭喇兵船押逐出口一摺  
欽奉

上諭沿海各處炮臺著該督於校閱營伍時親往虎門一  
帶逐加查勘如有應行更定事宜務當悉心妥議總期

有備無患方足以壯聲威而資防禦其營務海防一切章程俟新任提督關天培到粵後該督等會同籌商設法整飭力除怠玩積習俾該將弁等有勇知方悉成勁旅等因欽此

臣

盧坤當卽欽遵於上年十月校閱中路

營伍時由虎門乘坐海船會同陸路提督曾勝帶同署水師提標中軍叅將余清等親至各炮臺逐加查勘查虎門海口爲外洋至省城中路咽喉其水道自東而西向在南北兩邊傍山建築炮臺以沙角大角兩炮臺爲第一重門戶南山鎮遠橫檔三處炮臺爲



第二重門戶大虎炮臺爲第三重門戶層層控制本屬得宜因大角沙角兩炮臺中隔海面一千數百丈本在大洋之中遙遙相望現在山脚又漲有沙塗船隻經由離臺甚遠兩邊炮火均不能得力惟鎮遠橫檔兩炮臺南北斜峙南山炮臺在鎮遠迤東形如品字錯綜布置中隔水面止三百餘丈形勢適緊聯絡當飭署叅將余清等在橫檔試放大炮炮子正及海面中泓實爲扼要大虎炮臺海面雖濶從臺脚測量至九十八丈以外卽係暗沙淺水不能行船惟恐潮

汐大汎沙面水勢加深只須於暗沙釘立木椿則水大時船隻亦不能經由沙面行駛總在離臺一百丈之內炮火亦屬得勢惟南山炮臺地勢過高炮子易於冒出船頂其橫檔鎮遠南山大虎各炮臺原建墻垛亦均單薄炮洞過大不足以資捍蔽又勘得橫檔大虎山後另有海道可以繞出各炮臺之後直達獅子洋而入內河從前以該處向有淺沙船隻不從此行走並未設立炮臺臣委員測量該一帶海道現在水深四丈有餘儘可行船設船隻由此處繞道行駛

則橫檔等處炮臺均無從攔阻未便以向不設備致  
滋踈漏查該處南係蘆灣山北卽橫檔山背面應在  
兩山之麓各建炮臺則前後左右四面周匝惟時

臣

關天培尙未到粵

臣

盧坤與曾勝勘畢轉回因思海

中潮汐往來水勢長落不同炮火高低卽異必須演  
試確實查有署督標右營叅將洪發科於軍火事宜  
最爲熟諳隨調委該署叅將會同奈清前往將橫檔  
等處炮位於潮長時演放一次潮退時又演一次以  
舊船停泊海面中泓作標試驗炮子均能打及船身

但五千斤以下炮位炮子及遠自一百餘丈至二三百丈不等力量尙薄必須六千斤以上大炮方能致遠摧堅各炮臺舊存炮位六千斤以上者甚少且多銹蝕易於炸裂不堪施用此臣盧坤查勘海口炮臺及派員演試炮位之情形也臣關天培到任後卽前赴各炮臺履勘情形相同隨會同籌議海口防堵以炮位爲第一要件各炮臺舊存之砲不足濟用省城存貯舊炮亦多係銹爛無可更換應添鑄六千斤大炮二十位八千斤大炮二十位俟鑄成後酌派各臺

應用其大角沙角二處止堪作爲報信望臺舊設炮位除留放信炮之外其餘均移至新建各臺配搭安放以歸核實其南山炮臺應於前面餘地添築石基建設月臺一座將炮位移設月臺與橫檔鎮遠各臺高低相等併將各炮臺墻堞修築堅厚炮洞造高改小並於橫檔背面山麓及對岸蘆灣山脚各添建炮臺一座安設炮位派撥弁兵防守庶船隻不能繞越防範益加周密惟查外洋入口船隻乘潮駛風其行迅疾又在海浪之中船身上落無定弁兵放炮轟擊

往往一炮不中趕裝二炮船已去遠以致攔阻不及  
必須妥定章程以期有備無患復詳加酌議嗣後虎  
門海口以沙角大角兩處爲瞭望報信之臺其南山  
炮臺起至大虎炮臺分爲三段每段將砲位分上中  
下三路較準安放每出三炮齊發遇應行防堵之時  
沙角大角兩處先放信炮知會南山等處弁兵整備  
炮火等候俟船隻駛至第一段南山炮臺先放大炮  
三出接連九炮至第二段則鎮遠橫檔與南山三面  
對準每臺接連九炮一齊轟擊如至第三段大虎炮

臺亦接連九炮如此連環轟擊三路交攻即使有盜艘番舶乘風駕駛亦必立時碎裂此籌議添設海口炮臺炮位及聯絡轟擊之章程也以上添鑄大炮四十位經臣盧坤飭委洪發科與署廣州協都司黃廷彪購募熟諳匠人李陳霍等承造除舊炮折抵銀二千兩外實共應給價銀一萬四千八百兩責令保固三十年限內炸裂由該匠賠造其增建炮臺暨修理墻垛各事宜飭委署廣州府潘尙楫督同東莞縣知縣李繩先等傳匠逐一樽節估計連鑄造炮子約共

需銀五萬二千兩有奇此項經費據粵海關衆商以防夷要工伊等情願捐辦經監督彭年咨會該商等公議於每年行用酌提羨餘分三年呈繳請於藩庫先行動墊俟收繳捐項按年解還歸款察核商情極爲真切臣盧坤飭令署藩司李恩繹於司庫雜款陸續動支給領興工第設守固宜扼要防禦尤貴得人必須平日操練有方以期臨時施放得力營務與海防相爲表裏臣等現委洪發科與余清將各炮臺聯絡轟擊之法教導水師弁兵預先練習務期一律純



熟俾臨事不致慌張臣關天培仰沐

天恩簡任水師提督駐劄虎門海防係屬專責惟有督率  
練兵力除積習並照新定章程遇有外夷兵船在洋  
停泊卽督帶舟師與各炮臺水陸協力巡防臣盧坤  
隨時查察商辦協力整飭以期仰副

皇上慎重海防至意所有勘辦情形理合會同

廣東巡撫臣祁墳合詞恭摺具

奏並將各炮臺情形繪圖貼說恭呈

御覽伏乞

皇上聖鑒訓示此案工程商捐商辦請免報銷合併陳明

謹

奏

道光十五年二月二十九日

道光十五年五月十九日奉到

硃批所議周妥之至務須練習精熟方能得力震懾羣夷

也另有旨欽此同日奉到道光十五年四月十四日內

閣奉

上諭盧坤等奏查勘虎門海口炮臺籌議增建修改添鑄

炮位分別興辦一摺廣東沿海各處炮臺前降旨着盧坤於查閱營伍時親往查勘並將營務海防各事宜會同關天培籌議整飭茲據該督等奏稱遵赴虎門一帶逐加查勘並於潮汐長落時演試炮位請添鑄六千斤以上大炮四十位配派各臺應用並將南山炮臺前面餘地添築石基建設月臺移置炮位橫櫛背面山麓及對岸蘆灣山脚各添建炮臺一座其沙角大角兩處爲瞭望報信之臺其南山炮臺起至大虎炮臺分作三段遇有應行防堵之時一聞信炮卽將較準上中下三路

炮位齊發轟擊所議周妥之至著照所請辦理其添鑄六千觔大炮二十位八千觔大炮二十位准其僱募工匠承造責限保固除舊炮折抵外實共應給價銀一萬四千八百兩並增建炮臺修理墻堞鑄造炮子共需銀五萬二千兩有奇均準令粵海關商人捐辦先於司庫雜款內陸續動支給領興工仍俟收繳捐項按分三年解還歸款惟設守固宜扼要防禦尤貴得人平日操練有方則臨時施放自能得力該督等總當諄飭派委各員將各炮臺聯絡轟擊之法教導水師弁兵務須練習

精熟方能得力震懾羣夷也又另片奏請於省城東十五里中流沙地方建設炮臺以爲省城保障等語所辦甚好著俟虎門海口炮臺工竣後卽行興辦所估需工料銀七千兩零亦准衆商一律捐辦此案工程均係商辦著免其造冊報銷該部知道欽此



札飭各營官弁練習技藝振作自新稿

爲諄切札飭認真練習以圖上進以保功名事照得  
廣東地處邊陲海洋遼濶虎門建帥設立重兵仰沐  
皇恩官則與以章服之榮俸廉之給兵則月支銀米風雨

無虧凡屬官兵均當感激奮興力圖報効庶得上酬  
國恩下伸己志本軍門蒞任以來留心察看積習因循

廢弛已極除操練兵技防守炮臺演試炮準製造火

藥等件業均行知各營遵照在案昨據

該中軍  
中軍參將

挑選

弁兵送考中營把總外委二缺經本軍門親詣教場

秉公考選內左營外委廖鎮邦五箭全空弓止四力  
右營外委何瓊箭不到靶弓止三力程亮陞弓止三  
力中營外委譚芳架式稍可弓僅四力段振高架式  
平常弓止三力周大麟馬步不堪弓止四力樊耀陞  
弓止四力額外劉成堂馬射不堪弓止三力朱朝鳳  
弓止三力陳建陞馬步均可弓止四力王錦洲僅中  
一矢弓止三力盧熊弓止三力李亮馬步架式均可  
弓止三力查官兵射箭步弓定例六力馬弓定例三  
力能於八力十力十二力弓勁有準者自當破格獎



拔今該中軍挑選考拔之弁弓力軟弱大違定例步  
箭準頭不設分數且架式不堪者多選送之弁尙且  
如此其未經挑入者又不知是何形狀溺職辜

恩莫此爲甚本應立掛彈章以警聾聵第本軍門蒞任未

久不忍不教而誅姑寬一月勒限練習以觀後效如

不改觀定當叅辦

札仰該署叅將移行中左右三營  
除札署中軍移行中左右三營

遵照振刷精神嚴行督率務使各官兵弓馬一律精  
純雖馬步兵丁弓力均遵定例以六力爲合式準頭  
均要在六分以上俟一月後本軍門隨時抽閱如仍

前疲軟除將該弁兵立即責革該管將領督率不力  
定照溺職例嚴行叅辦海疆要地斷不容有尸位之  
官有倫無虞豈肯留此等技疎之弁本軍門先教後  
懲佇望該官弁振作自新毋貽後悔

凜之切切毋違  
外札仰該營轉

行一體遵照將選練備戰兵冊造送聽候抽調考驗

毋違

一行本標中軍

本標前營

香山協

前山營  
大鵬營

新會營

順德協

道光十五年三月

初一日

恭錄

上諭札行各營練習弓力稿

爲札遵事案查道光十一年九月內奉

上諭富俊奏請覈實操演一摺國家額設兵丁必須平日勤加訓練使知激勸方足以成勁旅而資捍衛前經降旨訓諭各都統等於挑選披甲時均以弓箭爲重茲據富俊奏八旗定例向係開六力弓近日仍用本人弓射箭往往以二三四力虛報六力似此相習成風兵力日漸軟弱於武備大有關係自應嚴加考覈著照所請嗣

後八旗各營凡挑缺揀選均遵定例用六力官弓校射以定去取富俊所管鑲紅旗滿洲據奏置有六力八力弓各二張弓制一分月月挑缺揀選均以制準官弓校射如有告拉八力弓者若果裕如卽以八力弓爲合式每次挑選並不乏人可見我八旗原知向上總在教訓何如耳至八旗各營均有公費銀兩不難置辦官弓著卽倣照辦理該都統務當認真覈實考驗不得仍令本人捏報弓力日久視爲具文以致有名無實並著查旂御史於各旂挑缺時留心查察如該都統等意涉瞻徇

所挑之兵仍有虛報弓力情弊卽據實嚴叅其各省駐防挑缺時並著該將軍等一體遵照均用六力弓爲準以符定例而重武備將此通諭知之欽此恭讀之下仰

見

皇上注意戎行修明武備凡屬營中弁兵均應凜遵

聖訓精勤練習務使挽強命中悉成勁旅方謂無忝厥職昨本軍門考拔弁兵各缺內弓力軟弱不滿六力者多並有步弓僅能四力者似此任意因循皆由該管將備徇情姑息不加訓練所致業經嚴行札飭嗣後

步弓限以六力馬弓限以三力以遵定例如弁兵中  
弓力再有不足者卽行斥革在案但積習已深若不  
三令五申轉失本軍門愛人本意合行恭錄

上諭再三札飭札仰該

叅將遊擊

卽便通飭所屬弁兵振刷精

神勤加練習步弓均以六力爲準以符定例如弁兵  
中能有開射八力十力十二力者果能從容有準定  
卽從優擢拔倘弓力仍前軟弱定卽從重責革該將  
備等教練不力均干叅究凜之毋違特札

道光十五年三月十五日一札本標中左右三營

嚴懲任性矣爲之外委以倣刁風稿

本年四月二十二日據

倣

標左營外委陳炳烜稟稱

爲以術制人朋謀抑勒假公濟私無從緝捕懇請核辦更正以重地方而肅利弊等情並呈左營輿圖一幅汎兵名摺一扣新安誌書一本又牌文九件核其情節該弁因道光十一年十二月內有事主何廣清被竊拒傷何蔡氏一案據稱經前令張德馨會同把總倪應龍勘歸前營承緝迨前營稟推奉文再勘經該弁親往會勘嗣因日久案未破獲前閣部堂李令

將汎弁梁光照陳炳烜擗頂限緝續據把總梁光照  
獲犯麥錦大一名又獲另案匪犯鄧亞言等十八名  
經署遊擊陳超倫稟奉前閣部堂准將梁光照賞還  
頂戴查本案自失事之日起該弁委業將疎防及二  
三叅職名按限開送奉部議覆毫無屈抑迺該弁承  
緝此案三載有餘未獲一賊迨奉部議革頂忽以並  
未奉文開叅具稟且以親自會勘之案謂爲夤緣瞞  
推又以奸吏借銀兵不在汎摘湊成言牽涉雜事不  
獨錯字連篇抑且措詞悖謬卷查該弁原名陳英材



於道光元年拔補左營外委道光二年八月經前提督以該弁人本平庸巡緝疎懈斥革在案旋又更名陳炳烜復入右營道光六年拔補外委道光十年八月內以派委不均汛防多廢等情越稟前閣部堂並前任提督飭據該營遊擊稟復有案十一年九月又以賞罰不明營房廢壞等情疊次越訴奉前護督部堂朱並前提督李札委前署叅將秦裕昌查屬捏詞稟覆亦在案道光十二年又以委員勘拿督捕剪除兇匪等情越稟前署提督譚批駁在案是陳炳烜以

更名復充微弁不守營規動輒越訴顯係不安本分  
若因其健訟立予斥革恐不足以折服其心况所稟  
情節有關廢弛虛實均應核辦當卽札委護後營遊  
擊姚夢鵬先赴各汛密查然後再至新安確核稟覆  
以憑分別辦理去後該弁陳炳烜因先奉文抽調於  
四月二十七日帶兵來虎候考教弟卽於二十八日  
親赴教場考驗得陳炳烜軟弱技疎步箭全不到靶  
教場爲官兵矚目之地因卽當場責革復押回署詢  
以何廣清一案旣係親身會勘有何抑屈所謂囑託

者何人夤緣者何事把總梁光照同奉摘頂代嵩汎  
之千總林騰鶴亦奉議處如有委屈何以均無一言  
又所稱丁壯掛名老弱糜餉狡吏包兵有兵無技等  
句既列入印稟必應確指其人方能查辦逐層詰詢  
該革弁含糊應答總未指明並將所呈牌文九件挨  
件盤問竟至無可措辯復詢以此次稟帖是否自撰  
抑係倩代據稱稍知文墨及詢以稟中所稱卽如連  
州之患一節均是自撰否該革弁始尙支吾繼則吐  
實委係摘湊成文託人代做等語似此謬妄糊塗未

便因已經斥革稍事姑容卽當堂貫耳遊示通衢以儆刁風拔箭後卽委署守備周國英將陳炳烜押交該營守備追繳鈐記委牌再行送縣管押聽候核辦去後是日午後接據護左營遊擊曾國安稟據外委陳炳烜稟稱以術制人朋謀抑勒欺圖包兵無從緝捕懇請核辦以重地方等情當卽轉行查覆茲據守備林騰鶴查明稟覆署遊擊委查的確該外委總不安分未便姑容合將原稟及委查緣由稟明察核等情據此茲據護後營遊擊姚夢鷗稟稱遵札前往密

訪明查分晰稟覆並據面稟據左營將備弁委咸稱  
陳炳烜所稟各情實係謬妄情願各具印結如查有  
前項情弊願干叅革等語併將各印結一併呈送前  
來教弟悉心細核查覆情節尙無徇飾惟是陳炳烜  
以微末武弁任性妄爲每遇失察案件並不認真緝  
捕動輒以營房廢壞兵不在汛屢屢捏詞越稟預存  
推諉叅罰地步而又摘湊成言強作解事此次竟以  
大不敬之言列諸印稟其謬妄糊塗已可槩見若以  
措詞悖謬斥革原不足以蔽辜然究因不明文意以

致自蹈網羅愚而自用情屬可原愚見敬請飭縣將  
陳炳烜嚴加管束俾知所畏懼以免日後再生事端  
至守脩林騰鶴於下行牌文遺漏用印實屬疎忽應  
記大過一次經手字識黃逢春黃懷飭令各責二十  
棍以示儆戒其各汛毋倒管房另請飭縣辦理再陳  
炳烜任性妄爲已非一次原應咨請嚴辦但當場考  
驗五箭全不到靶又未便稍寬是卽立行責革咨明  
在案茲已逐細查明分別懲辦合將陳炳烜原稟並  
護左營遊擊曾國安護後營遊擊姚夢鷗各稟並摺

一併錄送鈞電惟

教弟

武夫未嫻例案辦理輕重恐

難妥洽尙祈衡奪示遵或仍須繕用印文亦祈

賜示以便備咨

冰案虔此奉

聞

云云

道光十五年 五月

十四 日





儋州營添改水師官兵分管洋面籌議章程稿

查瓊州一郡屹立海中與海安對峙南屬崖州東則萬州西屬儋州北則瓊州而瓊山文昌樂會陵水昌化會同感恩臨高定安澄邁十縣三州一府四圍分治環繞熟黎熟黎又環繞生黎生黎則環居於五指嶺七指山計週圍陸路一千五百餘里由府城中路直穿黎心南至崖州五百五十餘里萬州東路直穿黎心五百九十里而至儋州至於武職則有瓊州鎮督率左右二營額設陸路官兵一千七百餘員名鎮

守於北崖州副將陸路官兵八百數十名協守於南  
東有萬州營遊擊陸路官兵七百數十名西有儋州  
營遊擊陸路官兵七百數十名仍有崖州海口兩營  
水師官兵分巡海面爲之聲援黎人守法則水陸分  
途各司其事設有滋擾水師官兵均聽鎮道調用是  
防黎聲威已極週密獨海面巡防尙稍疎略瓊州  
沿海水程二千二百餘里若照四至交界計之則海  
面週圍卽有二千六七百里崖州水師僅守備一營  
步守兵二百六十八名專管炮臺六處管駕大小船

四隻巡防海面一千三四百里又海口水師叅將一營額兵九百六十二名專管大小炮臺九處管駕大小師船十一隻專巡一千二三百里海面實屬洋廣兵單鞭長莫及卷查歷任瓊州鎮道議請添設官兵巡船併歸儋州營管轄自係因地制宜勘商妥善斷非止顧巡海而置防黎於不問也茲陸路提軍以爲斷不可改不爲無見第儋州守備管轄兵馬錢糧及闔營公務左哨千總分防臨高縣地方並無協防若均改爲水師輪巡期內實難兼顧所慮誠是自可毋

庸議改若僅以儋州遊擊兼轄水師並不巡洋則毫無窒礙至於新英港南北炮臺石牌港炮臺並博頓英潮二汛原派把總二員外委三員步守兵一百七十名專防臺汛口岸地方所謂緊嚴外戶者此也茲議將前項官兵改爲水師若卽令其駕船出洋不顧臺汛於沿海要區誠屬可慮但瓊州鎮道原議因崖州海口水師兩營接界之新英港一帶洋面距崖州七百餘里距海口六百餘里加以該處淺沙重疊師船笨大不能收泊必須改設水師添造中號快船四

隻配官四員配兵一百四十四名專巡該處三百餘里洋面使崖州海口聲勢通聯不獨有益於海防而防黎之聲威更著若請設水師專營則經費浩大不若因地變通則易於佈置所議頗屬得宜惟與陸路營分稍有未週亟應籌計昨崖州協因水師弁兵巡船不敷呈請添撥已咨鎮議覆現在提標中右後三營改建南山月臺添造橫檔山後及蘆灣二沙尾三處炮臺查中後二營弁兵尙可勻派而右營必須添撥本提督通盤核慮應請將儋州一營作爲儋州水

師仍歸儋州遊擊兼轄瓊州鎮統轄抽撥陽江鎮標  
左營千總一員龍門左右營外委各一員於通省水  
師各營內抽撥兵一百七十名內撥給提標右營兵  
五十名分防新造炮臺其餘兵一百二十名撥歸儋  
州新添水師卽於此項兵內選拔額外二員再撥出  
海口營大米艇一隻撥海安營大米艇一隻中米艇  
一隻發交承辦衙門變出例價提銀八千二百兩造  
撈繪船五隻內撥還海安營二隻撥還海口營一隻  
撥給崖州營二隻仍餘銀四千一百七十餘兩造中

號快船四隻每船配兵三十名歸儋州添設水師營  
配巡其崖州協所請增添弁兵現實無可抽撥可否  
以該協所屬陸路兵內撥防水師炮臺六處將原防  
炮臺水兵撥回更替巡防卽於所撥兵內選拔額外  
二員不過一轉移間水陸各得其宜亦毋庸另籌經  
費至新英等港五臺汛改爲水師其原設弁兵與新  
添千總一員外委二員又額外二員兵一百二十名  
計共設千總一員把總二員外委五員額外二員共  
兵二百九十名請分爲上下班巡緝上班則以千總

一員爲分巡外委二員額外一員爲隨巡下班則以把總一員爲分巡外委二員額外一員爲隨巡上班存汛則有把總二員外委三員額外一員下班存營則有千總一員把總一員外委三員額外一員以之分防臺汛尙屬有餘議以千總專管營務把總外委額外分防臺汛較之原防弁兵不少一人於防海防黎兩有裨益如准所議則海邊防臺巡洋定爲水師專責而內地守汛防黎則責在陸路庶事有耑司兩無推諉該遊擊兼管兩營居中調度似此水陸相聯



一切均臻妥善矣再移駐水師千總應建衙署及軍火庫局各事宜又儋州陸路弁兵改爲水師能否不畏風濤應候貴部堂核定後再行咨鎮飭議以期覈實本提督謬議恐有未週尙祈衡奪施行

道光十五年五月 二十四 日



新建炮臺籌添防兵抽撥炮位稿

別後回署卽商同將備擬將新鑄大炮分置南山月臺十六位分置鎮遠十二位分置橫櫓月臺十二位緣南山新建月臺正面寬大形勢得力而鎮遠橫櫓品字相聯兩面夾擊亦得扼要之勢是以議將新鑄大炮四十位全行分置得力之臺其南山除添置新炮十六位又該處原存堪用炮十位此外仍少炮十四位卽將沙角撤回炮三位並鎮遠換下舊炮十一位運往南山分置月臺已敷配用至南山舊臺原派

防臺兵三十名今改建寬大月臺安炮四十位仍應添兵三十名除沙角炮臺撥回兵十名仍不敷兵二十名擬以存營鎗兵內挑選抽撥亦可敷用惟橫檔山背及蘆灣山脚新建炮臺二座需炮六十位應配兵一百名查橫檔月臺添配新鑄大砲十二位換下舊炮十二位內除五千觔一位殘損不堪配用計餘炮十一位又大角炮臺抽回炮七位再將橫檔舊炮臺原設大小炮內挑選二十二位共炮四十位計仍少炮二十位現於虎門存局炮內逐細挑選自一千

二百觔起至八百觔止共挑出炮二十位計已湊成  
炮六十位俟新建炮臺工竣即可勻配安設又大虎  
炮臺原設大炮三十二位防兵五十名該炮臺建在  
南山橫檔鎮遠之北原貯炮內自七千觔起至三千  
觔止已有大炮十五位此內查有五千觔炮一位四  
千觔炮一位均有殘損不堪配用應請更換又新建  
橫檔山背及蘆灣山脚兩臺抽挪大小炮位雖已如  
數似須添撥四五千觔大炮四位分置兩臺更覺得  
力查各臺大炮均關扼要未便抽撥而虎門炮局又

無此項大炮擬請於省局內抽撥五千觔大炮四位  
四千觔大炮二位內以五千觔二位撥補大虎炮臺  
其餘四位分配新建兩臺則海口聲威益資雄壯矣  
至新建兩臺應添兵一百名內除大角炮臺抽回兵  
三十名仍不敷兵七十名查右營汎廣船多碍難抽  
撥應請將新建之橫櫓山後炮臺少派兵二十名請  
派弁一員防兵四十名該臺安炮四十位原不敷用  
第橫櫓山前後兩座炮臺相離不遠兩臺弁兵同係  
右營若均歸橫櫓千總兼轄則可往來接應緣此時

抽撥維艱不得不通融辦理如荷照議少派兵二十名計仍不敷兵五十名應請於通省水師各營酌量抽撥或緩俟籌改儋州水師營弁兵案內一併議撥之處均俟衡奪云云

道光十五年 六月 初六 日





風聞夷船在洋遭風被搶委弁查拿賊犯稿

昨聞萬山外洋有夷船遭風淹斃多命併遭搶掠洋銀貨物之事當卽密委署中營守備會應元赶往確查茲據該備覆稱查得本月初六日有暎夷呖貨船一隻由外洋收針將近萬山洋面適遇暴風打斷桅樑擊傷船隻淹斃多人初八日風浪稍息該船夷人招倩蝦罟拖船十四隻幫同拖帶不意各漁戶因見夷船人數無多忽起歹心搶去洋銀貨物等件紛紛逃散該夷船被搶後於本月十三日駛抵金星門洋

面拋泊等語聞之殊深詫異查萬山洋面係香山大鵬接壤有東西炮臺分駐兩營弁兵瞭望防守兩營師船往來巡緝各有專司何以迄今數日兩營將弁毫無見聞且經教弟委員查覆而兩營尙無隻字稟聞實不可解事關外夷貨船遭風被搶被傷案情重大無論已否報案亟應飛速嚴拿庶不致盜逸賊消除發銀二百兩立飭署守備會應元趕往香山會商秦副將卽刻就近查明此項不法拖船形跡購覓妥線僱備民拖船十隻挑派勇幹官兵配足軍火追蹤

勒緝並飛札香山大鵬兩營設法會拿並做標中左  
右三營一體協拿倘逾限無獲卽將失察各員弁職  
名咨請

奏辦除專致各鎮外仍祈核示遵行云

云

道光十五年 六月 十六 日



派員四出兜拿搶犯稿

本月十七日早差至連奉鈞函承示舉核之案刻已核實彙辦仰見鑑別嚴明欽佩曷極夷船劫案囑爲兜拿迅獲巨魁懲辦原贓給領等因昨者一聞此信卽專委署守備曾應元赶往確查十六日黎明據曾應元來署稟覆卽飭赶往香山會商秦副將購線追踪飛速嚴拿並恐營船易爲匪徒所識發去銀兩令僱民船多購眼線選派勤幹官兵上緊兜拿一面專札香山大鵬做標中左右三營一體嚴拿又慮該匪

等得贓甚鉅恐其四散潛逃並飛咨陽江瓊州碣石  
南澳四鎮各於所轄境內嚴密偵查如有形跡可疑  
之船卽行拿究復又發銀一百兩崇札做標署右營  
守備周國英挑選幹弁改裝分赴各漁船聚集之所  
偵查盜踪一得確信卽持札密會文武協力兜拿務  
使人贓並獲解省究辦俟各處覆到當再隨時飛布

云云

道光十五年六月 十七 日

加派龍門千總吳廷珍馳赴雷瓊設法會緝稿

本月十七日肅復一函計早上邀台覽十九日祇奉  
鈞函敬聆一切正擬布覆間頃接香山秦副將來稟  
並抄錄夷人在澳門同知處據報情節知此案係在  
香山隣近廣海洋面細閱前次來函據洋商伍紹榮  
代稟失事處所就近澳門西南邊帽石處之語細閱  
洋圖內止有番鬼帽名目係一小山在廣海洋面係  
陽江地方山海交錯其大嶽山上下川及海陵等處  
爲商鹽漁蛋聚集之所該夷訴詞內係六月十一日

船到陽江海陵司及新寧縣上川司之間被漁匪搶劫則失事係在廣海洋面可憑除再飛咨陽江何鎮軍就近督屬設法勒緝並勒限署廣海寨遊擊周弼趕緊緝拿去後復思該漁匪等人數衆多驟得鉅贖斷不敢仍匿本境勢必挾贖分散或潛逃濶洲一帶或越境逃往夷洋均未可定况聞新寧縣拖漁船隻向年常往西路捕魚越南夷洋等處皆所熟悉更不可不四路兜捕免致盜逸贖消至所劫洋銀數萬諒係新鑄必與市用之爛板不同况所劫均係夷貨亦



易認識除再飛咨東路碣石南澳西路瓊州陽江各鎮分別專緝會拿並復通飭各營外適龍門左營千總吳廷珍投考甄別前來詢以瓊屬洋面情形對答頗爲明晰驗其弓馬年力堪以留任此時應暫緩咨送卽經專札龍門海口兩營將領並先發洋銀一百圓飭其星夜趕回會同護都司龐貫超署海口守備王鵬年就近僱募本境捕魚船隻購覓勇壯明白漁人分投截拿至香山秦副將素稱能事此案雖據稟稱係屬陽江而香山係其接界現亦札飭一體設法

會拿能卽弋獲正盜眞贓當另請

奏保也餘容隨時續布云云

道光十五年六月 二十一日

勘定失事洋面飛飭嚴緝稿

爲飛

札

飭拿事查夷船遭風被搶一案先經本軍門

訪聞在萬山外洋當卽發銀密委署中營守備會應  
元署右營守備周國英等分投購緝並疊次移行各  
鎮協營堵拿茲龍門協左營千總吳廷珍投考甄別  
來轅又發銀一百圓專差該千總赶往濶洲一帶訪  
緝並札龍門協海口營遵照嚴密追拿在案但被劫  
處據稱在澳門西南邊帽石處殊屬含混茲據委員  
查明該夷人已在澳門同知處呈報在新寧縣海陵

司地方查帽石處卽是廣海境內之番鬼帽洋面已屬確實夷船被劫非尋常盜案可比何以該營迄無隻字稟報合再飛咨 貴鎮煩爲督飭該營員弁立札嚴飭札到該署遊擊振作精神卽購線追拿限十日內無論員弁兵丁如能獲賊獲贓本軍門不獨免其叅處定當會銜從優保

奏倘敢因循掩飾致令匪犯遠颺賊逸贓消定干叅辦

不貸仍將如何設法追拿情形星飛見覆施行稟報察核

一 咨陽江鎮 一行廣海寨

道光十五年六月 二十二 日

委員署守備周國英訪悉匪踪贓銀稿

本月二十六日據委緝盜案署右營守備周國英稟稱署備遵奉憲札發給川銀卽帶同把總區廷璋等改裝赴洋先由福永固戍大王洲一帶細密偵緝並無確跡二十日趕至平洲地方訪有釣艇蛋民黎得有於本月十五日身帶新鑄洋錢數十圓在平洲購買什物訪聞該蛋民黎得有素日慣做夷船帶水署備卽於二十一日跟踪追至長洲地方會遇大鵬右營署把總鄭榮高分投密緝訪據該處舖戶云稱十

六日黎得有用新洋銀百圓在墟取買綢緞等物現  
已他往署脩卽帶同把總區廷璋鄭榮高添僱拖船  
於二十二日至佛堂門量船灣等處訪悉黎得有昨  
在量船灣歸還舖賬銀百餘兩俱係新洋錢等語當  
將新洋錢易換一圓賞呈鈞鑒除趕緊追踪務獲外  
合先專差稟明等情教弟細閱所呈洋錢一圓併非  
市中所用爛板實屬可疑况蛋民黎得有以一拖漁  
之人忽有新洋錢數百圓之多卽使素常引帶夷船  
所得亦應有限其中情節顯有爲匪情事除飛飭該

署備迅速追踪更恐該匪還賬買物之後避匿遠處  
不可稍存鬆懈並諭以無論黎得有是否正盜務期  
人銀並獲趕緊解省嚴密確訊令其供出夥匪姓名  
住址以憑易於追拿免致日久贖消除專差趕往諭  
知外先肅奉聞並將易來新洋錢一圓封送台覽云  
云

道光十五年六月 二十七日 日





據稟新鑄大炮須用石船運送並催鑄連環炮子稿  
本月二十三日接奉鈞函承以新鑄大炮現已造成  
八千觔十尊六千觔十尊於十六日親詣廠所閱驗  
均極堅實光潔甚爲得法仰見碩畫精詳知人善任  
欽感私忱曷其有極並云遇有便船赴省即可運置  
炮臺當卽面委余叅將前往鎮遠橫檔各臺查看修  
砌炮洞工程會商洪署將迅將臺面趕緊加匠修齊  
一面多覓木工攢做炮架去後茲據余叅將覆稱遵  
查橫檔鎮遠兩處炮洞現已砌成十分之七匠人甚

多惟臺面尙未鋪砌已與洪署將妥商趕緊興辦至  
新炮架雖蒙面諭尙未撥款發札似須緩俟臺面修  
砌至七八分工程炮架做成一半俾新炮到臺卽可  
借衆人夫之力一氣安置妥善等語正擬肅覆間接  
到尙副將來稟內云省中造成大炮二十尊並每位  
配造彈子四十個正擬飭夫運往河岸交出廠師船  
二隻裝送至虎據扛夫稟稱師船吃水太深不能攏  
岸且船高炮重難以上船必須撥用就近之永寧載  
石大船既能攏岸炮亦易於上船等語卑職查果屬

實統候撥船派弁來省載運等情查此項新鑄大炮感荷籌款遴員種種勞心現已鑄成一半卽應運置炮臺但據該叅將等以臺面炮架尙未修成亦屬實情卽祈籌撥炮架銀兩札飭該委員等分投購買樟木趕造炮架一面添匠修砌臺面地基容俟辦有七八分工程卽委妥弁赴省請領新炮其應用人夫石船卽請飭縣封撥再前曾囑令叅將面懇諭飭委員轉飭匠役添鑄交杯聯環炮子數百個已承慨諾亦望飭令鑄造發給備用至抽撥添配新造炮臺兵

丁刻已遵照抽添七十名容俟核撥清楚另肅奉聞  
云云

道光十五年六月 二十八 日

新建炮臺籌議抽撥防兵咨商稿

爲籌議抽撥兵丁分派配防巡緝事爲照本標右營  
新建蘆灣橫檔西炮臺二座該營原設額兵不敷撥  
配應需添設齊足以期盡善而垂永久業將酌議撥  
兵數目開摺陳明現准貴部堂函示以守臺不敷兵  
丁五十名應於各營如何派撥並希酌核示知以便  
行知各鎮協營遵辦第橫檔山後新添之臺少兵二  
十名恐不濟用或竟抽撥七十名以足額數儋州水  
師一案已經具奏所有虎門炮臺抽兵事宜俟將來

奏報炮臺落成時將添炮抽兵各事一併陳明等因查  
新建炮臺本爲整飭海防起見必須兵力齊足方資  
守禦今本標右營境內新建炮臺二座增兵七十名  
連大角炮臺抽回兵三十名共配兵一百名分臺防  
守可期得力自應照數在於水師各營內抽撥又儋  
州新添水師營應添兵一百二十名亦議於水師各  
營內抽撥共應抽兵一百九十名查廣東爲瀕海最  
要之區外海則洋面廣濶內河則港汊紛岐劫案素  
多又兼外夷商船往來絡繹處處均須官兵巡察各

營兵數歷奉抽裁現在均僅敷用但此二案旣應添設又不得不於無可裁減之中酌量抽撥茲議將儋州一案在於陽江瓊州二鎮屬各營挪撥本標右營一案在於香山東上而至南澳各營抽移查本標中營添建南山月臺本標後營添建二沙尾炮臺均在本營額兵內勻撥配防又大鵬營新改左右二營洋面廣濶兵數無多前山營專守澳門最爲扼要碣石鎮中營澄海協右營均營務衝繁達濠營東山營兵額本少龍門協左右二營崖州協水師右營均屬洋

面遼濶兵額不多順德協左右二營新會左右二營  
內河汎境寬廣以上十六營均難抽撥此外各鎮協  
營寨按照繁簡情形兵額多寡通盤核計此內海口  
營現議裁改大米艇一隻雖造回撈繪船一隻尙可  
抽兵三十名海安營現議裁改大中米艇二隻造回  
撈繪船二隻亦可抽兵三十名均尙不致短絀吳川  
營係海疆腹裏洋面甚窄可抽兵三十名陽江鎮左  
營應抽兵九名陽江鎮右營應抽兵八名碣洲營應  
抽兵八名廣海寨應抽兵五名以上陽江瓊州二鎮



屬共抽兵一百二十名卽以移撥儋州新添水師營  
配船巡緝又查南澳鎮右營雖係閩粵交界設立重  
鎮駐劄左右二營左營管轄閩洋右營管轄粵洋查  
右營額兵一千零七十六名兵數較多臺汛船隻較  
少歷年裁兵案內均未裁及似可抽兵二十名海門  
營雖船隻炮臺畧多惟額兵九百二十三名亦可抽  
兵十四名此外澄海右營碣石鎮左右二營平海營  
水師提標左前二營各抽兵五名共三十名香山左  
右二營每營抽兵三名以上提標徑轄及南澳碣石

二鎮屬共抽兵七十名卽以移撥本標右營配防新建炮臺本提督諺議如斯是否有當伏候貴部堂核示俾便移行各鎮協營寨此後遇有糧缺卽可隨時扣撥再各營所抽兵數分別步守若干合并開摺咨送請煩查照核辦施行

計送清摺一紙

一咨 督院

水師提標中營額兵一千零八十一名無庸議抽

左營額兵九百六十一名議抽步兵一名守兵四

名

右營額兵一千一百三十七名毋庸議抽

前營額兵五百八十八名議抽步兵一名守兵四名

後營額兵七百零三名無庸議抽

香山協左營額兵八百五十二名議抽步兵一名守兵二名右營額兵八百四十九名議抽步兵一名守兵二名

前山營額兵三百六十八名無庸議抽

順德協左營額兵九百八十一名右營額兵九百零  
一名均無庸議抽

新會營左營額兵八百零四名右營額兵八百零六  
名均無庸議抽

大鵬營左營額兵五百零五名右營額兵四百八十  
二名均無庸議抽

碣石鎮中營額兵八百六十六名無庸議抽左營額  
兵七百九十九名議抽步兵一名守兵四名右  
營額兵八百四十一名議抽步兵一名守兵四

名

平海營額兵六百九十二名議抽步兵一名守兵四名

南澳鎮右營額兵一千零七十六名議抽步兵十名  
守兵十名查該營步兵五百四十六名守兵五百三十名

海門營額兵九百二十三名議抽步兵三名守兵十  
一名

達濠營額兵三百七十五名無庸議抽

澄海協左營額兵六百四十九名無庸議抽右營額

兵六百四十七名議抽步兵一名守兵四名

陽江鎮左營額兵九百一十五名議抽步兵二名守

兵七名右營額兵七百八十九名議抽步兵二

名守兵六名

廣海寨額兵七百五十三名議抽步兵一名守兵四

名

吳川營額兵六百一十二名議抽步兵九名守兵二

十一名

砲洲營額兵五百六十七名議抽步兵二名守兵六  
名

東山營額兵二百九十五名無庸議抽

海口營額兵九百六十二名議抽步兵六名守兵二  
十四名查該營步兵二百三十三名守兵七百  
二十九名

龍門協左營額兵八百零七名右營額兵七百九十  
四名均無庸議抽

海安營額兵七百九十五名議抽步兵九名守兵二

十一名

崖州協水師兵二百六十八名無庸議抽

道光十五年六月二十九日



籌議虎門新舊炮臺仍需添鑄新炮二十二尊稿

六月二十五日晚差旋接奉鈞函感荷指示種種捧  
讀再三銘佩奚似夷船搶案除節次咨行各鎮協營  
上緊兜拿並勒限廣海將備督率弁兵購線分投嚴  
密偵緝刻又專弁分往陽江廣海催查務期迅獲盜  
賊以抒錦念委員周國英雖訪有影響尙未得手實  
深焦灼至儋州添改水師承示已經具奏所有虎門  
炮臺抽撥營兵刻已遵照議請增兵七十名以足額  
數並彙同儋州議添兵數一併開摺咨請衡奪另示

省局舊炮多不堪用大虎等臺既有不敷現擬添製此番整飭海防必須處處周密橫嶺山後各臺必須添補炮位卽核實一氣鑄造斷不可稍有將就致臨事不能得力總以各臺弁兵炮位一律齊足毫髮無遺方爲盡善等云仰見防邊籌海無微不至建有脩之鴻勳垂無疆之駿業載欣載頌感佩莫名當與余參將查照前送分撥各臺炮位底摺逐細選擇當據余參將稟稱前奉面諭以此時經費難籌令將大小炮位凡可施放者全行挑配新臺務期足數斷不可

以細碎之事常累煩心等論是以卑職遵照演試如數挑足六十門其中實有不能得力者二十餘門卽橫檔大臺所存俱係久不使用之炮前次演試止用藥六成不敢裝足均已隨時面稟可否將大虎不堪用之五千觔四千觔土鑄炮二位添鑄六千觔新炮二位以補其缺至新建橫檔後及蘆灣兩臺前擬摺內本有七百觔炮一位八百觔炮九位九百觔炮二位一千觔炮十位均不得力又前擬撥橫檔二千觔炮四位一千五百觔炮四位以上八位均係嘉慶十

四年土鑄鉄未提淨去年署提憲演試炸裂者卽係此項土鑄似應一體更換等語當卽諭令余叅將親往各臺逐一查驗教弟卽親詣炮局將挑出各炮細加閱驗內七百八百九百斤者共十二位雖尙無殘損痕跡然炮位過小難期致遠其橫檔挑出二千斤炮四位又一千五百斤炮四位均係嘉慶十四年土鑄驗明炮之週身均有細碎沙眼若照數配足藥彈誠恐如前炸裂以上共炮二十位均難得力又大虎炮臺不堪用之五千四千觔炮二位應一律添鑄議

請添造六千斤炮二位撥補大虎又鑄五千斤炮六位四千斤炮八位三千斤炮六位分置橫檔山後新造兩臺此外挑配一千觔堅實炮十位卽以之安設新臺兩邊似可無庸另鑄以上共請添鑄新炮二十二位勻分各臺則弁兵膽氣益壯堪期得力矣惟是添鑄新炮經費不少應否如議添造之處尙祈衡奪謹將查明核議緣由縷晰奉聞云云

道光十五年六月 二十九 日



沿海窮民每遇遭風船隻硬行拆搶情形咨復稿  
爲咨會事准貴部堂咨開照得前因風聞西路洋面  
甚不安靜業經札查在案茲訪聞有外夷貢船在洋  
被搶賊犯內有李勝章李阿龍李朱嬌李三友舵工  
何毛先等俱係碧甲司麻西廠阿媽廟人槍有金鳳  
冠金獅洋參燕窩白米等物又本月十一二等日有  
米船一隻猪船二隻亦在洋被劫因事主央求該犯  
等退還猪六隻餘贓均被劫去之事查匪徒迭肆搶  
劫必有大夥盜匪在洋或係勾結閩匪事未可定除

照會陽江鎮據實密稟外密咨查照一體嚴查並希見覆等因到本提督准此查六月初七八日颶風大作暴雨不止卽慮洋中必有商船遭風斷桅走漏擊沉擱淺等事查此項遭風船隻一經打至海岸或淺擱山根或斷桅折纜行止不能自由者卽招呼沿山沿海居民漁船救護就地住戶漁人救人者少撈搶貨物者多甚至有將已破未散之船硬行拆去此等惡習各省沿海相同不獨廣東爲然是以本提督於風雨稍定後卽傳知中右營師船分投查探遇有遭



風船隻卽妥爲保護併飭叅將余清選派幹弁分往沿海查探順道知會汛弁巡船一體查探嗣據差旋覆稱查本境洋面尙無遭風船隻惟據西來船戶云稱陽江一帶洋面有鹽船商船十餘隻遭風斷桅並聞陽江一帶兵船沉失數隻等語本提督因事未核實亦未據報是未容達茲准咨查或者外夷貢船及米船猪船因遭風擱淺或斷桅斷纜致被沿海窮漁乘危搶劫均未可定至外夷貢船究係何國貢船必須迅速確查以便追拿匪犯除札飭平海營護叅將

李茂青密赴碧甲司阿媽廟等處偵緝各犯專弁賈  
札前往密投暨加信飛咨陽江瓊州二鎮併專弁趕  
往陽江確探容俟得有確音另再飛報外合先咨覆  
云云

一咨 督院

道光十五年閏六月初一日

廣海將弁不知振作先行摘頂並耑員防範夷船稿  
六月廿九三十日兩奉鈞函捧讀再三感泐無似聞  
省匪船游奕粵洋已疊據探報鑿鑿可憑今該署鎮  
以追探無踪具覆誠如台諭難保非怠惰恇怯措詞  
掩飾斷不足信除又飛咨賴署鎮並嚴飭各協營再  
行加緊偵拿如稍有疎防定將不力員弁咨請

奏恭留緝斷不絲毫姑容至夷船失事洋面前派署倫  
曾應元往查據覆係在萬山外洋旋奉翰示據洋商  
代稟係在澳門西南帽石處昨准鈞咨據委員周守

會同郭同知及香山營縣同詣夷船會勘查該船失事地方據供在南峯山外洋附近白石處所稽之廣州輿圖核對夷人洋圖確係新寧縣所屬等語查會應元所稟在萬山外洋因係不懂夷語以致渾統其詞而洋商代稟亦因傳話之訛今委員周守等公會勘繹訊明白自屬確鑿查新寧縣所屬外洋係廣海營管轄該夷船於六月初七日遭風斷桅僱倩漁船引帶於十一日拖至新寧洋境漁戶增添催值夷人不允而散迨至十一日酉刻方被搶劫查昨據廣

海營報稱於六月初七日該營輪巡將弁在洋遭風  
署把總鍾國瑞管駕四號中米艇一隻於初八早在  
葛洲撞礁擊碎弁兵受傷沉失彈藥等情又展鈞咨  
以陽江何鎮報稱於六月初七日在洋遇颶沉失左  
營撈艚船一隻弁兵受傷並漂失兵五名未知下落  
等云核對夷人所供遭風斷梳日期均相脗合查夷  
船係遭風之後於六月十一日失事該護遊擊周弼  
何以毫無見聞業經尊處節次飭行教弟處亦已七  
次札飭內有四次專弁專目赶往勒限押令嚴拿迄

今十有餘日該護遊擊並無隻字稟聞是周弼不知振作形如木偶實堪痛恨應請將該護遊擊周弼署千總劉威署外委馮廷椿記委鄧建中先行摘去頂戴其署把總鍾國瑞於遭風受傷後有無更換容俟查明核實辦理至陽江欽州一帶洋面盜匪情形業已委弁分往確查容俟核實密覆外另示訪聞有外夷貢船在洋被搶六月十一二等日又有米船猪船被劫情事查六月初七八等日颶風大作雨勢滂沱風定後卽慮有乘危搶劫之案當飭余忝將選派妥

弁赴沿海一帶探查嗣據覆稱探聞陽江一帶有鹽船商船十餘隻在洋遭風有撞礁沉失貨物漂淌者有遭風打上淺灘有撞至岸邊淺擱者並聞陽江鎮屬打沉師船四隻等語因未據各屬稟報是以尙未核實上達茲荷訪聞有夷船商船被劫情事諒因遭風擱淺沿海窮漁不知輕重乘危搶劫似屬實有其事敘弟接閱之下立卽密札護平海叅將李茂菁不動聲色赶往碧甲司阿媽廟等處地方密查匪犯李勝章何毛先等五名務使速獲解辦當差記委邱超

連夜趕往又因盧必沅所獲匪犯梁成友等三名供  
出拖船戶莊亞榮王友珍二名現在大澳等云查做  
標中營把總喻成宗前在大鵬營曾任大澳汛地卽  
札該弁付以盤川星速趕往大澳訪查如有確踪卽  
會合大鵬官兵兜拿解報並因前次差往陽江之弁  
迄未探確回銷且有外夷貢船失事關係尤重又卽  
專咨加信派記委顏進陞連夜趕往陽江面達何鎮  
並札署遊擊李賢一體確查據實呈覆案關重大毋  
得稍存徇飾轉致公事礙手諄諄札飭均於三十日



分起專弁前往再承示外夷護貨兵船在境屬令加  
意防範遵查該船到洋後業已節次專員察其動靜  
據報均尙安靜然虎門爲中路扼要之區毋論該夷  
人安靜與否總應有備業經專委右營遊擊何駿龍  
督率中右兩營舟師駐紮虎門分班出海遊巡日夜  
防範隨時遠遠瞭探不必令其稍有知覺至於內海  
一帶全派快蟹巡緝又耑委奈忝將先行親赴各炮  
臺再將備好一切軍火逐一檢核如有因陰雨受潮  
之件立即更換防臺弁兵如前按期演習並選派妥

弁前赴沙角望臺分班晝夜瞭望俟該叅將查明回  
營仍親詣各臺逐加試演總期事事預爲有備方不  
致臨事周章庶以仰副垂厯海防之至意緣叨注念  
敬將辦理查探緣由奉覆云云

道光十五年閏六月初一日

防範外夷巡船出示曉諭防臺弁兵函商稿

昨日專覆一函將分別飭拿潛竄閩匪暨劫掠夷船  
賊犯並照密咨移行陽江瓊州通飭各營一體會拿  
差探貢船及猪米等船失事洋面勒限分催獲解等  
情度已入覽前據署遊擊何駿龍稟稱現有外夷護  
貨兵船停泊香山洋面並預荷示函命爲加意防範  
仰見籌畫周詳有備無患之至意除已分札中右營  
將領督飭各臺弁兵一律整脩嚴密預防并出示曉  
諭各臺不但使該將領等觸目警心不敢泄玩卽使

該夷聞知亦見我

天朝法度森嚴於巡防之中仍寓懷柔之意總當示以恩威斷不開以嫌隙此示恐未妥善尙未繕發錄送鈞奪如其中有不到之處能荷斧政更爲感佩或不可行亦祈賜示云云

道光十五年閏六月

初二日

札飭中右將備示諭各臺弁兵稿

爲再行申明飭遵照辦事照得重門擊柝所以禦暴  
客建營設官原以備不虞虎門海口爲廣東中路要  
衝東隣閩省西接越南四通八達海道綿長不獨商  
漁船隻絡繹往來且係各外夷貨船例准貿易之所  
船多人衆良莠難分前人定制緊嚴扼要是以建大  
帥於虎門造炮臺於海口關鍵重重官兵林立設防  
已屬周密無如日久懈生官兵漸存怠玩以致上年  
外夷兵船闖駛入口未能阻截查厥所由實因官兵

平日懈弛毫無預備以致臨事周章言念及此殊堪痛恨本軍門於上年冬月奉

命來粵蒞任後卽親臨各扼要又遍歷重洋履勘形勢與各將領悉心籌計並會商督部堂籌建炮臺添鑄大炮業經會銜

奏明建鑄計日卽可竣工去冬今春本軍門業將訓練章程防臺巡海及設立誌椿添置炮墊趕造精緻火藥添鑄封口彈子各臺儲積柴草以備火攻將備分兵操練以資協濟並已節次親臨督率演練炮準而

諭臺弁將各兵派定責成每人專守大炮一尊不必兼管他炮庶久練得知炮子之高低方期有準其餘兵丁亦派定輪流點放總以肅靜爲要並卽賞米賞錢以鼓士氣如右營千總王殿安不肯實心訓練卽行撤叅中營千總萬國勝尙能教兵辦事卽行咨留其防守訓練一切機宜已疊次札行並面諭各臺千把認真講求務使兵技精益求精炮火準而又準至於守臺各項軍火器械久經札飭中軍查有不足者立卽添置殘損者迅速更換其應用火器等件亦已

另行添備防臺衆兵原飭各汛弁自行選擇遇有懶惰不力之兵並准其隨時懲辦更換以上各件有飭行有案者有當面論飭者有備無虞於防海防臺雖未能絲毫無遺大概已屬有條條屆初秋正各外夷商船雲集之候該夷商運貨來廣資本頗鉅或離廣四五萬里或二三萬里道遠貨重歷年各國均有護貨兵船防護抵廣俟各貨船到齊之後方行回帆此外夷歷年之舊章也昨據總巡何遊擊報稱現有暎夷護貨兵船一隻收泊香山洋境等情查護貨兵船



向年均有數隻收入萬山以內洋面停泊避風刻下已到一船其餘諒亦接踵而至定例護貨兵船原不禁其來廣然例止停泊外洋不准駛過沙角該兵船內自應有夷官夷目必知感激

大皇帝准其貿易鴻恩遵守

禁令定能管束夷兵但該船既停萬山之內本標各營兵船亦應加意巡防斷絕漁民蛋艇勾結嚴拿偷竊小船以期體卹遠人除札飭右營何遊擊督率中右師船專駐虎門海口分替巡防其內海一帶派令

快船分投巡緝並令叅將親詣各炮臺挨查已經  
備好一切軍火炮械恐有收貯不力現已殘損者或  
因陰雨過多致被潮濕者逐細再行查明或應更換  
或應添補其各弁仍照舊演炮撥鎗務使件件有備  
人人得用設有查點不到之件許各該臺防弁立即  
呈請添備本軍門即日親詣各臺閱視兵技演放大  
炮查點一切軍火如有絲毫不整立將防臺弁委當  
堂責革如兵丁烏鎗技疎放炮不能純熟者立行責  
革再放炮之際一切均宜肅靜如有臨時喊叫招呼

者卽行插耳示衆決不稍存寬貸至於外夷護貨兵  
船收泊外洋原所不禁而沙角大角兩處望臺卽是  
分別界限之處設使該夷兵船駛進沙角卽係窺探  
則有干

禁令如敢闖入沙角向內行駛該各臺防弁防兵卽  
行裝藥下子對準轟擊務須盡力立將該船擊碎一  
面飛報本軍門督駕火船並飛調各路火船師船夾  
攻焚毀誠恐各該臺弁兵不知禁令拘於舊習合行

專札飭遵  
出示通諭

爲此示仰該

衆將守備  
遊擊

一體遵照如遇外

夷兵船進口該將備立卽帶領所練親兵飛赴

鎮遠  
橫山  
大橋  
虎

督率各弁兵裝足藥彈盡力轟擊務將該船轟沉如

敢畏葸恇怯或不竭力轟擊致任闖過者定將該臺

防弁照依軍令梟首示衆該將領並干叅究決不稍

貸印札專該將將等毋稍玩違自取重罪其各凜之

毋違特札

示

一 札本標中軍 右營遊擊 中 右營守備

一出示 南山 橫橋 沙角 鎮遠 大虎 大角 各炮臺

道光十五年閏六月初二日

委員周國英緝獲搬搶夷船正盜真贓稿

爲緝獲匪犯三名起獲現贓新洋錢四百零一圓訊  
係正盜真贓解省嚴究餘匪姓名住址去向密速示  
覆以憑追拿事竊照暎夷咀啞貨船據報於六月初  
七日在洋遭風僱倩漁船引帶行至新寧縣南峯山  
白石外洋於十一日被搶一案查洋圖內止有南澎  
礮石並無南峯白石諒係語音之訛節經飛行沿海  
各營上緊兜檢並專委做標署守備曾應元周國英  
把總區廷璋喻成宗分投追緝六月二十六日據周

國英稟稱遵奉憲札發給盤川卽帶同把總區廷璋等星夜赴洋由福永大王洲偵緝二十日趕至平洲訪有蛋民黎得有於六月十五日身帶新洋錢數十圓在平洲購買什物聞該蛋民慣做夷船帶水署脩卽于二十一日追至長洲會同大鵬署把總鄭榮高訪悉十六日黎得有用新洋錢百餘圓在墟收買綢緞等物現已他往署脩帶同區鄭二弁添僱拖船於二十二日趕至佛堂門量船灣等處聞黎得有昨在量船灣歸還舖欠銀一百餘兩俱係新洋錢署脩將

新洋錢易換一圓實呈鈞電仍卽追踪並購有線人  
武生黃大英等於六月三十日趕至平海之小星洋  
面據線人指明匪船署脩周國英卽首先過船將犯  
人黎得有拿獲把總區廷璋署把總鄭榮高拿獲犯  
人黎得全平海汛兵趕至協獲並獲原艇一隻艙內  
婦女五口幼孩四口搜出新洋錢三百七十九圓據  
該犯等供稱夥犯劉亞養馬亞六二名均同分洋錢  
現往灣頭等語署脩又就地購線趕赴灣頭適署大  
鵬左營守脩陳超倫在彼卽會同於三十日晚將劉

亞養拿獲搜獲新洋錢二十二圓經陳超倫獲解赴  
轅合將犯人黎得有黎得全并匪艇犯婦幼孩盜賊  
解候示遵等情並據署守脩陳超倫稟稱遵奉憲札  
飭緝搶劫夷船匪犯卽就洋督率弁委分投購線於  
六月三十日訪有漁人在下沙地方使用新洋錢買  
物當卽趕往適憲標署守脩周國英等亦同在彼當  
據線人指明陳超倫卽飭外委范羣芳將該犯劉亞  
養拿獲署脩周國英等在該犯身邊搜出新洋錢二  
十二圓詢以馬亞六逃往何處該犯狡不實供現將



犯人洋錢押解來轅候示等情各到本提督據此並據中軍叅將余清署右營遊擊何駿龍轉據委弁稟同前由本提督當將所獲洋錢四百零一圓當衆檢閱均係新鑄洋錢封固送驗提到犯人黎得有黎得全劉亞養詰詢供情無如全操土音當委中軍余叅將訊據劉亞養供係新安蛋民與馬亞六同在黎得有船上做水手六月初在洋聞有夷船在南澎遭風斷桅黎得有卽商同駕船趕往適夷船招僱漁船拖帶當與廣海赤溪拖七艘拖共船十四隻言定價值

拖帶因夷人發銀短少各船見夷人無多卽於十一日搬搶洋錢黎得有黎得全是船主分了洋錢一箱約有三千圓光景小的與馬亞六是水手每人止得洋錢五百圓等語質之黎得有黎得全則供稱並未同衆搬搶因各拖船搬搶夷船小的適在該處恐其張揚各拖船送給洋錢三百餘圓等語再詢之劉亞養則堅供如前查夷船遭風被搶案情甚重今署脩周國英訪獲黎得有等二犯起獲新鑄洋錢三百七十九圓署守脩陳超倫拏獲犯人劉亞養搜獲新洋

錢二十二圓均係人贓現獲況兩次詰訊劉亞養均堅供實係同衆搶劫其爲正犯無疑斷不能以黎得有黎得全避就之供任其狡展况據劉亞養供與馬亞六各得洋錢五百圓黎得有兄弟分得洋錢約計三千圓現在贓銀旣真奚容狡避合卽專差原獲之署脩周國英加派把總張清齡幫同解犯來轅聽候委員研訊得有供黨名姓住址卽希賜示以便專差追緝至該犯等得贓後花用原贓應否訊明飭令地方官照數查取歸原應候銜奪至署脩陳超倫卽經

飭令帶同外委范羣芳趕緊回洋務將馬亞六迅速  
獲解其賊船犯眷卽派把總區廷璋狎解來省合將  
獲犯獲贓各緣由咨明應請委審示覆云云

計送犯人三名 黎得有 黎得全 劉亞養

贓銀洋錢四百一圓 賊船一隻犯眷大小九口

一咨

督撫院

道光十五年閏六月

初三日

委員獲犯獲贓請飭司嚴訊稿

閏六月初三日備具公牘飭令署守備周國英等押解搶劫夷船匪犯黎得有黎得全劉亞養等犯三名並贓銀新鑄洋錢共四百零一圓匪船一隻犯眷大小九口星夜赴省計今午定已解赴崇轅飭發審訊復細加訪問黎得有向係慣做夷船帶水能說夷話現已人贓並獲且劉亞養卽其本船水手指定黎得有黎得全分得洋錢一箱並自認與未獲之同船水手馬亞六各分洋錢五百圓查現起之贓均係新鑄

未經行使之錢顯係正盜真贓似無疑義况據失事  
夷人供稱於遭風斷桅後卽僱倩有家眷漁船引帶  
等語而黎得有船上現有家眷却又能通夷語更恐  
卽是此案盜首亦未可定在黎得有等自必畏罪狡  
賴縱使卽非此案盜首然從此追究供出首從姓名  
住址並各匪現在逃散何處卽可分捕會拿可期速  
獲務祈於委員審有實供卽速示悉以便密飭安弁  
馳赴各該處迅卽獲解庶免該匪等聞風遠逸頃又  
風聞該拖船於分贓後已有七八船逃往碇洲洋面

卽由碙洲西下現在碙洲境內亦驟有新洋錢行使  
市墟是否虛實均應查辦除將現獲贓犯緣由並風  
聞前情刻已專差飛咨瓊州陽江二鎮嚴督各營加  
緊密訪嚴拿務獲解究並咨明南澳碣石一體偵拿  
外知厯盡懷謹以布達云云

道光十五年閏六月初四日

--	--	--	--	--	--	--	--	--	--



緝獲正盜真賊咨行鎮營上緊跟拿各犯稿

爲獲盜獲賊訊明正盜大概情形星飛

咨明札行

以憑追

踪速獲解省歸案事案照暎夷咄啞貨船據報於六月初七日在外洋遭風僱倩漁船拖帶行至新寧屬南峯山白石外洋被漁船戶乘危搬搶洋錢貨物一案節經飛咨飭屬兜拿務期人賊速獲解辦飛札沿海各協營設法訪拿各在案並專委做標署守備會應元周國英把總區廷璋喻成宗等分投追拿茲於閏六月初三日據周國英獲犯黎得有黎得全二名

起獲贓銀新鑄洋錢三百七十九圓並匪船犯眷稟  
解來轅並據署大鵬左營守備陳超倫會同周國英  
等拿獲犯人劉亞養搜獲新洋錢二十二圓一併解  
送前來各到本軍門據此當卽當堂憑衆檢閱盜贓  
洋錢四百零一圓均係新鑄洋錢提犯研訊據劉亞  
養供稱小的係新安蛋民與馬亞六同在黎得有船  
上做水手六月初在洋聞有夷船在南澎遭風斷桅  
黎得有卽商同駕船趕往適夷船招僱漁船拖帶當  
與廣海赤溪七舫拖船十四隻定價拖帶因夷人給

銀短少又見夷人無多衆人起意卽于十一日下晚  
搬搶黎得有黎得全分了洋錢一箱約三千圓光景  
小的與馬亞六每人止得洋錢五百圓同搶各船當  
卽分散等語訊之黎得有黎得全供稱並未同搶因  
各拖船搬搶時小的船適在該處他們怕我張揚是  
以送給洋錢三百餘圓等語當令兩相對質據劉亞  
養堅供如前而黎得有黎得全均咬唔狡辯查夷船  
遭風斷桅漁人見財起意乘危搬搶賊多案重經本  
軍門專委署守備周國英訪明黎得有慣做夷船帶

水能說夷語現已人贓併獲而劉亞養供明卽是本  
船水手指定黎得有黎得全分洋錢一箱並自認與  
馬亞六各得洋錢五百圓且所獲洋錢又係新鑄尙  
未行使之錢顯係正盜真贓似無疑異况黎得有慣  
做夷船帶水能說夷語更恐卽是此案盜首均未可  
定除將盜犯贓錢匪船犯眷解省咨請督部堂委員  
審辦外合亟飛咨爲此札仰該營查照來文會同有  
司傳到拖頭保甲卽將本境赤溪拖七舫拖密速查  
明跟追設法緝盜起贓務使嚴密迅速不得稍有洩

漏致犯聞風遠颺至此案盜犯必須全獲盜贓尤須照數起獲給領庶上可以入

奏下得以折服外夷公事方不致掣肘本軍門心急如焚各營迄未報獲一犯似此任意因循一經叅辦恐承緝各員不止落職留緝已也並訪聞該拖船於分贓後已有七八隻逃往碣洲西下現在碣境已有新鑄洋錢行使墟市務望貴鎮嚴督所屬須上緊偵緝迅

獲贓盜解省歸案審辦

均切示覆施行毋稍玩視干咎

一咨 陽江鎮 一札署陽江中軍 香山協

卸署陽江中軍 護廣海遊擊 本標中營守備

云云又訪得儋州一帶洋面現有土匪聚船十數隻  
勾結多人在洋劫掠米船猪船等事又風聞有外夷  
貢船在瓊屬洋面被劫係盜匪李勝章李亞龍李三  
友李朱嬌舵工何毛先等聞之實深詫異不知巡洋  
舟師所司何事何以本軍門已知盜匪名姓並知所  
劫之物係紫金冠金獅子燕窩白米等件而各營迄  
無隻字稟報豈竟安泊深澳置洋巡於不問耶殊深  
悶懣合咨

貴鎮查照迅賜查覆云云

一咨 瓊州鎮

云云並聞該拖船分贓後已有七八隻逃往硃洲西  
下硃境已有新洋錢行使墟市此等漁匪得贓後諒  
必東西逃竄形跡難定務望貴鎮嚴督所屬設法偵  
拿總以贓盜迅速破獲庶上可以入

奏下得以折服外夷公事不致掣肘本提督心急如焚  
各營迄未緝獲一犯捕務實屬懈弛合亟飛咨貴鎮  
請煩轉飭舟師臺汛嚴密購緝正盜真贓報究是所

切禱云云

一谷 碣石鎮 南澳鎮

道光十五年閏六月初四日



批署中營守備曾應元稟

據稟在深灣海面購有眼線所稱搶奪夷船係赤溪蛋民馮有能兄弟坐駕罟船等艇搶得洋錢等件在新寧縣屬水口墟發賣緣由已悉此案先據續委之署守備周國英跟踪追至平海小星洋面拿獲正犯黎得有黎得全二名起出真贓賊船又會同署守備陳超倫拿獲犯人劉亞養並贓押解來轅卽經備咨解省在案又據陽江何鎮軍並遊擊楊德雄函稟於六月二十七日拿獲七舫拖一

對犯人黎生合等三名起獲番銀五千圓解交陽  
江縣訊解在案查昨據犯供此項匪船全係赤溪  
拖七舫拖捕魚船隻此時陽江所獲之犯應已訊  
有確供自可跟踪緝該署備係首先特委之員  
既經購線探有賊匪姓名贓物發賣處所何以迄  
今犯無一獲可見如簧之舌全不可靠仰卽實力  
窮追總期賊賊速獲方爲不負委用凜之勿懈繳  
道光十五年閏六月初七日

批署陽江中軍楊遊擊手本

據稟已悉除咨

督

撫二院外該署遊擊疊次獲匪起出拖船原贓解

縣審辦實屬緝捕有方奮勇可嘉之至但此時雖經各處破獲起出多贓惟查夷人原報失去番銀七萬餘圓報有匪徒一百餘名茲統計各處現獲贓犯尙未十分之二尤應一鼓作氣跟踪緝獲仰該署遊擊乘此迅速追拿總以贓犯悉數弋獲解究斷不可片刻延緩致犯遠颺爲要仍將獲有贓

盜緣由專差分投馳稟察核可也此繳

道光十五年閏六月初九日

委員周國英等續獲賊盜咨稿

爲委員續獲賊犯訊係正賊解省歸案咨請發審事  
竊照夷船遭風被搶一案前據署備周國英陳超倫  
獲犯獲賊解省在案本提督當以所供同搶分贓之  
馬亞六一犯在逃立飭陳超倫趕往緝拿去後茲於  
本月初九日據署守備陳超倫狎犯來虎稟稱昨奉  
面委帶同外委范羣芳星夜趕回於初六日追蹤至  
白沙地方據線人指明馬亞六潛匿處所超倫卽令  
外委范羣芳等上前圍拿范羣芳首先將馬亞六擒

獲記委劉大芳劉大昌在該犯身上搜出原贓番銀一十一圓適署大鵬右營守備何觀鋒趕至同獲合將獲犯馬亞六及洋錢十一圓解候等情據此除驗明洋錢十一圓均係原贓封固解驗飭據叅將余清訊據馬亞六供稱小的係新安蛋民年二十一歲本年正月初十日受僱在黎得有船上當水手六月初十間聞有夷船在南澎遭風斷桅黎得有卽令將船駛往南澎看見遭風夷人招呼拖帶黎得全通曉夷語能說夷話卽攏靠夷船黎得全卽過船議價要銀

三百圓夷人嫌多其時當地共來七艘赤溪拖連黎得有船共十五隻一同攏近因夷人不肯多出價錢又見船上夷人不多黎得全見財起意衆人上船乘危搬搶各散小的與劉亞養每人分銀五百圓黎得有兄弟分銀三千零幾十圓小的分銀後卽辭了黎得有上岸因聞各處拿人小的將銀拋下水了除零用外身上止存洋錢十一圓今被拿獲小的實係聽從所供是實等語查該犯在黎得有船上充當水手一同搬搶夷船洋銀並分銀五百圓已據劉亞養供

明在案惟所供黎得全通曉夷語能說夷話是否卽  
係黎得全爲首必須歸案質訊方能得實至該犯所  
供分得洋錢拋棄下水似難憑信應飭原獲外委范  
羣芳將犯人馬亞六並贓銀單鸚洋錢十一圓解赴  
崇轅聽候委審歸案究辦並飭陳超倫趕回加緊密  
緝外合將續獲贓犯咨明訊辦仍希示覆云云

計解犯人馬亞六一名單鸚洋錢十一圓

一咨督撫二院

道光十五年閏六月

初九日



崙弁密拿寄贓犯人黃有廣札稿

爲密札專委嚴拿務須不動聲色迅速獲解事竊照  
暎夷貨船遭風斷桅被引帶漁船乘危搬搶一案卽  
經本軍門崙委署備周國英拿獲正賊真贓解省審  
辦在案茲據委員審明犯人黎得全供認與伊兄黎  
得有向駕釣魚船一隻僱有劉亞養馬亞六在船幫  
工往新安龍船灣佛堂門各洋釣魚六月十一日駛  
到新寧南澎洋面見有不識名的梁姓大眼艙船並  
拖船二十餘隻先在該處因有遭風夷船漂到招僱

各船帶水議價不允梁姓各船起意乘機搶奪伊船分得番銀四千圓除分給水手劉亞養馬亞六各五百圓并陸續花消約有千餘圓其餘銀錢均寄存新安九龍人黃有廣蝦罟船內其黃有廣卽富大現在新安佛堂門灣泊等語

除密札大鵬左右守備暨本

標左營遊擊刻日嚴密查拿外合行密札專委爲此

札仰該把總立卽馳往訪拿務將存寄賊銀之蝦罟

署備

船戶黃有廣立卽拿獲將所存賊銀並裝銀木箱一併起獲解轅咨辦查黃有廣係捕魚之人不知定例

今止收存不知情賊贓並無大罪若能聞拿卽行赴  
官呈繳仍應獎賞况督部堂已有告示如能將各犯  
寄存贓銀呈首者一概不究並仍獎賞銀兩現已各  
處揭示曉諭合併抄示札知遵照毋違

一札中營把總喻成宗 本左遊擊

大鵬左右營守備

道光十五年閏六月初十日



批署陽江鎮中軍遊擊稟

據稟已悉除咨

督撫

二院外該署遊擊先後會縣督

率兵役拿獲黎生合等三起緝捕實屬認真惟此案未起賊銀仍有五萬餘圓必須多購眼線鼓勵弁兵趕緊分投設法堯擒務期全數七獲至夷人裝銀木箱亦須一併起出解省尤爲至要至現供黃利祿等逃赴西路仰卽跟踪追拿以期幹此全功不致一名漏網爲要爲囑此繳

道光十五年閏六月

初十日



批護廣海寨遊擊周弼稟

據稟已悉查搬搶夷船賊匪本軍門先據委員周國英訪獲正犯黎得全等三名並賊銀船隻解省審辦又據署遊擊楊德雄稟獲黎生合等三名起出拖船賊銀報究又據署後營遊擊盧必沅拿獲犯賊銀船一起又據何鎮軍督獲吳大漢保等犯賊銀船隻二起又據大鵬營獲犯馬亞六人賊均經解省訊明在案不獨失事夷人報案指明洋面委員會勘印稟可憑及所獲各犯口供又鑿鑿可

據該護遊擊以承緝之員迄未獲犯獲贓節經本  
軍門十一次札飭該脩形如木偶並無隻字稟覆  
並不趕緊緝賊破案以贖前愆轉以附搭之名冒  
爲獲犯卑鄙不堪而尤繪送洋圖推諉洋面無能  
無耻實堪痛恨除將輪巡將弁一併擗頂外茲再  
勒限五日如該護遊擊尙有人心速將未獲犯贓  
趕緊弋獲尙可稍贖前愆設使失事洋面果有不  
實不妨獲犯後呈請更正如再冥頑不靈限內不  
獲犯贓恐不止革職已也凜之此繳



道光十五年閏六月初十日



虎門海口風潮暴作淹漫田禾稿

本月初八九十等日每晚輒有黃色濃雲由東至西  
察看日光雲氣顯著發風形勢卽傳諭總巡遊擊何  
駿龍轉飭巡洋弁委收拾各船旋纜一體防範去後  
十一日午後東北風漸起漸大酉戌之際風色或南  
或北東西不定刻刻變遷愈刮愈猛至亥初則摧墻  
拔木署中屋宇爲之搖動加之大雨傾盆風聲與飛  
瓦擲地之聲不絕迨至十二日丑刻雨勢益大風轉  
東南吼聲更烈黎明雨勢稍緩風不少息卽派弁前

赴海口一帶查看大小師船暨越南夷船有無傷損  
旋據覆稱弁等奉差查看各項船隻遵卽同往行出  
虎門寨城不獨道路無蹤卽田邊守望更棚均被水  
淹至脊等語教弟卽冒雨登高看得虎門城外一片  
汪洋素日所見之田禾及田邊所搭之更棚均已埋  
諸水底緣海潮爲暴風所擁進則洶湧退爲風阻一  
夜之頃計多長水幾及一丈是以沿海街道田畝全  
行漫溢幸於午後風勢稍小雨亦漸止漫溢之水漸  
次消退又飭署右營把總何瓊趕赴海口挨查去後

戌刻接據署右營遊擊何駿龍稟稱昨奉傳諭立即通知隨巡各船收拾旋纜防備暴風茲於十一日下  
午北風盛發天色變異卽飭各船小心保護加拋旋  
纜定更後東北風逾大浪湧異常越南夷船被風打  
出龍穴之外十二日早又隨東南暴風刮入沙角邊  
灣兜之內查該處水底係屬爛坭卽使擱淺亦無大  
碍現在風已轉南一俟風色稍和親往查詢該越南  
船有無損漏仍加意防範至兩營大小舟師一切槓  
槓有無損失容俟風定查明另行稟報等情查此次

颶風暴雨迥異尋常一晝夜之久洋中遭風船隻在所必有除俟各委弁查覆回銷有無事故隨時核辦至虎門左近一帶田禾及新插秧苗突被風潮淹漫此時天色雖晴水已退去但受傷過甚收成必至大減知關蓋念合將十一二日海邊風雨情形專肅奉聞云云

道光十五年閏六月

十三

日致

督撫

籌議提鎮各標抽兵七十名添防新建炮臺稿

爲籌議抽撥兵丁分派配防巡緝事道光十五年閏

六月十四日准

總督部堂 貴部堂 咨開道光十五年云云等因到本軍門准

此查新建蘆灣等處炮臺一案係因防夷緊要一切不可稍緩應俟工竣卽須撥兵配防以資守禦所有抽撥南澳碣石本標徑轄各營兵七十名旣准督部堂如議抽撥咨覆先行移行各鎮協營照辦自應遇有糧缺陸續扣裁統於本年十月初一日將名糧移

撥本標右營募補彼此起支截支合將會議抽撥步

守名數列單

移

行知爲此

合咨

貴鎮煩爲轉飭

牌仰該營照依事理卽便轉

移本標左前二營遵照單開名數依限抽撥並將抽

撥名糧截支糧餉日期及歲需餉米公費紅白銀兩

隨帶軍裝旗幟器械帳房鑼鍋鉛藥等項逐一列冊

移送本標右營查收添額並造冊通繳查核

施行該將卽

備移本標右營遵照將次屆期立卽召募勇壯各技

餘丁挑選拔熟守兵呈送本軍門考驗拔補及時分

配各臺防守仍將一切事宜層次分別造冊具稟核



辦毋稍率延毋違

計粘單一紙

一咨

南澳碣石鎮

行本標中軍 香山協

計開

水師提標左營抽步兵一名守兵四名前營抽步兵  
一名守兵四名

香山協左營抽步兵一名守兵二名右營抽步兵一  
名守兵二名

碣石鎮左營抽步兵一名守兵四名右營抽步兵一

名守兵四名

平海營抽步兵一名守兵四名

南澳鎮右營抽步兵十名守兵十名

海門營抽步兵三名守兵十一名

澄海協右營抽步兵一名守兵四名

云云准此除儋州添設水師營應添兵丁一案遵俟定議後再行辦理外查新建蘆灣等處炮臺一案係因防夷緊要一切不可稍緩應俟工竣卽須撥兵配防以資守禦所有抽撥南澳碣石本標徑轄各營兵

丁七十名既經貴部堂如議抽撥咨覆先行移行各鎮協營照辦自應遇有糧缺陸續扣裁統於本年十月初一日將名糧移撥本標右營募補彼此起支截支除將會議抽撥步守名數列單移行各鎮協營轉飭遵照及行本標中軍叅將脩移本標右營遵照將次屆期召募各技餘丁挑選技熟守兵呈送本提督考驗拔補及時分配各臺防守仍將一切事宜層次分別造冊具稟核辦毋延外合就咨覆請煩查照分別照行遵辦云云

一谷 督院

道光十五年閏六月 十七 日

據稟引線拿賊轉遭波累咨請察釋稿

爲據稟咨會事道光十五年閏六月十九日據署本  
標右營遊擊何駿龍稟稱本月十七日洋次據新安  
縣武生黃大英稟遵示繳銀乞恩察釋以免株累事  
竊生因夷船在洋遭風被搶奉行嚴拿生因在新安  
縣屬量船灣開張新裕泰雜貨店原與標下署守備  
周國英相識周國英奉提憲特派帶兵前往各處港  
口購緝本案匪犯到店將奉緝緣由向生說知浼生  
設法購線生因蛋民黎得全前次到店買貨還賬用

有新番銀當卽找出一圓交周國英稟繳上憲案驗  
隨卽購得妥線跟追斯時周國英破案心急許生不  
惜重費止求有犯必獲卽發給各漁船花紅銀一百  
圓許以獲犯之日再加重賞等語適值連日風雨各  
漁戶貪得重賞不避風雨四處跟踪至平海之小星  
洋面見黎得有兄弟同在船內四面圍拿周國英拿  
獲過船生店伙伴同各蛋民進艙搜出洋銀六百八  
十餘圓其時做線各漁人見利垂涎未暇慮及日後  
卽將花銀各自分藏迨周國英將犯緝定交兵看押

過船搜賊止搜出銀三百七十九圓連犯人家口一併稟解此是當日獲犯得銀被引線漁人私自俵分之實在情形也生回店後據生伴告知並店伙均有藏贓情事生卽着落各伙伴向漁戶次第追出共追出銀二百圓交生暫貯尙有餘銀未曾追出本月初三日有蛋民黃有廣持銀四百五十圓到店說伊要裝置船隻恐銀兩在船諸多耽心逸生店代伊存貯生見該蛋民向在本灣捕魚朝出暮歸銀兩向有交易不疑其爲匪亦不慮其與黎得有代貯贓銀一時

大意代伊貯下適生赴省風聞黃有廣存貯生店之銀卽是黎得有賊銀事關重大若不首明定遭株連合將當日引拿獲犯一切實在情形並追回各引線漁戶存貯銀二百圓又黃有廣存貯銀四百五十圓共銀六百五十圓稟繳伏乞俯念下情將銀收存繳報並移明新安營縣免將生引線拿賊反遭波累並求容生趕回追查各伙伴漁人未繳洋錢另再繳報伏乞恩准等情到卑職據此查前據劉亞養供稱黎得有等搶銀一箱除陸續花用及周國英等起獲洋



錢今武生黃大英呈繳洋錢此外應仍有藏寄贓銀  
除准令黃大英趕回追查就近赴縣呈繳外合將據  
呈緣由連該生繳到洋銀六百五十圓稟解察核等  
情到本提督據此查新安縣武生黃大英前隨署備  
周國英作線引拿黎得有等業據報明有案當卽憑  
衆驗明所繳洋錢七封每封內均有舊洋錢五七圓  
不等共計洋錢六百五十圓固封專差外委周大麟  
賫赴崇轅卽所驗收發司存貯仍祈示覆云云

計解洋錢六百五十圓

大小共七封

一谷 督院

道光十五年閏六月

十九日

札委署中營守備曾應元馳赴雷瓊督緝稿

爲專委督拿賊犯速獲解案事照得夷船被搶一案業經委員會同文武各員節次獲賊破案昨准督部堂咨會此案訊據已獲各犯供稱賊賊尙多所有新寧縣赤溪蝦罟拖等船以及在逃黃宏業等業已西下該船賊賊最多亟應嚴催拿解又據前獲槍犯黃利六供稱寄賊後逃往瓊雷洋面躲避因無緝拿信息是以趁風折回礮洲打探消息致被獲案等語足見黃利六兩船已在瓊雷洋面藏躲多日何以署都

司龐貫超署守備王鵬年千總吳廷珍以專札飭委堵緝之員乃任盜匪往來本境遊奕多時竟至毫無覺察顯係全不認真此等木偶之徒殊堪痛恨合就札飭該署備卽速馳往西路督同龐貫超等激發天良務將在逃赤溪拖蝦罟等船並黃宏業等連所搶贓銀並夷人裝銀原箱務須一併獲解一經得手該署備卽星飛馳報毋得刻遲干咎速速

道光十五年閏六月

二十二

日

委員追獲寄賊犯人呈繳洋銀咨請訊釋稿

爲委員追獲寄貯犯人黃有廣起獲洋錢五百二十  
三圓解送歸案事竊查前獲犯人黎得全等到案供  
稱有贓銀四百五十圓寄存漁戶黃有廣處等情本  
提督立即專委因公在虎之大鵬右營署守備何觀  
鋒帶同本標中營把總喻成宗星速趕往追拿務將  
人贓并獲解報去後復又札飭大鵬左營守備陳超  
倫本標左營護遊擊曾國安一體兜拿在案嗣據右  
營護遊擊何駿龍稟據線人武生黃大英呈繳存寄

賊銀六百五十圓前來卽于本月十九日專弁咨送  
驗發在案茲於閏六月二十二日據署脩何觀鋒把  
總喻成宗等稟稱竊署脩等接奉憲臺密札飭令迅  
速前往佛堂門量船灣等處查拿寄貯賊銀之黃有  
廣一名務將賊銀解報等因奉此署脩遵卽帶領把  
總喻成宗外委李懋元暨兵丁等不動聲色於本月  
十四日緝至佛堂門洋面據線指認黃有廣船署脩  
卽飭外委李懋元向前檢拿黃有廣一名適新安縣  
盛令本營鄭護叅將署提標左營曾遊擊署大鵬左

營守備陳超倫暨各營縣員弁均跼緝至彼協同拿獲交新安縣盛令審訊據黃有廣供認當日收得黎得有托買船銀四百五十圓寄貯量船灣新裕泰店黎得全尙有餘銀小的不知道等語鄭護叅將等卽飭署備向新裕泰店伴張煜明查詢據供黃有廣寄貯買船銀四百五十圓問武生黃大英便知至黎得全贓銀前月小的帶領捕魚多船及線人在小星洋面圍拿黎得有兄弟時各漁人線人搜出番銀六百餘圓分用尙有三百七十九圓被周總爺搜出解繳

今蒙追賊容小的迅速追繳求開恩等語茲署脩押令陸續追繳到銀四百五十圓另會同新安縣又追得賊銀七十三圓合共銀五百二十三圓理合將銀連黃有廣一名解繳等情據此並據護叅將鄭大斌署遊擊曾國安新安盛令聯銜稟同前由本提督立卽當堂驗明解到賊銀內洋錢七十三圓係新安縣原封未拆其餘四百五十圓驗明固封並存寄賊賊犯人黃有廣卽飭署脩何觀鋒外委李懋元賚赴崇轅呈請驗明發司歸案至黃有廣一犯據訊止係存



寄賊贓並未爲匪其船隻眷屬飭令何觀鋒一併解  
省應否摘釋之處聽候銜奪示覆云云

一咨

督撫院

道光十五年閏六月 二十二日



劄新安縣核案摘釋武生黃大英稿

爲據稟核釋事本月二十三日據標下右營何遊擊稟稱竊卑職前據新安縣武生黃大英稟稱生前隨署守備周國英作線緝獲搬搶夷船匪犯黎得有等迫出搜藏贓銀併悞代黃有廣貯存銀兩緣由實情連銀稟繳前來當經據由稟繳憲臺察核委員解省併准令該武生趕回量船灣將未繳贓銀追繳去後本月二十二日復據武生黃大英到船稟稱生遵奉趕回量船灣查據店夥張煜明等說稱作線漁人尙

有未繳搜藏贓銀共四百五十圓已經查追齊足交  
大鵬右營何署守備查收稟繳至店夥徐獻廷被差  
帶去尙未釋放伏思店夥均係愚民貿易爲生前承  
周署備浼代購線復許以獲賊重賞各漁船貪利踴  
躍作線跟追獲賊搜贓漁人不知事務私藏分用此  
係實在情形茲生已追出銀二百圓並將悞代黃有  
廣貯存銀四百五十圓稟繳於前今店夥張煜明又  
復追繳銀四百五十圓兩次計繳銀一千一百圓此  
外並無有懷藏寄貯情事無憑再繳至黎得有等有

無寄存別人別船生與店夥實不知情合再瀝情稟  
明伏乞轉請恩施早賜檄行新安左營大鵬管知照  
暨新安縣主將店夥徐獻廷釋放俾得安心貿易沾  
恩靡旣等情到卑職據此查該武生悞存贓銀卽行  
具稟呈繳尙屬畏法今據稟前情似無捏飾理合據  
由轉稟察核伏乞俯念下情可否檄行營縣將武生  
黃大英店夥徐獻廷省釋以免羈累出自鴻慈等情  
據此查本月十九日據標下右營何署遊擊稟據武  
生黃大英呈稱遵示繳銀乞恩察釋以免株累等情

呈繳蛋民黃有廣寄存番銀四百五十圓並陸續追  
回引線漁人分藏番銀二百圓一併首明報繳到本  
軍門據此當卽驗明固封委員解省咨請

督部堂驗收發司貯庫在案頃准咨覆內開查武生  
黃大英受寄漁戶及蛋民黃有廣藏匿贓銀遵示首  
繳畏法可嘉且係作線引拿獲犯之人其前次悞行  
受寄之非免其置議不得稍有波累並令將各伙伴  
漁人未繳贓銀追查併繳其各漁戶引拿有功只須  
繳出贓銀概不提究此後如有自行呈繳是案贓銀

者一律免罪贓在一千兩以外者仍酌賞銀兩除札  
臬司提犯黎得有等確審實在得贓若干圓寄頓黃  
有廣處若干圓黃有廣是否同夥該犯所得贓銀除  
先後起繳外尙有贓銀若干寄藏何處逐一訊明稟  
覆移行追繳咨煩查照轉飭該遊擊飭令武生黃大  
英知照等因准此除轉飭遵照外合併行知爲此剴  
仰該縣官吏即便查照一體轉飭武生黃大英遵照  
至該生稟請釋放店夥徐獻廷以免羈累之處希卽  
訊明如無別故卽行釋放免累再本軍門風聞新安

舉人鄭姓係犯人黎得有等之事頭黎得有等卽鄭  
舉人之事仔黎得有兄弟於得賊後曾將賊銀四百  
圓歸償鄭姓未知確否刻下此案各處獲犯已三十  
餘名共獲賊銀現止二萬九百餘圓賊數尙未及三  
分之一是追賊爲現在急務固知辦案最忌株連然  
獲賊過少碍難定讞况犯人黎得全等已獲解在省  
如有歸償鄭姓之欸將來亦不容其不據實供明亟  
應留意確訪設能如黃大英之首繳似亦愛民之一  
端也仍將查辦緣由覆核此剗



一劄新安縣

云云准此除轉飭遵照外

合就札知爲此札仰該署并行左營及札新安縣一

遊擊卽便轉飭汛巡員弁一體遵照毋得稍任兵役體遵照嚴束兵役毋得藉端滋擾外本軍門風聞該藉端滋擾如敢故違定行嚴叅不貸凜遵毋違營署守脩陳超倫不知約束縱兵滋擾並將引線藏

贓漁船漁戶封押不放情事若果屬實不獨生事擾

民且使各處悞寄贓銀之人畏累不前於此等巨案大有關係合行札查仰該護叅將星速查明據實馳覆毋稍徇飭並干叅辦毋違

一札本左遊擊

大鵬叅將

道光十五年閏六月 二十三 日

委員周國英遭風覆船淹斃船戶幼女稿

二十六晚接奉復函知前達風雨情形已邀鑒察卽荷檄行各處查辦撫卹仰見慈雲普照欽感難名連日接據各營呈報巡船遭風有撞礁擊碎片板無存淹斃兵丁沉失軍械應詳請補造者有損失槓棋弁兵受傷應卽籌修者各臺汛兵房有被風雨坍倒三板撞沉者紛紛報至除隨時咨明彙總核辦一面批行各營認真打撈炮械會縣勘明據實通詳外至

教弟預先給

標署守備周國英前獲正犯黎得全等

銀一百兩嗣獲犯解虎據稱與武生黃大英素日相識該生在彼開店與各漁戶交易熟識因知黎得全兄弟使用新鑄番銀過多疑其爲匪卽託其做線引拿該生又招僱漁船十隻允給花紅銀二百圓先給該生洋錢一百圓分散各漁戶購買柴米同往追蹤追獲犯後卽帶同黃大英店夥連夜趕回所允花紅尙未找給等語教弟當發銀一百兩交該署備如數找發交該店夥帶回分給衆人及周國英等自省旋虎又經叅將余清發給銀二百兩僱船赴洋訪拿餘

犯該署備於十一日在洋遭風覆船與署額外王大  
麟及隨從兵目均各受傷並淹斃船戶幼女一口所  
帶軍械衣箱銀兩全行沉失窮弁因公幸存身命情  
實可矜當又發銀一百兩交余叅將分賞受傷各弁  
兵製衣養傷茲荷垂念營員購線花紅恐不踐言以  
後無人聽信諭於奉發陽江捕費內撥用捧讀再三  
感慚交集教弟督理全洋疎於預防已深抱疚選派  
員弁上下兜拿周國英等僅獲犯四名及寄贓之黃  
有廣一名署備會應元止在陽江協獲犯贓一起于

總吳廷珍馳赴瓊州一帶雖據謝鎮及署海口叅將  
余得彪覆稱加派弁兵分投四出迄未報獲一犯

弟

焦急難安昨又發銀專札曾應元連夜趕往瓊州

一路催督龐貫超王鵬年等並嚴飭龍門協崖州協  
海口海安各營以已獲犯人黃利六供稱駕船逃往  
雷瓊躲避因趁順風潛回硃洲探信被獲是雷瓊各  
巡員已有失察經由之咎若再不認真緝獲解報則  
咎由自取此時有無獲解尙難懸定再查據劉亞養  
供稱黎得全弟兄分銀一箱約計三千圓光景馬亞

六供亦相同惟未卜夷人報失番銀二十一箱是否每箱均貯銀三千圓抑箱有大小多寡不同查據陽江初次獲犯據黎生合等供稱兩船分銀兩箱二次獲犯吳亞十等供稱每船分銀兩箱是該四船共分銀八箱若以每箱三千圓計之則黎生合吳亞十兩起四船分銀八箱卽應有番銀二萬四千圓今黎生合等兩船四箱僅供五千圓吳亞十等兩船四箱僅供六千零數十圓是該犯等拚命搶銀全歸船主毫不自私似難全信恐各起均有埋藏尙祈衡鑒承詢

委員允給線人花紅均已如數給發毫未短少至

教

弟

處前後所發花紅盤川賞銀通計未及千金均係  
分應捐辦之事斷不敢再勞慈念亦斷不忍稍累將  
備致如前法令不行也專此奉覆云云

道光十五年閏六月 二十八 日



南澳鎮請補千總於例未符咨請駁飭稿

爲咨請事道光十五年七月初二日准

南澳  
貴

鎮咨開

爲照本鎮先奉總督部堂照會前事查署都司事雲  
騎尉候補守備黃慶元既係營務操練均能精勤嫻  
熟弓馬優長署守備事千總羊英科教練合式均應  
由外記名遇缺酌量分別陞補至把總蔡先攀外委  
傅維賢馬步優嫻緝捕勤奮既經該鎮存記應俟有  
千把總缺出由該鎮分別獎拔具報等因並准本提  
督咨同前事隨查本標右營右哨千總賴先魁病故

遺缺又澄海協左營右哨千總曾繼珍革職遺缺均未奉拔有人經將前遺兩缺以奉行記名之把總蔡先攀請補一缺續奉督憲札據潮州李鎮將閱過官兵技藝列冊稟繳查南澳右營把總蔡先攀澄海協右營把總李英隆均應記名以千總拔補南澳鎮右營外委把總傅維賢應記名以把總拔補該鎮卽便遵照將把總蔡先攀李英隆外委傅維賢記名遇缺分別呈請拔補毋庸再送考驗又准本提督咨知前因木鎮應卽遵照將把總李英隆一併請拔前遺千

總緣前請以蔡先攀就兩缺中拔補一缺未奉督部堂批示是以未便具請嗣蒙檄行以蔡先攀拔補澄海協左營右哨千總並准本提督來咨所遣南澳右營右哨千總一缺應將把總李英隆稟請獎拔方昭公允第思李英隆拔補把總尙未接劄維時又准本提督咨催南澳右營千總賴先魁故缺卽挑選合例人員移送考驗轉送覆驗拔補等因理宜卽挑合例之員送驗校拔適聞閩洋有零星土匪出沒旋據海門營報有匪船駕駛西下捕務吃緊本鎮率帶舟師

日夕在洋往來稽查督捕未能分身挑送茲查李英隆蔡先攀羊英科等各該弁俱係

欽差大閱案內特奉記名飭令俟有千把總缺出呈請拔補毋庸再送考驗之弁與尋常記名者有間其蔡先攀先蒙賞拔澄海協左營千總羊英科亦已奉行

題陞碣石鎮標右營守備現在遺有南澳右營右哨弁缺自應以大閱案內記名之澄海右營把總李英隆呈請拔補加以既准本提督咨催選弁送考該缺不應以該弁李英隆請拔但均屬奉准

督憲鈞諭同案記名之弁辦理未免兩歧雖李英隆  
尙未接受把總劄付於例稍有未符但查蔡先攀前  
請拔補千總其時亦未接劄已沐

督部堂俯允所請茲李英隆自可援照一體邀恩且  
水師人材難得該弁請拔千總洵堪勝任是以不揣  
冒昧相應咨請請祈察照可否以記名毋庸送考之  
澄海把總李英隆轉請督部堂恩准拔補南澳右營  
右哨千總遺缺之處出自碩裁如荷允准轉請拔補  
敢希咨知以便轉飭遵照施行等因到本提督准此

爲查南澳鎮右營右哨千總賴先魁於道光十二年

八月十二日病故懸缺至今已及三載業經貴督部堂

暨前提督及本提督先後迭次飛催南澳鎮並又專

咨差催飭營迅速選送考拔各在案原爲慎重營伍

免悞巡防起見昨因日久仍未送到亦未見查明缺

次移覆又經限行移催並咨會貴督部堂查照一體飭

催又在案今南澳鎮請以李英隆拔補千總咨請轉

請前來本提督卷查千總賴先魁於道光十二年八

月十二日病故李英隆於道光十四年五月二十二

日甫拔把總到營是李英隆拔補把總已在賴先魁  
病故二十一月之後且該弁請劄履歷於十四年十  
一月方准送到本提督卽于十一月十三日核咨轉  
請咨 部尙未奉 部覆准給劄今准前因實屬於  
例未符况懸缺三年之久忽以不合例之弁請補顯  
有懸缺待人之弊不獨有干 部詰此風亦斷不可

開至把總李英隆既經委員潮州李鎮於代閱案內  
稟請記名應請於接劄後遇有干總缺出再行拔補

除咨

覆南澳鎮另選合例把總速送考驗轉送外合  
明督部堂外合就咨覆爲此合咨貴鎮查照批

併咨明爲此合咨貴部堂請祈一體照會該鎮照例  
選合例把總移送本提督考驗轉送拔補併將此缺  
另選送考施行  
係第幾輪第幾缺於送考文內聲明勿再稽延致悞  
巡防施行

一咨 督院 南澳鎮

道光十五年七月初三日



犯供贓銀顯有不實札飭楊署將會縣設法追繳稿  
爲咨覆事道光十五年七月初十日准督部堂咨開  
准貴提督咨開據署陽江鎮中軍遊擊楊德雄稟夷  
船遭風被搶一案將現獲各犯黎生合等十九名併  
起出贓銀銀餅派撥弁兵協同署陽江縣言令及委  
員於本月十九日起程押解赴省審辦等情到本提  
督咨會查照等因准此查黎生合等十九名并贓銀  
已據委員押解到省飭司委員審辦准咨前因相應  
咨覆并祈嚴催營委各員躡緝在逃贓賊務獲毋懈

等因到本軍門准此查此案失事係陽江隣境廣海洋面該遊擊現署陽江鎮中軍一有風聞卽在鎮屬本境各港口疊次獲船獲犯並在境內開張店舖之船主林立仁葉亞安李象龍葉亞果等舖起出贓銀並據該船主首繳贓銀及鎔化銀餅會縣辦理均尙妥速業已迭次札飭批示在案但夷船遭風被引帶漁人見財起意乘危搬搶與尋常案件不同必須起贓在七八成以上方能給領今據各路獲犯四十餘名獲贓共二萬五千有奇獲贓不能如數卽難折服

夷人亦碍難八

告是刻下追賊繳官爲第一要務該遊擊旣已會縣奮  
勉於前更應會縣鼓勇於後况寄賊船主均貿易陽  
江槍銀犯人又久泊本境港口起銀上岸寄頓之處  
亦非隣境此時賊犯雖已解省而船主林立仁等豈  
得於繳賊之後卽令置身事外該縣旣令其引拿逃  
犯此時賊數不敷斷難置之不究前次獲到黎得全  
等賊犯船隻據供分銀一箱計三千圓衆供鑿鑿而  
黎生合吳亞十兩起四船亦供明分銀八箱若果每

箱三千圓則該銀二萬四千圓現在兩起所繳尙未及半或船主匿贓犯人另有寄埋或夷人原箱有大小多寡之不同其理甚明其事現亦易辦况前繳贓內已有鎔化之銀此時卽難保無鎔化埋藏之事功虧一簣該遊擊與言令當共勉之合再檄行仰該遊擊卽便遵照會縣分投緝逃犯設法追贓務期贓銀多獲勿稍延玩凜之毋違

一行署陽江中軍

道光十五年七月 十一 日

拔補千總李英隆撤委另選考拔咨稿

爲咨覆事道光十五年七月十六日准督部堂咨開  
准貴提督咨開准南澳鎮咨南澳鎮右營右哨千總  
賴先魁病故遺缺請以把總李英隆拔補緣由到本  
提督准此爲查南澳鎮右營右哨千總賴先魁於道  
光十二年八月十二日病故懸缺至今已及三載業  
經貴部堂暨前提督及本提督先後迭次飛催並專  
差咨催飭營選送考拔各在案原爲慎重營伍免悞  
巡防起見昨因日久仍未送到亦未查明缺次移覆

又經限行移催並咨會貴部堂一體飭催又在案今南澳沈鎮請以李英隆拔補千總咨請轉請前來本提督卷查千總賴先魁於道光十二年八月十二日病故李英隆於道光十四年五月二十二日甫拔把總到營是李英隆拔補把總已在賴先魁病故二十一月之後且該弁請劄履歷於十四年十一月方准送到本提督卽於十一月十三日核咨轉請咨部尙未奉部覆准給劄今准前因實屬於例未符况懸缺三年之久忽以不合例之弁請補顯有懸缺待人之

樊不獨有干部詰此風亦斷不可開至把總李英隆  
既經委員潮州李鎮於代閱案內稟請記名應請於  
接割後遇有干總缺出再行拔補除咨覆南澳鎮另  
選合例把總速送考驗轉送外合併咨明請祈一體  
照會該鎮照例另選送考等因到本部堂准此查南  
澳鎮右營右哨干總賴先魁病故遺缺昨據南澳沈  
鎮具稟請以把總李英隆拔補業經如議發給委割  
赴營任事併咨行遵照在案今貴提督來咨以李英  
隆尙未接割未便拔補久懸之缺係爲杜樊起見所

論甚正自應照辦除照會南澳鎮立將李英隆撤委  
將委劄繳銷一面將該鎮右營右哨千總缺刻日另  
選合例把總呈送貴提督考驗轉送覆驗拔補及行  
東藩司查照外相應咨覆等因到本提督准此爲此  
合咨貴鎮煩爲查照迅將鎮標右營右哨千總缺祈  
卽另選合例把總移送本提督考驗轉送覆驗拔補  
并於送考文內聲明輪補章程缺次云云

一咨 南澳鎮

道光十五年七月

十八日



札右營遊擊選弁防臺挑考糧缺稿

爲札飭派撥弁兵防臺并選送考拔糧缺事照得該營新建蘆灣橫樞西炮臺二座該營原設額兵不敷撥配本軍門業經議定增兵七十名連大角炮臺抽回兵三十名共兵一百名分臺防守以期得力所增兵數在水師各營抽撥以十月初一日彼此起截先經檄飭遵照辦理在案今該二臺將次工竣且值外夷貿易商船紛紛進口防臺巡海正關緊要亟須弁兵配防以資守禦合行札仰該署遊擊即便遵照一

俟新臺將次完工立將大角炮臺兵丁抽回三十名  
派弁管帶防守橫樞西兩臺先將應配一切軍火炮  
械抽撥配用分別兵技某項應添戰守若干核定分  
數挑選各技守兵餘丁呈送本軍門記名隨時拔補  
新添糧缺仍先於存營兵內預選精壯者開摺送核  
以便配防均勿稽延毋違

一札署本標右營遊擊

道光十五年七月 二十八 日

札飭防弁整飭器械稿

爲札遵事照得現屆深秋正夷商各船絡繹進口貿易其各國護貨兵船向年亦有收入萬山內洋寄泊查鎮遠南山大虎橫檔沙角各炮臺爲粵省門戶而沙角口門又爲夷兵船界限均應加意防範日夜分班瞭探以昭嚴密合就札飭爲此札仰該千總卽便遵照迅將該臺內軍火炮械務須逐件查點整齊總期件件有備人人得用設有殘損不甚合用者卽行稟請更換本軍門中秋節後親詣該臺閱視兵技並

演放大炮查點一切軍火如有絲毫損濕定將該弁  
當堂責革兵丁放炮均宜肅靜若臨時喊叫招呼雜  
亂不齊卽行插耳示衆決不稍寬仍先將該臺配防  
兵丁及軍火炮械限三日內逐細列摺繳核毋違

一札鎮遠 南山 大虎 橫檔 大角 沙角  
各炮臺防弁

道光十五年七月 二十八 日

籌海初集目錄

卷之三

外夷巡船到境應分別奸良撫懲稿

札香山協選弁確探夷船稿

致東莞縣侯令函

防夷調派摘要三十三條稿

籌備外洋內海調派購辦各稿

催運新炮並交杯子信稿

委勘金星門形勢繪圖確覆稿

大虎對面暗沙堆石無碍水道稿

籌議每年操演擬請

奏定章程稿

申明紀律整肅軍容親督操練稿

驗收新炮演試炮準普賞衆兵稿

新鑄大炮鐵未提淨連炸八尊咨請核辦稿

籌議春秋二季操練炮準師船稿

炮兵黃英得因傷斃命加賞卹銀稿

春秋訓練籌備一十五款稿

火器所以不堪久貯覆稿

截回外夷火輪船咨稿三件

爐匠逞刁捏控營員咨請嚴訊稿

新鑄大炮連炸十尊殘損三尊咨會叅辦稿

添建炮臺工竣新炮炸裂嚴責賠造摺

總督主稿

聞盜曾武果否溷跡陳村請飭縣飛速查覆稿

籌議節省經費歲修八臺三板炮單稿

拿獲假冒巡船人犯解辦稿

拿獲私鑄鐵炮咨請嚴辦稿

加派署叅將押犯赴省以脩顧問稿



外夷巡船到境應分別奸良撫懲稿

月之五日肅賀丹箋度登青覽初八日奉到初六日

闈中所發手翰恭諭鴻猷丕建駿望益隆指顧卽真

心香預祝

弟

賦性庸愚諸多粗率蒞茲十月於水師

營伍僅知大畧而於夷人情形尙難深悉茲荷垂詢

仰見虛懷若谷欽佩彌深查外夷商船例准停泊黃

埔而護貨兵船亦准寄碇外洋是夷商船以黃埔爲

限不准逾界夷兵船以沙角爲界不得擅入口門市

有常地例有常禁章程非不妥善無如日久弊生奸

徒陰行詭詐以致夷人水道益熟貪謀愈多今春

奏明增建炮臺指日工竣添鑄大炮已接踵歸臺弟昨

於初二日親詣橫檔督率將脩已將第一起運來大炮十二尊安置妥善並面飭洪發科立將上炮處堞牆一堵趕緊砌好以了橫檔一處工程查驗南山臺工已有八九大約臺面月內即可砌平敬煩速飭都司黃廷彪將鑄好八千觔大炮七尊六千觔大炮五尊照數裝配石船連配炮鐵彈及交杯子委弁迅即運來以便安配鎖遠其餘八千觔新炮十尊六千觔

新炮六尊又增鑄六千觔新炮二尊亦須於月內起  
運月底到臺俾接續安配妥洽試準高低則虎門海  
口各臺有備無虞矣如外夷護貨兵船來泊外洋似  
應照例馭之以恩設使犬羊野性不遵約束進口窺  
探弟卽親督將備弁兵請撥火船加以兵威若膽敢  
向內闖駛卽遵定制轟沉其船戮其桀驁以彰

國威然必察看情形隨機辦理斷不稍逞臆見致蹈孟浪  
設該船知風不進海口或作崇外洋或圖佔金星門  
等處藉端滋事應請嚴飭文員撤其買辦絕其接濟

提標兵船阻截虎門蕉門之口不使內奸外出香山  
大鵬弁兵堵拿一應小船以絕外匪勾結果能內無  
通風勾引之人外斷接濟水米之艇杜絕奸謀不通  
音信以愚昧度之當亦抵耳貼服矣總之以無事爲  
最佳誠如台諭雖小滋事端亦不好看耳現在海口  
各炮臺及官兵一切防範事宜已于閏六月內弟親  
身查驗雖未十分齊全然事事均已備並恐弁兵  
積習相沿不識輕重亦均札飭出示遵照弟到此日  
淺一切尙未身經務求不吝教誨俾得悉奉鍼規免

蹈隕越是所切懇再七月半間據秦副將面稟探聞  
外洋有夷兵船一隻內載夷兵八百名計日可到等  
語當卽令其派人打探訖無確耗茲於接奉台函後  
又據秦副將稟稱前由除飭確探飛報外緣承垂詢  
謹將管窺所及敬肅奉達云云

道光十五年八月

初九

日



札香山協選弁確探夷船稿

爲札飭事據該副將稟報探聞外洋新寄坡地方有  
外夷巡船八隻拋泊等情當卽批飭再加確查飛報  
去後現准署制軍函詢虛實卽應探明不得稍任含  
渾雖外夷護貨兵船歷年來廣多寡不同必須分飭  
認真防範以資有備除添製火船外合就札飭爲此  
札仰該副將卽便遵照刻速選弁設法查探務得實  
情星馳出具印稟覆候轉覆事關水師要件切勿稍  
延毋違

一札香山協

道光十五年八月

初九

日



致東莞縣侯令函

頃接祁宮保密函風聞新寄坡外洋停泊夷兵船八隻屬爲防範等情當卽飛飭分查所有虎門各海口炮臺師船軍火器械弟早整脩齊全現已密行調度如果該夷兵船不遵定例膽敢闖駛入口弟卽遵照奏定章程開炮轟擊惟海口遼濶非用火船不可其火船應配火器柴草等件業經飭營預脩務祈尊處先脩力勝四百擔上下帆檣齊全之空船八隻預爲撥定聽候調用不必卽來緣此時該兵船尙未入境固

不可張皇更不可大意有備無虞以免臨時掣肘閣  
下平糶奏績深悉兵機當更有良策見遺也特此布  
達云云

道光十五年八月初九日

防夷調派摘要三十三條稿

初九日肅復一函度登青覽初十日千里馬到虎展

誦郇雲領悉壹是弟昨接李都轉來函並委員賚到

庫銀一千兩備賞等云當卽札發中軍衙門收貯連

日飭查前項八船所覆不一尙未得實而香山又報

有外夷車輪船來泊金星門之稟亦經通飭小心防

範查此項車輪船前於十年四月間亦曾來過原未

爲患但此時旣風聞有夷兵船八隻停泊新寄坡外

洋之說適逢其會不能無疑况犬羊之性狡詐多端

有備無虞籌之宜早伏讀來示謂臨時如何分路安置並派委員弁囑令酌定寄請鈞衡仰見慎重海防於鎮靜之中默寓嚴整之意弟愧無善策喜遇明公

敢忘未雨之謀時凜前車之鑒所有現在調度籌備一切章程開摺送閱務祈指示進而教之海疆幸甚

豈獨

弟

叨厚愛已耶其第二起新鑄大砲現據尙協

臺委弁運到八千觔者四尊六千觔者四尊羣子封日子共計一千九百二十個又寄到司庫續發炮架銀二百兩俱皆分別安置給領矣知厘蓋懷特肅布

達云云

謹將籌備調度大略情形開列

一派香山右營守備選帶弁委二員分駕快船專司  
外洋探報

一派香山副將選帶兩營都守弁兵駕船分駐澳門  
金星門一帶專司彈壓察看情形嚴拿接濟隨機  
調度遇事稟報

一派前山營都司選帶弁兵專駐關閘不動聲色防  
守稽查

一派大鵬營叅將督率大鵬右營備弁兵船專防大嶼山水陸洋境查拿勾引接濟小船

一派大鵬營左營守備代巡大鵬左營洋面以免疎失

一調派提標左營遊擊選帶堅固米艇二隻並派千把一員配齊一應軍火炮械即日來虎聽候調撥  
一派提標左營守備督率輪巡弁兵駕船在於所屬之伶仃內外洋面往來巡緝嚴防接濟

一調派廣海寨遊擊選帶堅固米艇二隻並派千把

一員配齊一應軍火炮械卽日來虎聽候調撥

一沙角大角兩處炮臺因中泓過寬業已

奏明改爲望臺原派外委恐不得力現已改派把總防

守並督率守臺兵目分班晝夜瞭望專司號炮

一南山炮臺原派外委現已改建月臺安炮四十尊

應加添防兵連前共六十名添派把總防守並飭

趕砌臺面新炮一到卽可先行安置隨後趕砌堞

牆

一鎮遠炮臺更換新鑄大炮十二尊現到八尊已派

委員趕緊挽運上臺俟續來新炮運到即可一氣  
安配妥洽以便演試炮準

一橫櫓炮臺已置新炮十二尊現派署守脩周國英  
會同署叅將洪發科卽日下子演準

一大虎炮臺對面離臺九十八丈之外本有暗沙一  
道原議於沙上堆積碎石以杜夷船不能騎沙行  
駛則船近炮臺砲火更爲得力現尙未辦應請札  
飭洪署叅將會縣撥夫撥船裝運碎石拋積

一南山鎮遠橫櫓大虎四臺應添隨炮一切器具及



火器等項業於六月內一律辦齊刻下恐有潮濕殘損現已委員逐細點查以期核實

一南山鎮遠橫櫓三臺各安大炮四十尊各配防兵六十名又大虎炮臺安炮三十二尊原配防兵五十名當無事之際原可敷用刻下應照春間所議現已札飭叅將奈清將操熟親兵一百二十名一得確信卽專赴南山督率協濟其右營署遊擊何駿龍一據探確卽帶兵專管橫櫓中營守備帶兵專管鎮遠右營守備帶兵專管大虎以上四處緊

要炮臺專派該管將備四員分領操熟親兵各一百二十名臨期各管炮臺一座專司對準轟擊其總巡分巡應管洋務卽飭左營遊擊廣海遊擊代管其中右輪巡各弁委師船均跟隨遊擊李賢聽其調度

一蕉門口炮臺上年有外夷三板因此竄越防範最爲吃緊除添派世襲雲騎尉候補水師守備曾授綸一得確信卽帶兵十名前往督同原配弁兵協守第該臺坍塌過甚兵難棲止前經據稟轉咨行

縣修葺應請速飭香山縣趕緊修復俾資防守

一新涌口炮臺添派世襲雲騎尉候補陸路守備萬蔭昌帶兵十名臨期前往協守

一札飭提標左營後營各選勇壯兵一百五十名前營挑選勇壯兵一百名預將配執軍械整理齊全造冊呈送聽候調用

一函致東莞縣僱備四百擔以上空船八隻暗爲預備聽候臨時調虎裝配火船

一發銀札飭大鵬叅將購買松柴山草五百擔僱船

速運來虎以備裝配火船

一購買鐵鍊湊長一百丈預備聯束火船用

一購辦鈎鏟鎗四十杆

一購辦聯楷棍四十根

一購買大毛竹打通其節備裝藥線火船用

一製辦木桶裝貯火藥硝磺火船用

一購買舊魚網蔴繩等件預備火船上收束柴草用

一購買桐油預備火船用

一添備大小火箭火礮噴筒等項

一挑派壯勇舵兵熟諳水性水兵預備分駕火船

一選派弁委專管臨時裝配火船

一發銀交各臺防弁每臺添製大鍋二口預爲砌好  
以備衆兵合夥煮食而免分爨悞事

一發銀交右營遊擊買米分貯各臺以備臨時之需  
一橫檔大虎鎮遠南山炮臺炮架有歷滿年限現在  
霉爛應行更換以備應用業經據稟轉咨行縣未  
據勘報此一節最關緊要應請迅飭東莞縣速勘

造補

以上不過摘其大畧錄送其零星一應恕不瑣及

道光十五年八月

初十日

籌脩外洋內海調派購辦各稿

爲札飭速購樹枝柴草以脩火攻事據香山協秦副  
將來稟據望洋引水稟稱探得黑水夷洋現有外夷  
兵船八隻在彼游奕是否護貨來粵抑往別處未知  
確實等情到本軍門據此查黑水夷洋旣據探有兵  
船自應先事預防以免臨時棘手除師船炮臺官兵  
炮火業已一律派配齊全並飭日夜瞭探外惟是夷  
情叵測性近犬羊况外洋乘風行駛迅速有脩無虞  
最爲上策設使該夷等不知量力膽敢螳臂當車一

入口門卽犯

天朝禁令自應遵例開炮轟沉其船戮其桀驁以振

國威第海面寬濶火攻尤爲得力除船隻及火藥硝磺  
暨鐵鍊等項現已分投購辦其樹枝柴草一項查該  
營屬九龍淺灣沙螺灣等處最多合亟飭辦爲此札  
仰該護叅將立將發來庫銀一百兩查收迅飭兩營  
備弁速僱裝載石角之舊漁船十六隻採買大小松  
枝山草五百擔分載各船派弁運送定限文到三日  
內購送來虎立等配用所有應給船戶飯食銀兩卽



於來銀內核實發給毋得苦累窮民事關籌備邊防  
愈速愈妙該護將如敢稍任遲延定照違悞軍令例  
嚴叅不貸勉之毋違速速特札

一札護大鵬營叅將計發庫平紋銀一百兩

爲札飭購辦器械事昨據香山協來稟據望洋小艇  
探聞外洋新寄坡地方有護貨兵船八隻在彼買辦  
食物恐卽趁風前來等語查歷年護貨兵船均有數  
隻來廣向飭舟師炮臺認真防範有案今歲來船較  
多雖未入境應卽預備一切以期嚴整除提銀一百

兩札發大鵬脩辦柴草外爲此札仰該代辦中軍卽  
便選委妥弁購辦聯東火船細鐵鍊長一百丈另  
辦一丈二尺以外實竹鈎鑷鎗二十杆又八九尺長  
實竹鈎鑷鎗二十枝均要堅鋒五寸旁安四鈎又趕  
辦連楷棍四十根杆長四尺八寸尾長一尺五寸務  
於十日內一律辦齊聽候分撥應用事關邊防緊要  
毋任遲延需用銀兩卽於前發項內如數提用愈速  
愈妙切切毋違

一札代辦中軍

爲再行札飭購辦事照得本軍門昨經札飭購辦聯  
船鐵鍊鈎鑷鎗連楷棍等項以備堵截夷船應用尙  
有應辦物件合再札飭爲此札仰該署遊擊遵照選  
委妥弁購買大毛竹打通其節備裝藥線另辦小木  
桶八十個裝貯火藥硝磺又買舊漁網及蔴繩等件  
預備火船上收束柴草之用又預買桐油四百斤添  
備大小火箭火礮噴筒再買備食米等項均在前發  
項內提用並卽挑選壯勇舵兵十名熟諳水性兵四  
十名預備分駕火船並預備腳船八隻及選派弁委

專管臨時裝配火船切勿怠玩飭知各臺防弁每臺添製大鍋預爲砌好以脩衆兵同夥煮食而免分爨悞事仍有未盡事宜均卽核明脩辦並將挑脩及派撥各緣由次第先行稟覆毋違

一札本標右營遊擊

爲札遵事照得現據該副將稟報據望洋小艇探聞外洋新寄坡地方有夷兵船八隻拋泊等情查外夷兵船護貨來廣歷年皆有均未如是之多亟應預爲設施以脩不虞合就札飭爲此札仰該副將卽便遵

照帶領兩營值巡都守弁兵管駕舟師分駐轄屬澳門金星門一帶洋面專司彈壓並察看情形嚴查奸民私販小艇偷越接濟一有前項外夷巡船到境務須查確實情隨時調度密行飛稟此係特委要件務須嚴束備弁兵丁毋得稍存玩視及架事圖功愼之勉之仍將遵辦調度巡防緣由先行通報毋違

一札香山協

爲札飭端派查探事照得云云同前亟應預爲查探俾免闖入內洋合就札飭爲此札仰該署守備卽便

遵照限文到日刻速在於營內選帶弁委二員分駕  
快船專在萬山及擔杆山一帶外洋晝夜瞭探遇有  
前項夷兵船一經瞭看明白數明幾隻立即星飛稟  
報如無兵船到境亦限三日一次具稟差弁報聞設  
敢稍有含混以致坐失機宜定照軍法插耳責革仍  
將遵辦起身緣由先行具稟交差呈覆凜之毋違

一札香山協右營守備

爲札遵事云云亟應預爲酌派以免疎忽查該護叅  
將輪值下班總巡今防夷吃緊所有該營右營大與

山水陸洋境尤爲扼要雖設有守備專防駐守仍恐  
聲威不壯必須派委大員方資得力合就札飭爲此  
札仰該護叅將卽便遵照刻速管駕舟師馳赴大興  
山洋面督率署右營守備何觀鋒常川把截扼要嚴  
拿勾引接濟小艇至該護叅將總巡洋務卽着選委  
代巡免致顧此失彼仍將赴防及委代各緣由通報  
毋違

一札護大鵬營叅將

云云亟應預爲分佈以期有備查該營所屬伶仃內

外洋面最爲扼要且常有夷商船隻寄泊亦係總滙之區合就札飭爲此札仰該守備即便遵照督率輪巡弁兵管駕舟師在於該處洋面往來巡緝並嚴查奸艇接濟以及偷竊匪船務須實心實力切勿仍事顛預致干撤叅並先將遵辦緣由卽行稟覆毋違

一札本標左營守備

云云除札飭中路各營一體加緊瞭探巡防並飭沙角南山等炮臺整脩一切軍火炮械防禦惟恐該夷等登岸滋事該營專守澳門而所屬關閘汛把截最



爲扼要亟應預爲嚴密防範合行札飭爲此札仰該署都司卽便遵照選帶弁兵專駐關閘不動聲色防守稽查務須嚴加管束毋許怠玩偷安致干重咎其關閘城垣一切如坍塌倒處所立卽移縣修整毋悞仍將遵辦緣由稟覆查核毋違

一札前山營都司

爲札調防範事云云同前應卽預爲防範除札

該營中路

值巡守備各營

一體加緊瞭探巡防外但中路各營炮臺

及管轄洋面均應加緊巡防現在將備舟師不敷調

撥合就札調爲此札仰該署遊擊卽便遵照限文到  
日卽於營內挑選堅固米艇船二隻幹練千把總一  
員揀選配船炮火軍械旗幟等項務須件件齊足一  
律鮮明鋒利該將刻速親督來虎聽候派撥切勿稍  
延大干咎戾仍將起程赴防日期具文通報毋違

一札本標左營遊擊 廣海寨遊擊

爲札飭加緊瞭望專司號炮事照得沙角一臺業已  
改爲瞭望號令之臺較前尤爲緊要前派外委防守  
恐不得力是以改派該把總赴臺守禦茲據香山副

將稟稱外洋新寄坡地方現有護貨兵船八隻在彼買辦食物誠恐犬羊之性不知

禁令窺探內洋亟應加緊嚴防合行札飭爲此札仰該把總卽便遵照務須時刻認真督率記委兵丁分定班次晝夜瞭望仍整備一切軍火炮械如瞭見夷兵船駛至星卽撥兵飛報本軍門一面准備炮火設該兵船膽敢向口內行駛卽行下子對準轟擊並卽施放號炮知會大角等臺一體預備如敢稍有違誤或經本軍門差人毋論日夜往查有不實心瞭探或輪

班之兵日間並不登高瞭望夜間安臥室中者定卽提轅插耳責革該把總督率不力亦並責革決不稍存姑惜凜之切切毋違

一札沙角炮臺把總

云云同前亟應預爲分佈以資嚴整查南山鎮遠橫檔三臺各安大炮四十尊各配防兵丁六十名又大虎炮臺安炮三十二尊原配防兵丁五十名當無事之際尙可敷用刻下防夷吃緊應照本軍門春間所定章程卽行添足兵六十名並卽轉飭把總莫在田

認真操練合就札飭爲此札仰該

叅將遊擊

即便遵照一

有前項夷兵船駛入萬山確信刻速專赴

南山橫備

並飭

令該營守備專駐

鎮遠大虎

均各帶領平時操熟親兵各

一百二十名各帶本身器械照冊分赴各管炮臺一

座督率協力防範如遇夷兵船膽敢闖入卽行開炮

下子對準轟擊切勿坐失機宜前車可鑒其各自保

功名至

該叅將總巡營守備分巡

洋務至期移交調虎之本標

左營遊擊管領其本標中右兩營輪巡各弁委師船

均跟隨左營遊擊聽其調度切勿疎忽毋違

一札本標中軍叅將 右營遊擊

云云同前亟應預爲

調撥  
等度

以資防守查蕉門海口上

年有外夷三板由此竄越防範尤爲吃緊除添派世襲雲騎尉候補守備曾授綸一有前項夷兵船確信酌帶該營兵十名前往督同原配弁兵協守外第該臺現在坍塌過甚兵難棲止前經據稟轉咨行縣修葺迄未興工合就札飭爲此札仰該署遊擊卽便遵照刻日脩移香山縣多僱工匠趕緊修葺完竣具報並由營選撥壯兵十名交會授綸管帶以便臨時帶

領赴臺均毋延違切切

一札本標右營遊擊

云云防範尤爲吃緊合就札飭爲此札仰該候補守  
備卽便遵照一有前項夷兵船確信刻速束裝稟請  
何署遊擊派撥本標右營兵丁十名管帶前往該臺  
督同原配弁兵一體協力防範堵截毋稍大意干咎  
毋違

一札候補守備曾授綸

云云該營新涌海口關係緊要原防弁兵單薄恐難

得力臨事必應添派弁兵協同防守方免疎虞茲查有該營承襲雲騎尉候補陸路守備萬蔭昌堪以調撥合就札飭爲此札仰該叅將撥兵十名卽便開單轉飭該襲弁遵照俟有兵船入境確信星卽率兵攜帶執用軍械前赴該臺協同原派弁兵嚴行守禦務須嚴密稽查認真管束毋許怠玩偷安致干重咎毋違

一札本標中軍

爲劄知事照得現據香山協稟報據望洋小艇探聞



外洋新寄坡地方有夷兵船八隻拋泊等情查外夷兵船護貨來廣歷年均有惟本年較多雖尙未入境不可不預爲籌備除分飭水師各營臺汛舟師嚴密備禦外查本標鎮遠南山大虎橫檔各炮臺最爲防夷扼要第臺憑炮力必須炮架堅牢方期得用茲各該臺安炮架多有霉爛若不迅速造辦必至貽悞前據臺弁稟請修葺早經轉咨督院檄飭各在案迄今未據勘估興工刻下正當防夷吃緊之際難容再緩合就剖知爲此札仰該縣官吏卽便遵照刻速委

員前赴各該臺將炮架逐一勘估迅速修製切勿稍延竝望毋違

一 割東莞縣

云云刻下雖未入境亟應預爲布置以免臨時周章查本標右營大虎炮臺對面離臺九十八丈之外本有暗沙一道本軍門前議於沙上拋積碎石安釘明樁以杜夷船不能騎沙行駛則船近炮臺炮火更爲得力業經咨明前督部堂在案該叅將現在辦理炮臺工程應委就近督理除函達督院外合就札飭爲

此札仰該叅將即便遵照移會東莞縣籌辦夫船裝運臺上所遺碎石拋積該臺對面暗沙之上現當防夷吃緊之際該員素稱能事定當妥協辦理毋違

一札署增城營叅將

爲札飭挑定勇壯兵丁聽候調用防範事照得據報外洋新寄坡地方有護貨夷兵船八隻等情雖尙未入境不可不預爲籌防除札

中路各營該營值巡守備

一體加

緊瞭探巡防並飭將各炮臺整備一切軍火炮械防禦外惟虎門直達省城水陸均關緊要恐該處兵丁

不敷應用應於隣營預行挑定俟有確信即可調用

不致臨時周折合就札飭爲此札仰該

遊擊都司

即便遵

照刻將該營額兵內挑選年力勇壯兵一百五十名

預將執用軍械整理齊全卽行造冊呈送聽候本軍門隨時調用均勿稽延稍存玩視致干重咎毋違

一札本標左營遊擊 後營遊擊 前營都司

道光十五年八月 十一 日

催運新炮並交杯子信稿

初九十三連肅兩函專差馳遞計先後均邀台覽

弟

連日督率將脩查驗各臺在前已脩軍火並趕辦續  
脩一切器具務使適用得力斷不任稍有草率十四  
日叅將余清會哨回洋當卽委令督辦鎮遠上炮事  
宜茲據稟稱遵諭嚴督匠役連夜趕搭馬頭於十五  
日搭成十六日早潮已將第二起炮位挽運四尊上  
臺安置其餘四尊明日早潮約可全運上臺查鎮遠  
原議安置新炮十二尊茲已運到八尊尙少八千觔

者二尊六千觔者二尊仰祈速催尙副將轉飭炮廠速將現已鑄成之炮及交杯子一並趕運來虎俾得一力運至鎮遠以資防禦等情到弟合將二起新炮挽運歸臺情形專肅布聞以抒蓋念務祈卽飭尙副將將在後新炮派弁趕運前來其交杯子一項刻已鑄成若干亦希一併運來以便分配再十六日巳刻接據香山秦副將來稟內稱連日探得新寄坡係紅毛地方距粵東水程約七八日但事隔重洋有無戰船在彼是否來粵尙未得有確信等語弟查外洋行

船以更數爲準每更以六十里爲度如果新寄坡地方離廣七八日則應在四千餘里之外海洋風汐靡常遲速原難逆料第夷船帆檣便利而夷兵船向無艑樓行駛尤爲迅捷愚昧之見不患其來患我無備昨承李都轉寄來銀兩未便吝費悞公業已分投趕辦弟素知經費難籌是以未敢放手細細籌之尙覺不齊耳容再續泐云云

道光十五年八月 十六 日





委勘金星門形勢繪圖確覆稿

爲札委履勘繪圖確覆事照得香山協屬金星門洋面現有夷船駛往寄泊均經批飭嚴加防範在案但查金星門洋面山形海勢出入通達門戶以及各口門水勢深淺澳內水面寬窄近岸居民若干何處最爲扼要何口可通何處本軍門尙未深悉亟應確查以期悉知形勢合就札委爲此札仰該署都司卽便遵照限文到日迅速坐駕快船帶同營內諳練畫匠務將金星門形勢細心逐一履測將扼要門戶水道

繪圖一幅貼說註明具稟專差星馳賚送來轅以憑  
查核此係特委要件切勿稍延亦不得稍事張揚切  
切毋違

一札香山左營都司

道光十五年八月十八日

大虎對面暗沙堆石無碍水道稿

十九日祇奉十八日來函當日泐復交差賚回度已  
登覽二十日戌刻千里馬到虎續展十九日闈中覆  
翰聆悉十三十六日兩緘均邀青照至前擬籌備調  
度防夷章程諸多不到迺荷謬加採納溢賜詡揚仰  
徵大度謙冲益令下懷悚愧自維才識短淺其中應  
作如何添改之處務求不吝教誨時錫鍼規曷勝感  
幸弟連日專差查探亦無的音正費躊躇伏讀台諭  
防夷一事我輩總當預爲從長計議二語並誦尊示

於應辦之事屬令放手辦去云云益見慎重防夷有  
備無虞至意敬服彌深愚見無論事之虛實均應未  
雨先籌况上年之役皆因官兵素未習練以致遇事  
周章今荷先機籌畫俾得逐件整理庶水師官兵藉  
以操練一番惟所製一切除火器難以久貯外其餘  
各件仍可留作他年不虞之用一舉三善皆出明公  
所賜海疆實爲幸甚曹飛揚二十日業已到虎俟廣  
海師船到時令其領帶東莞侯令現已會營估辦炮  
架卽日興工惟蕉門兵房香山葉令尙未勘估至大

虎水面一片汪洋其緊對炮臺九十八丈之外本有淺沙一道淺沙之外又係深水宛似天生界限弟擬於沙面拋積碎石十餘堆每堆寬僅丈餘高只七八尺使夷船見而畏淺於水道毫無妨礙應否辦理之處尙乞鴻裁示覆十九日尙協委弁運到第三起炮十二尊除應配鎮遠四尊已於二十日挽運上臺其餘八尊現飭趕搭南山馬頭知會李令督匠趕砌臺面矣知厯蓋懷特覆云云

道光十五年八月 二十 日



籌議每年操演擬請

奏定章程稿

八月二十日肅覆一函度登記閣二十八日接到海關彭三兄寄銀一千兩書中述悉係出垂念弟處籌備不敷故有此舉益見體恤兵艱鼓勵士氣有備無患慎重防夷非但弟諸事不致掣肘卽將備弁兵亦莫不同深藝舞而踴躍三百也海疆幸甚感佩奚如連日瞭探前船均無確耗所調左營廣海師船已先後到虎分任巡防其香山大鵬將弁師船及左營備

弁均已據報遵札各歸段落其預選前後左三營備調弁兵均已挑配齊全造冊呈候調用其預購柴草食米均已堆貯齊全其添備器械及號令紅旂並隨炮應添一切均已分投製辦其各項火器並預備火船上應用各具均已派弁各司其事其舵兵水兵均已選有輕捷勇壯者八十名刻下再將海關寄項併入添製各項器具較前更覺裕如月望前後總可一律整齊彼時正當演炮之期擬先飭將備領帶選定親兵四百八十名分臺演習然後弟親赴各臺申明



紀律操練一番賞優罰劣使向未經識之弁兵目擊身經俾獲咸知律不可失令不可違庶訓練漸就精純雖懦弱可成堅銳並請自今以往每年於二八月專派中右兩營將備督帶親兵四百八十名協同原派守臺弁兵演習炮準操練各項火器務使心思手法遠近高低悉中竅要並調配中左右及香山大鵬左右師船共十隻定期齊集虎門演習水操及鳧水爬桅等技演練純熟後弟親臨較閱分別優劣施以賞罰如此辦理不獨海口聲威壯益加壯更期官

兵操練精愈求精似與籌海防夷均有裨益應請於  
奏報炮臺工竣添兵摺內附片聲明庶以上慰

聖懷並可下堅衆志惟愚昧之見諸恐未周尙望衡奪施  
行至威遠新臺臺面地基約在重九前可以工竣前  
到新炮八尊業已上臺安置八月三十日又到新炮  
八尊卽於三十初一兩日亦均挽運歸臺應配用舊  
炮刻亦次第安置惟炮洞塚墻石料尙未運到應請  
飭催李令趕辦又蕉門炮臺兵房不堪棲止前山營  
關闌墻垣地基坍倒過甚該二處均關扼要且費用

不多請再飭香山葉令趕緊修理於巡防更昭整肅  
矣弟昨已批覆香山秦副將飭令前次探報之張亞  
成前往確探虛實現尙未據覆到至各臺弁兵原係  
照常駐守毋庸更動而所調師船將領及備調弁兵  
且俟探明如係訛傳再行撤防似亦未晚鄙見固不  
可張皇更不可大意未識高明以爲何如諸容潔誠  
趨謝面申賀悃云云

道光十五年九月

初一日



申明紀律整肅軍容親督操練稿

重陽前二日祇奉環章脩悉前泐三函均登記閣過

叨獎飭益切惶慙

弟

巡防輾碌昕夕不遑頃據委員

洪署叅將稟稱遵查威遠臺面地基業已完工炮洞

堞墻已砌造六個試演炮位無碍等因

弟

刻已派弁

紮就木筏筏之兩旁加以蓆墻中安蓆帆如船之式

趁潮水甚漲之際放入中泓試演炮準演放火器札

委中軍叅將余清帶領親兵一百二十名前赴威遠

新臺署右營遊擊何駿龍帶領親兵一百二十名前

赴橫檔月臺署右營守備周國英帶領親兵一百二十名前赴大虎代辦守備之把總喻成宗帶領親兵一百二十名前赴鎮遠會同各臺原派防兵二百八十名千把等七員定於初十日排齊隊伍領赴各臺預爲試演並委署叅將洪發科前赴鎮遠督率弟擇於十一日親詣各臺驗收新炮卽統率官兵將新舊大小炮位一律試放逐炮配足藥彈羣子演習準頭以壯聲威而申賞罰俟事畢當再縷布以慰蓋懷云

附啟者正在封函間適余叅將差目稟稱遵奉憲諭  
着將各臺新炮四十尊先行下子演試一出等因卑  
職卽於初八日會同洪署將親詣威遠新臺演放新  
炮至第三尊八千觔一位配準藥子燃火試放不料  
鐵未提淨當卽炸斷幸未傷人鎖遠炮臺演試第一  
尊八千觔大炮亦係配準藥子甫一點放卽行炸碎  
打傷兵丁二名合先稟明等語弟當派弁趕赴炮臺  
諭令余叅將改用藥線施放官兵閃避一傍毋致再  
傷兵丁務將新炮四十尊全行試過有無炸裂再行

稟覆以憑咨請核辦合先奉聞並祈飭縣將造炮匠  
人管押在省以便賠造是爲切禱

道光十五年九月

初八

日



驗收新炮演試炮準普賞衆兵稿

九月初八日敬達一函知登鈞覽嗣把總倫朝光旋  
省會將炸碎炮鐵數塊交其轉送尙副將代呈諒邀  
台閱弟於初十日飭令中右兩營將備帶領親兵四  
百八十名分赴各臺督同駐臺弁兵演習一切十一  
日弟親身赴洋舟次沙角卽據叅將余清稟稱威遠  
又炸六千觔新炮一尊又據委員洪發科稟稱鎮遠  
又炸八千觔新炮二尊六千觔新炮三尊統計先後  
共炸新炮八尊等語聞之殊深駭異十二日凌晨弟

親履各臺逐細驗看所炸各炮有全行炸碎者有炸去炮尾者有炸成十餘塊者有飛陷山腰者有落沉海底者檢閱鐵塊有形似蜂房者有孔內鏤出細沙升餘者惟各炮炮口在前一段均極堅固斷而未炸弟細心窮究始悉其詳另容面達驗得兵丁黃英得杜奇勝二名頭面腿脚均被炸出火藥轟傷恐難全愈除又加賞銀米延醫調治並看得臺面地基炮洞垛墻坍塌脫落兵房器具傷殘亦甚急須修整以免官兵露處惟是

奏添新炮原爲增我

國威震懾羣夷而設不料奸匠心貪致使弁兵膽怯倘於  
防夷緊要之時炮炸一尊轟倒一兵則衆心惶懼前  
車是鑒倍覺寒心弟履勘後深慮衆兵藉詞畏縮當  
卽齊集官兵諭以利害示以恩威親身督率立將未  
炸新炮逐一裝足彈藥各放三出仰邀福庇均未炸  
裂當將三臺膽壯燃炮兵丁七十二名每名加賞十  
倍旣賞之後雖膽怯之兵亦頗知自奮復於十三日  
早督同將脩分詣各臺將紮就木排炮靶安放中流

演試新舊各炮準頭預將調赴炮臺親兵四百八十名及原配各臺兵二百八十名派定每兵四名管炮一尊對準炮靶轟擊如能中靶者卽賞大銀牌四面四臺炮準共計中靶四成有餘其餘未中炮子均係高低左右相離不遠除將中靶各兵加賞外其餘各兵普賞錢米施放火器亦均合式察看兵情尙知踴躍又率同將脩細看橫檔新炮十二尊均屬堅固又威遠新炮十六尊鎮遠新炮十二尊除已炸八尊外其餘二十尊內一尊炮尾有裂痕一道又六尊均于

燃火之後炮子未出之先門眼中先響一聲却未炸裂揆厥所由顯係門眼內孔隙所致其響而不炸者係孔隙尙不過深以上六尊自應留存臺內減藥施放其餘十四尊業均施放五次尙屬結實除諄飭將備督率弁兵勤加練習弟卽于十四日轉棹仍令將備整隊回營外知承錦念合將演試各臺炮準及驗收新炮緣由虔肅奉聞至續到新炮十六尊舊炮六尊容俟委員會同洪發科如法試放有無炸裂另再佈達弟現回署清理積塵擬於二十左右趨賀大喜

細剖積忱也專此云云

道光十五年九月 十四 日

新鑄大炮鐵未提淨連炸八尊咨請核辦稿

爲演試各臺新炮事據署增城營叅將洪發科本標  
中軍叅將余清署本標右營遊擊何駿龍會銜稟稱  
竊照省中運到新鑄八千觔炮二十位六千觔炮二  
十位均經分配威遠鎮遠橫檔三臺安置緣奉憲臺  
札飭卑職余清會同卑職發科前往各臺將前項新  
炮逐一演試卑職發科余清遵於本月初八日會同  
先赴威遠鎮遠二臺督令弁兵將八千觔炮每位裝  
配火藥二十觔六千觔炮每位裝配火藥十五觔各

用封口子一個羣子十個逐位演試內演得威遠炮臺八千觔炮一位當時炸斷又鎮遠炮臺八千觔炮一位亦被炸碎打傷該臺兵丁黃英得杜奇勝二名當卽稟明在案續于十一日卑職發科清駿龍等分往威遠鎮遠橫檔各臺遵奉憲諭改用藥線燃放卑職清前往威遠炮臺再行逐炮試放又炸碎六千觔炮一位卑職發科前赴鎮遠炮臺又炸碎八千觔炮二位六千觔炮三位併將兩臺器用什物兵房官署及新砌牆垛炮架等項多有損壞惟卑職駿龍前赴



橫檔炮臺演放第一次解到新炮十二位絲毫無損  
隨查兵丁杜奇勝一名被傷尙輕黃英得一名受傷  
較重除分別賞給銀兩著令趕緊醫調外卑職等檢  
看炸炮碎鐵渣滓過多腔內高低不平更多孔眼所  
有威遠鎮遠兩臺先後炸碎新炮八位及被傷兵丁  
飛鐵打傷各項飭據各臺弁查開稟報前來理合列  
摺具文稟報伏候察核轉咨督憲核奪施行等情併  
送清摺一扣到本提督據此爲查前項新鑄大炮專  
爲防夷

奏明添製今甫運配到臺一經下子演試竟致炸碎八尊並打傷兵丁二名及損壞各項奸匠圖利偷工傷兵奪氣關係匪輕除初八日炸炮二尊業經函達茲本提督親往督演另達外合將該將等會稟前情先行咨會爲此合咨

貴部堂請煩查照核示施行

計開

威遠炮臺被炸新炮二位

內

八千觔炮一位

初八日炸斷連封日子一個羣子十個俱炸去

六千觔炮一位

十一日炸碎連封日子一個羣子十個俱炸去併炸碎炮架一個

鎖遠炮臺被炸新炮六位

內

八千觔炮三位

內一位初八日炸又二位十一日炸連封日子三個羣子三十個炮

架三座均炸碎

六千觔炮三位

十一日炸碎連封日子三個羣子三十個炮架三座均炸碎

另八千觔炮一位

炮尾有裂痕一條

另炸去八千觔封日子十個六千觔封日子七個

打傷兵丁二名

黃英得

頭面兩足俱被重傷所穿號衣帽燒去

杜奇勝

頭面兩足損傷所穿號衣帽燒去

一 咨 督院

道光十五年九月 十四 日

籌議春秋二季操練炮準師船稿

爲新建炮臺將次竣工籌議操練章程咨請銜奪會  
奏事竊照虎門海口爲中路咽喉省城屏翰夷商絡繹  
良莠參差去秋因水師疎防致被夷船闖入本年二  
月會銜

奏添炮臺增鑄大炮奉到

硃批所議周妥之至務要練習精熟方能得力震懾羣夷  
也欽此准咨欽遵在案本提督於督催臺工之際往  
來洋面悉心籌畫此時新炮新臺工程將竣右營兵

數不敷已荷前部堂照議抽撥俟炮臺工竣一併入  
奏查虎門新舊炮臺現共八座安設新舊炮位共二百  
三十四尊聲威已極雄壯凜遵

聖訓必須操練精熟方能得力惟是臺依山建船趁潮行  
其操練之方不同陸地攻堅致遠第一以炮準爲先  
次則練習師船炮火行占上風再則募選泗水壯兵  
儲備火船之用此外則精製一應火具臨事則裝備  
火船然官兵必須勤習方期日漸精純本提督擬于  
每年二月杪八月初春秋兩次督飭中右兩營將備

率領城汛親兵五百一十八名分赴威遠鎮遠橫檔  
大虎鞏固永安六臺連原派防兵三百三十名派定  
每兵四名管炮一尊專司練習炮準其沙角大角防  
弁管領防兵五十名專司號炮號旂再調提標中左  
右三營米艇六隻香山大鵬各左右營米艇四隻共  
船十隻每船派兵六十四名共兵六百四十名每船  
派官一員共官十員春季以大鵬營叅將總領水操  
秋季以提標左營遊擊總領水操仍兼管各項火器  
及斗手爬桅水兵泅水春秋兩次預期札調齊集海

口先飭將備教練各臺炮準務使遠近高低悉中肯  
築師船駛風調餞務使靈便占風鎗炮尤須聯貫水  
兵一項以能浮能潛者爲最一應火器總期力能致  
遠如此操練漸熟本提督親臨較閱便捷勇壯者予  
以破格之賞笨劣不振者立即分別懲辦申之以號  
令督之以賞罰務使令一心齊官兵咸知感畏至于  
炮臺師船動靜雖殊而聲勢相依援應實關表裏似  
此按期練習每次以十日爲度仍另選舊炮十尊運  
置公所按十日一次派弁專督挑就各兵演習裝藥



下子操練一應手法久而自熟得力可期從此精益求精講求不懈不特有備無虞而仰仗

天威可以懾服羣夷矣業精惟勤炮準師船原當勤練俾水陸聲威互相犄角第經費有常籌款誠非易易卽如春秋兩次調操每次僅止十日每次各臺大炮止各放三出師船止操三次業已力加樽節萬難再減核計兩次應用火藥羣子及封門鐵彈裝藥布袋加以備辦火器添製應用物件設再體卹兵艱籌給口糧賞號合計所需度支甚鉅捫心午夜實費踟躕本

提督職任所司不得不通盤上達其應如何籌畫以垂永久或所議未獲妥協應聽鑒核合將籌議操練章程並歲需火藥鐵彈等項應行籌辦緣由理合咨明查照核復施行

一咨 督院

道光十五年九月 二十一日

炮兵黃英得因傷斃命加賞卹銀稿

爲稟報演試各臺新炮事道光十五年十月初八日  
准兼署督部堂祁咨開准貴提督咨開等因准此查  
炮位爲軍火利器必須煨煉純熟方期轟擊得力若  
偷減工料草率製造必致施放炸裂今前項新鑄大  
炮係爲防夷

奏請添製該監製官員自應督率工匠實工實料煨煉  
鑄造方資得力而免貽悞乃甫經演試竟致炸碎八  
尊之多並傷及兵丁損壞兵房官署及新砌墻垛砲

架等項夷商往來屬目之地成何事體殊爲可恨且炸碎炮位據經演之署叅將洪發科等查看碎鐵內多渣滓攙雜膛口又高低不平兼多孔眼則爲該砲匠偷減工料已屬顯然所有炸碎炮位應卽着砲匠等賠鑄補額其受傷兵丁黃英得等亦責令保領醫調至委員黃廷彪等在廠監鑄如果認真稽查工匠何敢偷減工料該員經盧前部堂以任事實心兩次歷保

奏留自應激發天良出力稽查督造乃安置橫檔之炮

尙無損壞惟威遠鎮遠各臺炮位竟致鑄造偷減草率不堪演試何以重防禦而振軍威實屬大負委任查嘉慶十四年鑄造大炮演試炸碎當將炮匠發縣審訊委員擗頂着賠此次應卽照辦姑念炮位亟須鑄復暫從恩寬已面諭藩司發銀四百兩交黃廷彪賚往移交卸任東莞縣李繩先將炮臺城樓堞口及軍器水缸等項妥爲修復前項銀兩仍由該匠等賠繳當加愧奮實力妥辦以觀後效倘再不加工煨練妥造工匠發縣嚴審黃廷彪等立予嚴叅治罪不

但摘頂而已除札布按二司速將銀四百兩卽交黃廷彪賚往移交修復並嚴飭該委員等督匠將炸碎炮位及驗有裂痕之八千觔大炮並打斷鳥鎗失去封口等項一併勒限炮匠鑄造補額兵丁黃英得等飭令委員及該匠等醫治務痊所有醫藥之費及由司現發銀兩均責令該監鑄委員及炮匠等繳還至監鑄委員黃廷彪廣州協右營守備劉得陞應如何懲儆之處仍俟炮位鑄復演試完固由該司等議詳核辦及札廣州協遵照將委員都司黃廷彪等嚴加

申飭務速凜遵監鑄復額稟覆以贖前愆倘再漫不  
經心從重叅懲不貸外相應咨會查照等因接到來  
咨當卽札飭余叅將督率臺弁黎志安迅將受傷兵  
丁黃英得等趕緊醫調去後茲據該叅將稟稱竊照  
配防鎮遠炮臺兵丁黃英得杜奇勝二名因演放新  
炮炸裂受傷稟明憲臺在案茲據防臺署千總黎志  
安稟稱黃英得因火氣攻心調治不痊於本年九月  
二十四日身故其杜奇勝一名現仍趕緊調治等情  
查該兵黃英得演炮被炸受傷茲火氣攻心身故情

殊可憫除飭守備照例賞給白銀脩棺殮葬並飭黎志安再延妥醫將杜奇勝趕緊調治肅單稟明等情到本提督據此相應咨明查照等因准此查兵丁黃英得演炮被炸受傷身死情殊可憫應卽在於賞犒項內提銀二十兩飭發轉給該故兵親屬收領以示體卹至嘉慶十四年鑄炮演試炸碎轟斃兵丁當經飭據布按運三司議詳在於鑄炮工匠名下追銀一十二兩四錢二分給該故兵親屬收領營葬今兵丁黃英得旣因演炮被炸傷命亦應在於爐匠李陳霍



等名下追銀一十二兩四錢二分呈繳給發該故兵親屬收領以爲營葬之資准咨前因除札標下中軍副將在於賞犒項內支出銀二十兩移交水師提標中軍叅將轉給故兵黃英得家屬收領仍將支過銀數日期報查及札布政司會同按察司移行遵照嚴飭炮匠李陳霍等刻日呈繳銀一十二兩四錢二分移交水師提標中軍叅將轉給故兵黃英得家屬收領並移行將受傷兵丁杜奇勝飭令趕緊延醫調治務期速痊並札廣州協移行遵照外相應咨覆等因

到本軍門准此合就檄行爲此牌仰該叅將照依事  
理卽便轉行遵照俟移交銀兩到日轉給該故兵黃  
英得家屬收領仍將支過日期通報毋違

一行本標中軍

道光十五年十月初十日

日

春秋訓練籌備一十五款稿

爲演習炮準操練水軍需用藥彈及應備一切謬陳  
鄙見再行咨請飭議事竊本提督昨將籌議操練章  
程咨請鑒核旋荷鈞覆以炮位爲防夷禦敵之具必  
須練習準頭方足以濟用但年中操練所需火藥羣  
子賞號等項需費甚鉅亟應籌議詳辦以期經久准  
咨前因除行布政司照依咨內事理即便會同按運  
二司督糧道迅將每年春秋兩次操練前項大炮每  
操十日各放三出需用火藥封口彈子併調集師船

配兵練習水操所需賞犒等項應如何籌撥備支其裝藥布袋備辦火器添製應用物件各項每年需製辦若干其調練各兵原有日給口糧操練是其分內之事今議體卹兵艱籌給口糧賞號應如何按日及分別等第賞給以示限制卽一並悉心籌議詳覆以憑移知會核奏明辦理相應咨覆等因到本提督准此仰見慎重海疆於籌備之中仍寓卹兵至意欽感良深惟是籌備各項必須通盤計算有應造存留爲儲備者有應每年造辦列爲歲需者有應按季製辦

者有應遞年歲修者欲善其事先利其器固知有備無虞最爲上策第經費有常又不得不倍加撙節本提督悉心籌畫僅就思慮所及將應辦各件繕列清單咨請衡奪其間有未獲周妥之處或應增減或應刪改均祈鑒核再行飭議確核示覆云云

計抄清單一紙

共十五條

一各臺大炮應添火藥封門鉄彈群子以資儲備也  
查威遠鎮遠橫檔大虎沙角大角鞏固永安炮臺  
八座共安設大小鉄炮二百三十四尊每年春秋

操演炮準每次下子各放三出兩次各放六出每年需用火藥並封門鉄彈各重一萬一千九百餘斤歲需羣子計重一千零八十八斤十兩以上封門鉄彈羣子兩項內新炮五十六尊業經每炮鑄有封門子四十個羣子各四百個卽以此項留爲儲備其舊炮一百七十八尊本有儲備存貯營局雖多寡不能盡一似可均毋庸添造惟配炮火藥向無儲備歷年正九兩月各臺演洗炮位均于鎗兵儲備藥內墊用隨時請領造補歸款此時操防

緊要每歲春秋又須演習炮準用藥甚多營中儲  
備不敷墊用况造藥需時若不預爲儲備勢難濟  
用應請籌添儲備大炮火藥三萬六千觔分貯中  
右兩營有備無虞於海防實有裨益

一新舊大炮宜添炮蓋以免銹蝕也查八臺大炮共  
二百三十四尊安架分置各臺日晒雨淋毫無苦  
蓋不獨炮架木質易於朽爛鉄炮每多銹蝕應請  
各添一寸厚木板二塊照依炮架長短做成人字  
式炮罩以資苦蓋而免銹蝕所費工料無多與炮

火實有神益

一各臺應添脚船以資濟渡也查虎門海口新舊炮臺八座扼喉控背形勢聲威極其雄壯第設險原宜扼要而防範尤貴有人是防臺弁兵不容稍曠惟是臺懸海面濟渡需船况向例夷商船隻一進口門沙角防弁即須稟報並知會前途其鎮遠橫檔弁兵即須輪流押送至黃埔交替不獨公事需船即弁兵日食所需無一不赴內地採買查各臺本設有三板一隻或因年久朽爛或因遇颶擊碎



若不亟爲籌添必致公私兼悞應請添辦二丈四尺長八尺寬三板八隻分給八臺弁兵應用俾濟渡有資而免貽悞除業經脩文咨請外合並聲明以上三款應請飭司籌議內火藥一項請卽如數撥給硝磺木炭工價查照嘉慶二十四年成案由省局配造交提標中右兩營分貯其炮蓋一項應請飭知東莞縣會管估計承辦至三板八隻應請飭知廣州府廠承造交管再查成造火藥每百觔例價銀三兩九錢一分五厘五毫

惟粵省硝性斥鹵若造精緻火藥必須煎提淨  
硝方能致遠每毛硝百觔提淨僅存五十餘觔  
計造淨藥百觔需工價銀五兩五錢合并聲明  
一各臺大炮每年兩次演準應添歲需火藥群子封  
門鐵彈以資操練也查虎門新舊炮臺八座共設  
大炮二百三十四尊每炮下子各試準一出需用  
火藥一千九百八十九觔十二兩春秋兩次每炮  
各放六出共用火藥一萬一千九百三十八觔八  
兩共用封門鐵彈一萬一千九百三十八觔八兩

共用群子一千零八十八觔十兩以上配造精緻  
火藥每百觔該工料銀五兩五錢封門鉄彈每百  
觔照現辦價值該銀六兩群子每百觔照現辦價  
值該銀八兩三項共需銀一千四百六十兩零一  
分七厘五毫

一每年操練水軍與炮臺聲勢互相援應宜添歲需  
火藥也每年春秋兩次調用提標中左右及香山  
大鵬每營各調米艇二隻共船十隻每隻配鎗炮  
兵四十四名配舵練斗旋兵十名配泗水兵十名

配炮十二尊大小牽算每炮以一千觔重爲率每  
操一陣每炮各放十二出兩次共操六陣每炮各  
放七十二出每出應用火藥二觔八兩每炮七十  
二出共用火藥一百八十觔十船共炮一百二十  
尊共該用火藥二萬一千六百觔共該藥價銀一  
千一百八十八兩

一裝炮火藥布袋宜籌款製辦以免捐攤也查每年  
兩季操演炮準練習水操共用炮藥三萬三千五  
百三十餘觔每藥二觔八兩配裝布袋一個應用

紅稀布一尺歲需布一千三百四十一丈五尺紅  
布每丈銀一錢八分共該銀二百四十一兩四錢  
七分查常年演洗大炮所用布袋因爲數無多向  
由營員捐辦此時遞年操練所用十倍于前營員  
力有不足應請籌款製辦合併聲明

以上歲需火藥藥袋群子封門鉄彈每年計需  
銀二千八百八十九兩四錢八分七厘五毫應  
請飭司籌議或由省局造辦交營或發銀交營  
造辦應候核奪

一每年六七八九四個月擬請籌添防兵口糧以期果腹而鼓士氣也查虎門炮臺八座共派防兵三百八十名依山傍海四無居鄰與存城防汛各兵情勢不同緣兵丁月支餉米本屬無餘家口同居已難足用派守炮臺必須分爨在空閒之日原准其替換購買薪米自六月起至十月初止則當防範吃緊之際若不准其樵採勢難枵腹設任其離臺購辦又恐貽悞再四踟躕可否仿照巡洋各兵月給口糧之例酌減一分計防兵三百八十名定

以六七八九四個月爲度每日每兵賞給口糧銀四分餘月不給通計一百二十日僅需銀一千八百二十四兩按月支給庶防兵家室有賴果腹有資心無內顧士氣飽騰所謂撫之以惠則感而思奮臨之以威則肅而不怨矣惟應否體卹籌給之處恭候示遵

一每年二八月兩次練習炮準調操水兵宜嚴賞罰以示勸懲也查各臺原派防兵三百八十名於演炮之際不敷配用應于存城操演兵內添派五百

一十八名分赴各臺會同練習又調撥水兵共用  
師船十隻共配兵六百四十名二共添配兵一千  
一百五十八名春秋兩次共操二十日勸勤懲惰  
賞罰兼施俾各兵咸知感畏庶期日漸精純于海  
疆營伍實有神益惟應否籌脩賞項分別勸懲之  
處應候核奪示遵

一每年添補隨炮器具以期得力也查八臺大炮共  
二百三十四尊每炮配用鉄炮鑊一把春藥木棍  
一條蘇帚一條鉄門針一根鉛星斗一副攆炮雜



木棍四條火龍桿一枝皮巴掌一個炮眼蓋錫一塊又每炮二尊合用水缸一隻以上各件每年均須修理添補一次通盤計算每炮一尊每年止需添補銀八錢大炮二百三十四尊共需歲修銀一百八十七兩二錢

一每年更換誌樁一次以測潮水而助炮準也查威遠鎮遠橫檔大虎及新建之鞏固永安等六臺每臺左右應于水中安釘誌樁木二根以測潮水俾弁兵一望卽知潮水之長落以定炮口之高低庶

子出不致過於低昂于炮準最關緊要惟海內蠟  
虫蛀木易斷每年必須更換一次此項誌樁僅用  
圍圓一尺四五寸杉木每根價銀約計四兩六毫  
共用誌樁木十二根約共銀四十八兩所費有限  
獲益實多

一師船備用火器宜隨時製造以免周章也查配船  
大小火箭五虎箭群虎箭噴筒火礮火號箭箱溜  
筒等項必須按季製造緣粵省鱗性斥鹵造成火  
器不堪久貯雖安置高燥之處兩月以後卽行回

潮不能致遠必須季季製辦方期得力約計每季製辦一次需銀三十兩每年共需工料銀一百二十兩

一每年添製各炮臺燈旂以壯觀瞻也查虎門炮臺八座本各有旂杆一根黃布旂一面白日懸掛號旂夜間懸掛號燈日則瞭望夜則支更輪流守望於巡防更爲嚴肅應請每年更換號旂一面八臺共需旂布銀九兩六錢再于六七八九等月每臺每日給油燭銀三分八臺各給四個月油燭共銀

二十八兩八錢

一各臺大炮應添歲需火繩以免兵累也查每年按期演試炮準需用火繩四百六十八丈以榕樹根成造每丈價銀五分應請每年添製炮火繩五百丈計共銀二十五兩如有餘存卽留爲儲備之用查火繩一項向由各兵自備今用數較多應由官備以卹兵艱

一每年春初應購柴草以資備用也查備禦海口第一以炮火爲先次則以火攻爲要有備無虞預防

緩急應請於每年二月間儲積山柴茅草八百担  
堆貯空所久之則潮濕乾透配用則易於焚燃統  
計八百担連搬運腳價約需銀一百兩此外火船  
及應配一應燃火料物均俟遇事購辦

一各炮臺原派防兵臨事不敷派用應預練存城兵  
丁以期純熟而資協濟也查炮臺地勢兵房向有  
定額而營中巡洋防汛兵數無餘以致臺兵不能  
加添兵房因而少建卽如威遠鎮遠橫檔三臺每  
臺各安大炮四十尊每臺僅派防兵六十名是每

兵三名管炮兩尊施放焉能敷用是以逢操遇事  
必須調派城汛操兵分往協濟若不預爲操練雖  
營兵不啻市人現擬將存局舊炮挑出十尊分置  
中營叅將右營遊擊兩衙門箭道內專派千把每  
月於初五十五二十五三次齊集選定鎗炮兵五  
百一十八名操練裝藥下子描準燃火一應事宜  
既免耗費而各兵手法心思可期漸就純熟以之  
調配到臺方能得力惟是舊炮十尊雖係虛演必  
須添製炮架門針春藥木棍炮鏟皮巴掌攢炮木

棍及鉛星斗火龍桿等項十副以備逐件練習計  
炮架等件每製一副約銀八兩十副共需銀八十  
兩俾演習有資教練方能得力

以上添補隨炮器具更換誌樁製辦火器火繩  
添製各臺燈旂儲積柴草添製箭道操練炮架  
等件計共七項需銀五百九十八兩六錢應由  
本提督捐辦毋庸另行籌備

一咨 督院

道光十五年十月

十一日





火器所以不堪久貯覆稿

爲咨覆事准貴部堂咨開道光十五年十月十三日  
准貴提督咨開竊本提督昨將籌議操練章程咨請  
鑒核旋荷鈞覆飭行籌議辦理咨覆到本提督准此  
仰見慎重海疆於籌備之中仍寓卹兵至意欽感良  
深惟是籌備各項必須通盤計算有應造存留爲儲  
備者有應每年造辦列爲歲需者有應按季製辦有  
應遞年歲修者欲善其事先利其器固知有備無虞  
最爲上策第經費有常又不得不倍加樽節本提督

悉心籌畫僅將應辦各件繕列清單咨請衡奪確核示覆計粘單一紙等因到本兼署部堂准此仰見核計要需樽節籌備條列周詳深爲欽佩事關防禦至計自應預爲籌議免致臨事貽悞查核單開各臺應添三板濟渡一節先准貴提督咨會業經行司籌議詳辦咨會在案至演習炮準操練水軍需用藥彈及應備一切內惟師船備用火器不堪久貯必須季季製辦之處核與各營備貯之火藥能以久貯定例未符仍須再酌除咨覆貴提督另議飭遵外准咨前因

及行布政司會同按運二司督糧道迅將咨內粘單  
演習炮準操練水軍需用藥彈口糧賞號及應備一  
切逐一按條悉心籌議詳覆以憑移咨會核

奏明辦理咨覆查照希將師船備用火器不堪久貯必  
須季季製辦一節核與各營備貯之火藥能於久貯  
定例未符仍祈再酌妥議見覆飭遵施行等因到本  
提督准此查各營存貯儲備火藥陳陳相因有存貯  
三四年之後甫出陳易新者是火藥一項久存尙堪  
應用而各項火器亦係火藥所造何以不堪久貯必

須季季製辦核與定例未符仰見貴部堂核實詳明無微不至欽服難名惟是製造火藥每百觔向配淨硝八十觔淨磺十觔炭粉十觔於造成晒乾後卽貯於磁缸之內封固嚴密不使透氣是以雖存貯日久藥性仍舊此火藥久存尙堪應用之原委也若各項火器配料本殊用法各異其不堪久貯緣由謹爲貴部堂陳之查硝性主直磺性主橫炭粉之性主燥其造大小火箭火號每用淨硝十六兩止配磺一兩配炭粉一兩五錢合製成藥分裝紙筒之內加以藥線

貯於木箱之中蓋硝多力能致遠礮少不致炸裂但  
硝性斥鹵木箱紙筒不能閉氣硝多易於回潮透氣  
卽能招濕每火造成火器收貯兩三月之後卽不能  
致遠不獨粵中濕重亦硝性使然耳至於噴筒係用  
毛竹截筒爲之配藥大畧相同而層藥層珠以淨  
礮末調火酒製成故能焚燃蓬桅第竹筒溜筒易於  
爆裂所以亦難久用至各營軍裝冊內有載明存貯  
火箭等項係歷年達部舊例不能刪除其實均係隨  
時製造合併聲明緣准再議合將所以不能久貯實

在情形備文咨覆爲此合咨云云

一咨 督院

道光十五年十月

二十五

日

截回外夷火輪船咨稿三件

爲咨明事道光十五年十一月初八日准貴部堂咨  
開現在有喚咭喇烟船一隻駛至伶仃洋面求洋商  
代爲轉稟欲駛入海口遞送書信本署部堂以其有  
違舊章已批飭洋商嚴行禁阻惟恐該夷不遵法度  
竟爾駛入除札虎門獵德大王濬各炮臺將弁兵丁  
卽行遵照如該夷人烟船駛到迅卽開放大炮向其  
船身轟擊如能擊碎烟船本署部堂必加以超拔如  
放令駛入輕則

奏明革職枷號重則以軍法從事不能寬貸令在必行  
不必游移及札香山協水師提標中軍廣州順德二  
協移行遵照暨札臬司會同藩司移行遵照外相應  
咨會查照一體飭遵施行等因到本提督准此卽經  
通飭本標中右後及香山順德舟師臺汛各員弁一  
體認真截拿尙委署右營遊擊何駿龍親詣各臺稽  
查一切後卽移舟沙角派弁前赴伶仃洋面查詢該  
烟船情形嗣據稟稱驗得各臺官兵炮械均皆齊備  
並據差弁旋回稟稱查詢車輪船戶噤叻覆稱因欲



赴黃埔遞送書信已令人赴行求洋商轉稟督憲大人候示進口等語該弁諭以現奉督提二憲諭飭爾船不得違例不准進口該夷人亦無可回答等語稟覆前來當經批飭加意瞭探倘該夷船不遵批示一入沙角口門臺汛師船各開大炮擊沉其船少有疎虞定千軍法切實批覆去後本月十一日午後署叅將李賢會哨趕回卽令替換何駿龍回營辦事茲於十三日午後據李賢差目來署稟稱該夷車輪船由伶仃開行駛至龍穴現已督率署脩周國英等船迎

往截阻等語本提督恐該將等輕重失宜立即親駕小舟於酉刻趕抵沙角戌刻署叅將李賢等由外洋押逐該車輪船轉掉到口稟稱卑職遵札防截車輪夷船日逐查探得悉昨赴洋行遞稟夷人於十二日下午回船是以加緊瞭探今午遙見該船直向龍穴駛來當即督率各船迎頭堵截傳諭臺弁開放信炮知會前途各臺該夷烟船將至沙角洋面見沙角開炮始行拋旋船內夷人隨即開駕三板到卑職船旁內有一夷人頗通土語口稱伊欲駛入黃埔遞送書

信等語卑職當諭以有違禁令飭其不可進口該夷  
隨即轉舵駛向外洋而去跟追至晚遙望不見卑職  
始乘船駛回本境適憲駕業已到洋親身督率至該  
夷烟船身長六丈餘寬一丈餘船面並無帆檣止有  
烟管一枝烟氣上騰船旁兩邊各駕車輪一個烟動  
輪轉行駛甚捷刻下雖向外洋駛去然夷情狡詐難  
保不去而復轉卑職現仍遵照憲令督飭各炮臺師  
船弁兵小心瞭望加緊防截不敢稍懈再查先年每  
遇防夷緊要之時歷蒙前督憲飭發通事一二名來

洋以備傳諭夷人之用刻下正當防範緊要之際除稟請兼署督憲祁轉咨粵海關監督飭發諳曉夷語通事二名前來虎門洋面以備查詢夷情之用等情據此查該夷人已奉貴部堂批飭不准進口何以又硬欲駛赴黃埔豈洋商傳諭未清抑或該夷心懷叵測殊不可解除已調到存營弁兵一百六十名發給口糧分赴威遠鎮遠橫檔大虎四臺協濟尤慮蕉門海口炮小兵單已派弁持令趕往督防並札飭署遊擊何駿龍挑派把總一員兵丁二十名前赴蕉門協

濟本提督現在駐船威遠往來督率派弁赴洋查探  
該夷船是否仍泊伶仃抑另泊何處或已開行容俟  
查明再爲咨達合將嚶叻車輪船行至龍穴經師船  
截回外洋緣由咨請衡鑒至署叅將李賢請撥通事  
除咨粵海關部外合併咨明云云

一咨 督院

道光十五年十一月 十四 日

爲咨明事竊本提督於本月十四日早曾將外夷烟  
船不遵批示硬欲進口經總巡叅將李賢督率備弁

在洋截回緣由咨明在案茲於十五日未刻據李賢  
面稟卑職遵諭派弁赴洋查探烟船踪跡弁回稟稱  
查得烟船于十三日晚駛回伶仃將寄存外夷商船  
五六百觔炮四尊取回卽開至九洲洋面停泊仍有  
寄存篷桅未經取去十三日夜間該烟船又自九洲  
開行跟查至澳門未見形跡遍問引水漁船均稱未  
見相應稟明等語本提督伏思該夷船如果回國自  
應將寄存篷桅一併取去今仍寄存他船形跡可疑  
查九洲近接金星門及淇澳或者該夷見虎門防守

緊密不能竄入恐有勾引之人改由潭洲口及崖門  
兩處竄往黃埔均未可定查潭洲口係順德協所管  
崖門係新會營管轄除差飛札順德協新會叅將  
馳往督防如該烟船胆敢由此竄入該將等卽轟沉  
其船設有登岸逃走者立卽殺戮星飛通報本提督  
刻又派弁分赴各處再行查探另爲咨報外合將查  
探札防緣由合咨云云

一咨 督院

道光十五年十一月 十五日

爲咨明事本月十五日曾將查探外夷烟船情形及札飭防截緣由咨明冰案茲于十六日已刻據總巡署叅將李賢稟稱卑職遵奉鈞諭派弁赴洋分投查探究竟該夷船潛泊何處務得確踪馳報等因當卽選派弁目四出跟尋頃據差弁來船稟稱遵諭前赴淇澳金星門澳門一路跟查至澳門南灣山根瞭見該烟船停泊在彼現在船上止番鬼十二三人餘俱登岸諒係往看住澳夷人緣奉跟尋合將查明該烟船現泊澳門南灣緣由稟聞等情到本提督據此查



犬羊之性不識輕重既經貴部堂批飭不准進口而該夷復敢向沙角口門硬欲闖駛其鴛鴦不馴已可概見昨者甫至龍穴卽經巡員開炮截回茲復停泊南灣實屬愍不畏死除通飭臺弁巡員各守信地如該烟船胆敢再至龍穴以內一近沙角卽行轟沉其船誅其鴛鴦或該夷知畏卽日回國亦未可定現又崙飭香山署千總毛汝彰跟踪查察行止隨時稟報合將烟船現泊澳門南灣情形相應咨明云云

一咨 督院

道光十五年十一月

十六

日

爐匠逞刁捏控營員咨請嚴訊稿

爲請委幹員嚴訊爐匠指出故陷官兵解省審明虛實從嚴核辦並請再取爐匠保固切結以杜推諉而符原

奏事竊照虎門海口增臺添炮經前部堂主稿聯銜具奏摺內聲明以上添鑄大炮四十位臣盧坤飭委洪發科與廣州協都司黃廷彪購募熟諳匠人李陳霍等承造責令保固三十年限內炸裂由該匠賠造

奏明在案迨鑄成新炮接續運臺九月初六日本提督

札委叅將余清委員洪發科前赴威遠鎮遠演試新  
炮九月初八日晚據余清洪發科稟稱卑職等同詣  
威遠演放新炮至第三位八千斤一尊配準藥彈一  
經燃放當卽炸斷又詣鎮遠演試第一尊八千觔新  
炮配準藥子甫一點放卽行炸碎打傷兵丁二名等  
情本提督復委叅將余清耑演威遠月臺新炮委署  
叅將洪發科耑演鎮遠新炮委署右營遊擊何駿龍  
耑演橫檔月臺新炮均於初十日分赴各臺本提督  
於十一日親往督察舟抵沙角卽據余叅將稟稱委

演威遠新炮十六尊內除初八日炸斷八千觔炮一尊今日演放又炸碎六千觔炮一尊其餘十四尊均未炸裂又據何署遊擊稟稱委演橫櫓月臺新炮十二尊均屬完固又據委員洪署將稟稱奉委演放鎖遠新炮十二尊內除初八日炸碎八千觔炮一尊今日又炸碎八千觔炮二尊六千觔炮三尊先後共炸碎炮六尊其餘六尊均未炸裂等語十二日本提督親詣各臺檢看炸碎鉄塊週身孔眼形似蜂房並有空洞內可貯水四碗者顯係好匠貪利忘公多攙廢

鉄所致其未炸各炮覆加演放內一尊炮尾已現裂  
痕一道又六尊於燃火時先響一聲難期得力均經  
隨時函達並咨明在案其檢回炮鉄及新鑄炮子半  
係空心運送至省均經貴部堂親詣驗明而炮兵黃  
英得因傷身死又蒙俯念因公加賞卹銀迄今水師  
官兵止有感激毫無異言茲接鈞咨內開據爐戶李  
陳霍等以披瀝下情籲憲察救等情赴轅呈訴鎮遠  
威遠炮兵加倍用藥三重炮子層層春固遂致炸裂  
大小炮八位之多迨黃都府前詣橫櫓炮臺如制配

藥演炮六位均無損傷先炸之炮是否蟻等偷工減料抑係兵丁加藥故陷難逃憲鑒蟻等乃承辦炮戶炮有爆炸安能辭責惟炮經先演較場都無損壞及運試威鎮二臺炮兵違例加藥炸裂洵屬有因茲奉札飭賠鑄軍務重情身家雖破敢不凜遵但慮賠鑄炮位仍須運臺試演倘臺兵復效前尤蟻等性命亦屬難保祇得披瀝下情籲叩憲恩乞先飭該臺員弁將從前未試之炮暫停試演蟻趕緊賠鑄工成繳運赴臺由省飭委督鑄幹員親詣督令一齊如制試演

庶臺兵不致炸斃蟻等亦免誤公之咎等情閱之殊  
深詫異復讀貴部堂批詞仰見洞悉奸頑實深拜服  
此等刁徒原不足較第既敢在貴部堂衙門呈控炮  
兵加藥故陷以致炸裂如果屬實該匠是否目睹抑  
係耳聞必應指出其人訊明虛實從嚴懲辦方足以  
折服其心查新鑄大炮四十尊分置橫檔十二尊係  
委遊擊何駿龍親往演放均未炸裂威遠新炮十六  
尊係委叅將奈清演放炸壞二尊其鎮遠新炮十二  
尊係委員洪發科前往演放炸碎六尊查洪發科黃



廷彪係購募爐匠李陳霍等原手且炮上均鑄有洪發科銜名並鑄明配藥配子數目該員諳練軍火今於奉委演炮之際豈喪心病狂故令炮兵加倍用藥三重炮子以致連碎新炮六尊若該員等果有故陷情事卽天理王法所不容一經訊明均應叅革治罪此時叅將余清先期赴部署叅將洪發科承辦炮臺已報工竣應請貴部堂先將洪發科調省訊問如果該署將與余清實有故縱炮兵加倍用藥故陷炮匠應請將該將等從嚴叅辦設該爐匠李陳霍等不能

指實任意污讟水陸營員想光天化日之下亦斷難容此魑魅至該爐匠等此次呈訴其意豈獨欲飾前非並欲將保固年限置之不問刻下新鑄之炮一經到臺演試卽炸碎八尊此外仍有大炮七尊或炮尾顯有裂痕或燃火時先有響聲此等炮位難保不再炸裂刻下鎮遠一臺炸碎新炮六尊係委員洪發科親往演放該匠等尙且逞刁造言污讟至所稱黃廷彪到臺係在炸炮之後何得藉詞此後每年春秋演試炮準或防夷緊要下子轟擊該爐匠斷不能到臺

目睹設再炸裂若令其賠造該爐匠必仍以故陷有  
因久經呈明等詞呈訴推諉此時應請訊明實則辦  
官誣卽反坐另再取具該爐匠保固不敢推諉切結  
俾各炮或於保固限內再有碎裂庶該爐戶不敢諉  
卸而水陸叅將大員亦不致被其污讎至於已顯毛  
病尙未炸裂大炮七尊是否留臺減藥將就演放抑  
乘此尙未具奏飭令爐匠運回另造其安置永安鞏  
固兩臺由省運來新舊炮位是否靜候遴委幹員來  
臺演試並候鈞裁緣准大咨理合將前後炸炮緣由

縷晰咨覆應否照辦以歸實在之處請煩查照核辦  
仍祈示覆施行

一咨 督院

道光十五年十二月

初五日

新鑄大炮連炸十尊殘損三尊咨會叅辦稿

爲新鑄大炮連炸九尊又殘損三尊今都司黃廷彪帶領炮匠演試又炸新炮一尊再行咨明卽祈叅辦事竊照新鑄大炮四十尊運置各臺疊經本提督委員演放先後炸炮八尊均經咨明在案本月初十日貴部堂到臺會同演放新舊炮十七尊內新炮十一尊舊炮六尊威遠炸碎八千觔炮一尊又八千觔一尊炮尾四面出火又八千觔一尊炮門有炸響聲音又鎮遠炮臺八千觔炮一尊門眼寬深難保不炸均

經貴部堂目擊情形並帶回炸碎炮鉄俱無庸本提督多瀆本月十五日據洪發科黃廷彪差人稟稱賠鑄新炮八尊業已運上馬頭稟請委員會演等語當卽委署叅將李賢署守備會應元會演去後十六日戌刻會應元回虎稟稱賠造新炮八尊業均演畢尙無炸裂情事惟因鎮遠八千觔炮內有顯露灌補痕跡一尊都司黃廷彪與署備公同秤足火藥配準彈子群子交炮匠自行裝入一經燃放卽炸碎幸用藥線燃放尙未傷人轟去炮洞一個打坍兵房四間

炸碎炮架等件合行列單稟明等情本提督閱之倍  
深焦灼伏思新鑄大炮四十尊於九月初八日初次  
演試卽連炸二尊九月十一日二次演試又連炸六  
尊九月十二日本提督親往三次演試又有七尊已  
顯炸裂痕跡業均咨明水案迨本月初十日貴部堂  
臨臺第四次演放又炸碎威遠新炮一尊並有炮尾  
四圍出火一尊又有炮眼炸響一尊又有鎮遠一尊  
炮眼寬深均不堪用此次鑄炮委員黃廷彪帶領承  
造炮匠親自裝藥下子又炸碎八千筋新炮一尊計

九十八日之內五次試演已連炸十尊此外又殘損三尊似此每次炸裂其餘各炮焉能放心海疆重地軍火要工該炮匠等任情蠶食該委員等溺職辜恩倘猝遇防夷仍前炸裂豈獨傷兵奪氣將見有損

國威若不嚴叅究辦何以肅官方而懲奸貪本提督出身行伍仰沐

天恩不次超擢畀以水師重任斷不敢稍存徇隱自蹈欺瞞之罪惟應如何嚴叅懲治其已顯炸跡之炮如何賠造未炸各炮如何再加演放凜遵前奉



硃批務歸得力之處應請貴部堂核奪並請摺列  
實具  
銜據

奏合再專差咨請查照辦理竝望示覆施行

計開

南山新建威遠炮臺分配新炮十六尊內

八千觔新炮十尊六千觔新炮六尊

九月初八日炸八千觔炮一尊

九月十一日炸六千觔炮一尊

十二月初十日炸八千觔炮一尊

又八千觔炮一尊炮尾四圍走火應另鑄

又八千觔炮一尊門眼兩處走火應另鑄

又六千觔炮一尊炮身有灌補痕跡兼有孔眼

又六千觔炮一尊炮耳壞爛一塊

以上威遠新炮十六尊內已炸八千觔炮二尊已炸  
六千觔炮一尊又八千觔炮二尊業已走火不能再  
試又六千觔炮一尊炮身顯露孔眼兼有灌補痕跡  
又六千觔炮一尊炮耳壞爛一塊

鎮遠炮臺分配新炮十二尊

內

八千觔新炮七尊六千觔新炮五尊

九月初八日炸八千觔炮一尊

九月十一日炸八千觔炮二尊

又炸六千觔炮三尊

十二月十六日炸八千觔炮一尊

又八千觔一尊門眼吃藥過多顯係另有孔洞

以上鎮遠新炮十二尊內已炸八千觔四尊已炸六

千觔三尊又八千觔一尊門眼內有毛病亦不可靠

橫檔月臺分配新炮十二尊

內

八千觔新炮五尊六千觔新炮七尊

以上橫檔新炮十二尊屢次試演內止二尊門眼出有響聲尙無炸裂痕跡

以上三臺共配新炮四十尊內除已炸十尊又二尊現已走火又三尊已顯毛病其餘新炮二十五尊並未炸裂亦未顯著毛病但連次炸碎傷兵刻下雖不能定其必炸又誰敢保其不炸况貴賤雖殊性命則一兵心戚戚無怪其然此時惟有另籌火藥仍祈委員來臺會同再將未炸各炮及續造新炮各演十出

聞

如不再炸則兵心自壯矣緣承垂詢謹開清摺奉

一咨 督院

道光十五年十二月

十七

日



添建炮臺工竣新炮炸裂嚴責賠造摺

總督主稿

署兩廣總督廣東巡撫臣祁  
廣東水師提督臣關天培 頓

奏爲會驗虎門新修改造各炮臺工程完固惟演放新鑄炮位內有炸裂將鑄造匠工及辦理不慎之委員分別提審

奏參嚴責賠造仰祈

聖鑒事竊

臣

祁墳因虎門修造各炮臺及添鑄炮位各工

報竣並因

臣

關天培函商此後防禦海口一切章程

應親往虎門查驗籌議於十二月初九日出省業經

附片奏

聞在案

臣

祁墳於初十日行抵虎門會同

臣

關天培周歷

勘驗各炮臺形勢所有前督

臣

盧坤暨

臣

等本年春

間會

奏情形宛然在目察看大角沙角兩臺在大洋之中東

西對峙惟中隔海面一千數百丈相距較遠兩邊炮

火不能得力只可作爲信炮望臺其鎮遠橫檔兩臺

南北斜峙南山炮臺在鎮遠迤東形如品字中隔水

面止三百餘丈勢甚聯絡實屬扼要之地大虎炮臺



海面稍濶惟對面長有暗沙臣關天培已於沙上釘立木椿並用舊船裝石壓沉卽水長時船隻亦必須由木椿外行走炮火亦屬得力茲驗得改造橫檔鎮遠大虎各處炮臺堞牆俱用堅厚寬長青麻大石橫順丁鈎密砌一律增高炮洞外窄內寬修補臺面並馬頭一律平整又驗得新建南山威遠月臺一座係在舊炮臺前面石基正中建造直長十一丈六尺左右灣長七十丈敵臺長四十丈連地盤俱用高厚寬濶青麻石平排橫順丁鈎密砌開炮眼四十個左右

兩邊包角石牆上建城門官廳兵房拱蓬藥局東西望樓城樓石級馬頭皆一律完固堅整以次詣驗新建橫櫓山背永安炮臺及對面之蘆灣山脚鞏固炮臺二座各在山脚石基正中建造其永安炮臺直長十丈左右灣長六十八丈敵臺長四十丈鞏固炮臺直長六丈五尺左右灣長五十一丈敵臺長二十一丈兩臺連地盤亦俱用青藤大石平排橫順丁鈎密砌永安臺堞牆開炮洞四十個鞏固臺堞牆開炮洞二十個兩處炮臺臺心俱用蠻石填砌石級馬頭亦

俱完固堅整臣等在各炮臺四望遠近控制情形氣象實屬雄壯南山新建月臺尤足以壯觀瞻而嚴備禦惟查鑄造大炮先經督臣盧坤

奏明飭委署增城營叅將洪發科及推陞遊擊暫畱署廣州協左營都司黃廷彪僱覓爐匠李陳霍等承攬鑄造責令保固三十年限內炸裂照例賠造茲查新鑄大炮四十位又添鑄大炮十九位陸續運往各臺安配前於九十月間演放時內有八位先後炸裂炸傷炮兵一名身故業經該爐匠另行賠造大炮八位

運臺補行安配迨

臣

與提

臣

關天培會同親往試演

又炸裂二位此外細查各炮仍有四位製造不能如

法

臣

等查新鑄大炮五十九位炸裂至十位之多顯

係該工匠等偷減工料未能將鐵沙提淨所致已將該工匠等發交委員究審懲治仍責令將各炮位加工提鍊賠造至監鑄委員除洪發科有督修炮臺工程勢難兼顧且督修炮臺工程十分完固尙可功過相抵都司黃廷彪向來辦事勇往結實乃此次監鑄炮位不能認真督率致多炸壞咎實難辭相應

奏明請

旨將推陞遊擊暫畱署廣州協左營都司之黃廷彪革去頂戴責令督匠加工提鍊賠造如演試不致再有炸裂另請

施恩倘仍不能妥善卽再嚴行叅處至署東莞縣李繩先承修炮臺工堅料實應仰乞

恩施交部議敘以示鼓勵所有臣等會同查勘各炮臺工程及查驗炮位情形謹會同恭摺具

奏並將新修各炮臺做法高低丈尺及各臺安配炮位

數目分繕清單二件恭呈

御覽至各炮臺建設城樓官廳藥局兵房神廟間數高寬

進深丈尺另飭藩司派委文員覆驗會同工員另造

細冊詳報炸傷身故之兵丁

臣

等已優加賞恤給其

親屬具領仍照例咨部查辦再提

臣

關天培與

臣

會

商防夷應加添操練火藥鐵彈及合操口糧獎賞併

各項必需經費共有十三款現在新任督

臣

鄧廷楨

不日即可到省容俟到任後會籌熟計另摺奏請

皇上訓示遵行

臣

祁墳於勘工演炮事竣後已於十三日

旋省合併聲明謹

奏

道光十五年十二月十九日

謹將改造鎮遠橫檔大虎各敵臺垛牆炮洞馬頭並  
添建南山威遠月臺暨橫檔山背永安炮臺及蘆灣  
山鞏固炮臺長寬高厚丈尺暨弁署兵房馬頭等項  
工程繕具清單恭呈

御覽

計開

一改造鎮遠橫檔大虎各敵臺堞牆俱用厚寬各一尺長自三尺六寸五尺二寸不等青藤石橫順丁鈎密砌按照間層砌高六尺五寸寬四尺五寸其炮洞一律造高三尺五寸外口寬二尺八寸內口撥開八字寬五尺並堞口橫石前長四尺八寸後長七尺寬厚俱各一尺以及修補臺面並馬頭三道一律平整

一新建南山威遠月臺在於舊炮臺前面石基正中建造直長一十一丈六尺自左至右灣長七十丈



敵臺長四十丈連地盤俱用高厚寬各一尺長五尺青麻石平排五塊橫順丁鈎密砌每五尺見方仍間丁字按照間層壘壘高一丈三尺五寸另垛牆高六尺五寸厚四尺五寸開炮洞眼四十個面寬二丈五尺左右兩邊包角石牆各一十五丈亦高一丈三尺五寸另垛牆高六尺五寸不開炮眼橫寬一丈連敵臺臺心俱用蠻石填砌

拱洞城門一座高九尺寬七尺二寸深一丈七尺五寸包鐵城門二扇

官廳一座三間每間脊高一丈四尺八寸簷高九尺正間寬一丈二尺七寸左右偏間各寬一丈深一丈五尺二寸均九櫺成造青磚結砌拱蓬一座簷高九尺二寸寬一丈一尺五寸深一丈二尺七櫺成造

兵房十二間每間脊高一丈一尺簷高八尺寬一丈零三寸深一丈四尺五寸青磚結砌

藥局一座週圍石砌高七尺寬一丈二尺深一丈三尺十一櫺成造

東望樓一座脊高一丈二尺簷高一丈零八寸寬九尺深七尺二寸青磚結砌

西城樓一座脊高一丈四尺簷高一丈一尺三寸寬一丈零三寸深一丈零三寸青磚結砌石級馬頭一座長一十八丈寬一丈四尺

一 新建橫檔西山背永安炮臺一座在該山脚石基正中建造直長一十丈自左至右灣長六十八丈敵臺長四十丈連地盤俱用高厚寬各一尺長五尺青蘇石平排五塊橫順丁鈎密砌每五尺見方

仍間丁字按照間層壘疊高一丈三尺五寸另垛  
牆高六尺五寸厚四尺五寸開炮洞眼四十個面  
寬二丈五尺後包角石牆二十八丈亦高一丈內  
馬路高四尺橫寬八尺五寸另垛牆高六尺厚二  
尺五寸不開炮眼連敵臺臺心俱用巒石填砌拱  
洞城門一座高九尺寬七尺二寸深一丈七尺五  
寸包鐵城門二扇

官廳一座三間每間脊高一丈二尺簷高九尺正  
間寬一丈零三寸左右偏間各寬八尺八寸深一

丈均九櫨成造青磚結砌

拱蓬一座簷高九尺寬一丈二尺深一丈七櫨成  
造

兵房十八間軍裝局一間每間脊高一丈一尺簷  
高八尺寬一丈零三寸深一丈五尺青磚結砌

藥局一座週圍石砌簷高七尺寬一丈一尺深一  
丈二尺十一櫨成造

神廟三間青磚結砌

東望樓一座脊高一丈二尺簷高一丈零八寸寬

九尺深七尺二寸青磚結砌

西城樓一座脊高一丈四尺簷高一丈一尺三寸  
寬一丈零三寸青磚結砌石級馬頭一座長七丈  
寬一丈

一新建蘆灣山脚鞏固炮臺一座在該山脚石基正  
中建造直長六丈五尺自左至右灣長五十一丈  
敵臺長二十一丈連地盤俱用高厚寬一丈長五  
尺青藤石平排五塊橫順丁鈎密砌每五尺見方  
仍間丁字按照間層壘疊高一丈三尺五寸另垛

牆高六尺五寸厚四尺五寸開炮洞眼二十個面  
寬二丈後包角石牆三十丈亦高一丈內馬路高  
四尺橫寬八尺五寸另垛牆高六尺厚二尺五寸  
不開炮眼連敵臺臺心俱用蠻石填砌

拱洞城門一座高九尺寬七尺二寸深一丈七尺  
五寸包鐵城門二扇

官廳一座三間每間脊高一丈二尺簷高九尺正  
間寬一丈二尺七寸左右偏間各寬八尺八寸深  
一丈均九櫺成造青磚結砌

集賢堂  
卷三  
四  
拱蓬一座簷高九尺寬一丈一尺五寸深一丈七  
椽成造

兵房十一間軍裝局一間每間脊高一丈一尺簷  
高八尺寬一丈零三寸深一丈五尺青磚結砌

藥局一座週圍石砌簷高七尺深一丈一尺十一  
椽成造

神廟二間青磚結砌

東望樓一座脊高一丈二尺簷高一丈零八寸寬  
九尺深七尺二寸



御覽

西望樓一座脊高一丈四尺簷高一丈一尺三寸  
寬一丈零三寸深一丈零三寸青磚結砌

石級馬頭一座長六丈五尺寬一丈

謹將鎮遠橫檔大虎南山威遠永安鞏固各炮臺  
安配新舊大炮數目繕具清單恭呈

計開

鎮遠炮臺安炮四十位

新鑄八千斤炮七位 又六千斤炮五位

舊鑄六千斤炮二位 又六千五百斤炮一位

舊鑄五千斤炮四位 又四千斤炮一位

舊鑄三千斤炮二位 又二千五百斤炮二位

舊鑄二千斤炮四位 又一千五百斤炮八位

舊鑄一千二百斤炮四位

橫檔月臺安炮四十位

新鑄八千斤炮三位 又六千斤炮九位

舊鑄八千斤炮二位 又七千斤炮一位

舊鑄六千斤炮二位 又五千斤炮二位

舊鑄四千斤炮一位 又三千斤炮三位

舊鑄二千斤炮九位 又二千五百斤炮二位

舊鑄一千五百斤炮六位

大虎炮臺安炮三十二位

新鑄六千斤炮二位

舊鑄九千斤炮一位 又八千斤炮一位

舊鑄七千斤炮一位 又五千斤炮五位

舊鑄三千斤炮三位 又三千五百斤炮二位

舊鑄二千斤炮五位 又二千五百斤炮二位

舊鑄

一千五百斤炮七位  
一千四百斤炮一位

又一千斤炮一位

南山威遠月臺安炮四十位

新鑄八千斤炮十位

又六千斤炮六位

新鑄四千斤炮四位

舊鑄七千斤炮二位

舊鑄五千斤炮一位

又三千五百斤炮一位

舊鑄三千斤炮二位

又二千五百斤炮二位

舊鑄二千斤炮二位

又一千五百斤炮五位

舊鑄一千斤炮二位

又一千二百斤炮二位  
又九百斤炮一位

永安炮臺安炮四十位

新鑄五千斤炮四位 又四千斤炮一位

舊鑄四千斤炮一位 又三千五百斤炮一位

舊鑄三千斤炮四位 又二千斤炮十三位

舊鑄一千斤炮七位 又一千五百斤炮四位

舊鑄八百斤炮一位 又一千二百斤炮四位

鞏固炮臺安炮二十位

新鑄五千斤炮二位 又四千斤炮三位

舊鑄三千斤炮五位 又二千斤炮五位

舊鑄一千二百斤炮五位

以上六臺共計安配新舊炮二百一十二位  
道光十六年二月三十日奉到

硃批另有旨欽此同日又奉到道光十六年正月二十四  
日內閣奉

上諭祁墳等奏會勘各炮臺工程及查驗炮位情形一摺  
廣東虎門地方修造各炮臺及添鑄炮位各工完竣經  
祁墳等查明新鑄大炮五十九位炸裂至十位之多實  
屬辦理不慎所有監鑄委員推陞遊擊畱署廣州協左  
營都司黃廷彪著革去頂帶責令督匠加工提鍊如數

賠造倘再不能妥善卽嚴行叅處署東莞縣知縣李繩先承修炮臺工程尙屬完固著加恩交部議敘至所奏應行加添各項經費十三款著俟鄧廷楨到任後會同關天培籌議具奏該部知道欽此

再本年十一月初六日據洋商伍紹榮等轉據啖咭喇國夷商覃義理等稟稱夷人來粵貿易所有書信必須往來傳遞逆風難行今有港脚烟船能行逆風並無帆檣止有烟管船內燒火烟氣由管通出船傍兩邊各架車輪烟動輪轉行駛甚速欲行晉省遞信

恐沿途炮臺關口疑慮驅逐信達轉稟飭行知照等情臣查外夷貨船向准到海口報明進至黃埔收泊其護貨兵船及別項船隻止准在外洋寄碇不准擅入海口如有送交書信應用三板小船隨時報明入口歷有

奏定章程可循查該夷人此項烟船曾於道光十年駛至外洋旋經回國今欲將烟船駛入海口進省送信雖據引水人等查報該船只有船主水手十餘人並無滋事情形惟夷情狡黠且詭異不經之船未便准



其入口臣郝壇與臣彭年及各司道商酌如該夷人  
竟肆桀驁卽應懾之以威隨一面飭令洋商傳諭該  
夷人不准進口一面移咨臣關天培通札虎門各炮  
臺如該夷人不遵法度將船駛至卽開炮震懾若仍  
不退回卽裝炮子將船轟擊俾知儆懼不得稍有疎  
忽嗣據署澳門同知郭際清署水師提標中軍叅將  
李賢等稟報查明該烟船係啖咭喇港脚噍叻快船  
經該叅將帶領師船督率弁兵在洋防範於十一月  
十三日瞭見該船自伶仃洋開行往內洋行駛將至

沙角洋面沙角炮臺卽將號炮點放南山鎮遠橫檔  
大虎各炮臺聽聞號炮亦均開炮接應該烟船卽行  
拋旋有船內夷人開駕三板小船攏近師船頗通中  
華言語稱欲駛入黃埔遞信並稱前已稟明當諭以  
總督提督已經諭禁不准違例進口該夷船始行轉  
舵駛出外洋仍至伶仃南灣等處海面灣泊至今尙  
未開行回國續據署叅將李賢稟稱訪聞此船係爲  
包攬各夷商送信而造此次到來欲將船賣給澳夷  
該澳夷覆以如能駛至黃埔卽可承買否則不願成

交今回至伶仃洋無人承買是以尙未回國亦不敢  
進口等語臣等查暎夷素性詭詐雖現在該烟船並  
無滋事情形惟旣已飭禁不准進口乃仍欲駛入內  
洋明係佯爲不知任意行駛實屬藐玩除飭各營縣  
及虎門各炮臺隨時查察嚴行禁阻防範並諭飭澳  
門西洋夷目派撥夷兵在於南灣一帶巡查勿任烟  
船水手人等登岸滋事仍卽驅逐開行回國毋任久  
泊滋事外所有港脚烟船嚴禁未經駛入內洋緣由  
謹會同海關監督臣彭年水師提督臣關天培附片

奏

聞伏乞

聖鑒謹

奏

道光十五年十二月 十九日

道光十六年二月三十日奉到

硃批知道了欽此

聞盜曾武果否溷跡陳村請飭縣飛速查覆稿

午間差弁回虎祇奉還雲敬悉前泐兩函均登記閣  
茲本月二十七日接南澳沈鎮十六日差函抄稿送  
閱當卽專差熟悉該處情形署把總莫在田改裝易  
服帶同南澳目兵陳旋趕往順德密訪去後今於三  
十日據該弁目回署稟稱訪得陳村地方本有玉田  
福潮館一所已經被焚現在止存舖面一進該舖主  
係福建人沈姓現止三四人在內居住此外另有店  
舖一間係潮順字號內有福建客人十餘人在內出

入居住此中有無夤官之名因閩粵語音不同未敢過於查問恐致張揚至田春港三字閩音卽是陳村港現有玉田字號且是福建人在內惟夤官與曾武是何年貌身面有無記識既無眼線指認又無確跡可據署把總未便冒昧混拿並查潮順舖係一凌水婦人名海南三招得福建人在店生理聞人叫他亞留官此人現在外出緣奉札委合將訪確情形稟覆等語查曾武係閩浙洋面盜首業經

奏拿在案今據沈鎮函開奉程制軍函開犯供曾武有

逃匿廣東之供無論虛實均應確訪嚴拿方得水落石出况今訪有玉田店舖惟有無曾武溷匿其中無從指認若容候沈鎮購覓閩線前來必致耽延時日再四思維原不可株累妄拿又深慮養奸滋患應請密飭順德縣就近訪明會營拿辦則虛實自分疑團可釋矣專差飛佈云云

道光十五年十二月 三十 日





籌議節省經費歲修八臺三板炮罩稿

昨承示以海口春秋操練需用一切籌款七萬通年  
一分生息可得七竿仰見籌海防邊機先燭照一勞  
永逸有備無虞豈獨水師官兵共深頂感從此海疆  
蒙福有米可炊教弟諸免顧盼受益實多回署後復  
將前議逐條核計內堆積柴草一項第一年約需銀  
一百兩如當年不用第二年即可減半購買應省銀  
五十兩火器一項四季備辦第一年需銀一百二十  
兩除春秋兩季隨操試放外其夏冬所備設製而不

用則木箱竹筒箭頭箭竿仍可配用每年可省銀四十兩又陸地操練存營兵丁需用炮架等各項十副第一年製辦需銀八十兩以後僅需修補每年約用銀二十兩又省銀六十兩又八處炮臺共安大小炮二百三十四尊每炮各存火藥十八出通共應儲備火藥三萬六千斤刻已撥到火藥一萬二千斤仍須籌備火藥二萬四千斤此項係永遠存貯炮臺每年出陳易新不入歲需數內應請另款由理事同知領辦交營又八臺各添大三板一隻寬爲估計每隻約

需銀六十兩約共銀四百八十兩以後三年小修六年大修九年折造請飭廣州府廠估辦交營又各炮應添木板炮罩約需銀三百餘兩此件請飭東莞縣估辦營弁就臺督工三年後如有殘損應再修理以上二項亦不入歲需款內至於操練炮準師船歲需火藥彈子裝藥布袋添換誌椿旂布燈油火繩火器添補隨炮器具柴草及各兵口糧賞號等項以每年息銀七千隨時製辦足敷撥用然當此定議之初不厭精求教弟愚昧之見仍須籌銀二千兩併入前款

生息每年務得息銀七千二百兩除按年支用七千兩有零仍歲存銀一百八十九兩十年之內可節存銀一千八百兩緣大三板八隻每隻每年必需歲修銀伍兩俾有破卽修有漏卽補庶板片不致過朽計十年之中除到營第一年及大小修拆造此四年中無庸歲修其餘六年僅需銀二百四十兩如三板原造每隻價銀六十兩三年小修每隻卽需銀二十兩六年大修每隻需銀四十兩九年拆造每隻又需銀六十兩是十年之中歲修小修大修拆造通共需

銀一千二百兩又八臺炮罩約需銀三百兩以寸餘厚木板使用三載有餘勢必朽爛十年之中必須更換兩次卽需銀六百兩是十年間三板炮罩又需籌銀二千兩與其年年籌撥何如乘此措齊一經需用卽在本款內動支既不致耽延公事又免另外籌支緣承諄屬謹據思慮所及肅此覆聞再本標右營添兵七十名已遵示咨行各鎮營定於二月初一日彼此起截支食又儋州添改水師亦已轉咨陽江瓊州兩鎮軍迅速核覆矣云云

道光十六年正月 十六 日

拿獲假冒巡船人犯解辦稿

爲獲匪稟解以靜地方而安商漁事道光十六年正月二十四日據大鵬右營守備吳占稟稱竊照前因有快蟹式樣船隻掛用三角大旗一面上寫奉部巡查字樣出海滋擾追趕福潮艚船假以盤查爲名實爲酷索商漁銀兩稍不如意乘機搶奪緣由業經稟明憲臺在案隨奉鈞批內開據稟伶仃洋面近有快蟹式樣巡船二隻駛至龍鼓洋面追趕艚船已悉查此項船隻是否在官巡役假公滋擾抑係匪徒冒充

官人仰卽督率巡洋舟師及守口員弁實力查拿務獲解究如稍懈玩定干叅辦切切等因奉此守備遵卽札飭本營巡洋舟師臺汛各弁加緊巡防如有此樣巡船膽敢仍在營屬洋面滋擾立即嚴拿解送以憑轉解懲辦而靖海疆札飭去後茲於本年正月二十一日據本營把總黃耀全稟稱竊把總奉派防守大澳汛督率兵目嚴密巡防罔敢疎懈本月十九日酉刻見有黃底快蟹船一隻船上約五十餘人飛掉抵澳把總當卽督帶汛兵前往稽查該快蟹船始則



稱司屬巡船把總詢取牌照驗看該匪驚懼棄船紛  
紛逃走把總督率汛兵上前擒拿拿得匪犯鄭亞有  
陳亞長二名時值昏黑餘匪四散奔逃追拿不及祇  
得將黃底快蟹船一隻牽帶回汛搜出船內軍械火  
藥等項理合開列清摺連匪犯二名稟解伏候轉解  
等情到守備據此隨查該快蟹船膽敢私造奉部巡  
查旂號遍海搜索商漁船隻爲害實深其係何人裝  
造此船何人支出飯食銀兩擾害商漁次數同夥幾  
人守備未便過於詢問並在該船內搜出賬簿八本

理合將犯人船隻軍械等項一並稟解憲轅伏乞察核咨解飭審以期水落石出實爲公便等情連摺到本軍門據此查匪徒駕船假冒巡查沿海滋擾大爲民害茲該守備吳占據把總黃耀全拿獲匪犯鄭亞有陳亞長二名並黃底快艇船一隻搜出船內軍械火藥紅白旂及出入賬簿等項列摺稟解前來除批回該守備併札香山協本標左營遊擊督率弁兵務將未獲逸犯迅速查拿解報毋稍疎縱並將匪犯船隻軍火等項卽差該守備解赴鈴轅聽候飭司審辦

咨煩查照示覆云云

一咨

督撫二院

云云等情連摺到本軍門據此據稟已悉

查匪徒駕船假冒巡

查沿海滋擾大爲民害茲據拿獲匪犯鄭亞有陳亞長二名並黃底快蟹船一隻搜出軍械火藥紅白旗及出入賬簿等項列摺稟解前來除咨解督部堂飭

審究辦外

合札飭緝札到該營卽便遵照仰卽遵照

督率弁兵

務將未獲逸犯迅速查拿全獲解報毋稍疎縱

速速可也

此繳

計粘抄匪犯姓名單一紙

一札香山協 本標左營 批大鵬右營守備

道光十六年正月 二十四 日

拿獲私鑄鐵炮咨請嚴辦稿

爲據稟咨會事道光十六年正月二十四日據大鵬營右營守備吳占稟稱竊於本年正月十八日據防守大澳汛把總黃燿全稟稱竊於本年正月十六日據該汛目兵張連陞稟稱查得本汛屬大澳涌同合舖戶陳亞辛造有熟鐵九節劈山炮四門等情據此把總當卽飭令該目兵帶同汛兵前赴同合舖搜出九節劈山炮三門三把連炮一門繳赴來汛嗣據官富司巡船頭役容英到汛說稱指認此炮係其巡船配

緝因壞爛修整等語把總登卽飭目往查該巡船現配有九節行營劈山班鳩等炮共九門挑刀三十枝竹筴鎗三十枝快鉞藤牌鈎鎌共二十件鳥鎗鉛子火藥等項現配役伴水手五十餘人又帶隨蝦笥艇一隻快蟹一隻每船約有二十餘人俱有鎗炮器械等項惟該蝦笥快蟹等艇一見目兵搜出同合舖鐵炮四門登卽解纜飛棹而去合將奉查緣由稟覆等情惟該巡役容英巡船炮械鎗刀鉛藥等項及水手多配在船足敷巡緝既係修整之炮初不稟知況此

炮係在同合舖搜出保無冒認情弊把總未敢擅便  
卽將前項炮位稟送回營伏乞賜文解究等情到守  
備據此隨將該九節劈山炮三門三把連炮一門飭  
差押解移送新安縣查收究辦外合將緣由附單稟  
明等情到本提督據此查私造炮械大于例禁今守  
備吳占搜獲九節劈山等炮顯係私造沿海地方不  
可不嚴行查辦除批回該守備速卽知會新安縣將  
同合舖炮匠傳到審訊確供及辦理緣由通報外咨  
會查照希賜嚴飭新安縣查傳究辦施行

一咨

督撫院

批大鵬右營守備吳占手本

據稟在同合舖起出九節炮三門三把連炮一門解  
送新安縣究辦等由已悉查私造炮械攸關例禁今  
官富司巡船既據查明現有炮械在船顯有別項情  
弊事關炮械除咨明督撫二院外仰卽遵照移會新  
安縣速提同合舖舖主夥伴嚴審確供核實通報該  
備仍錄取縣供呈報可也此繳

道光十六年正月

二十四

日



加派署叅將押犯赴省以備顧問稿

前肅寸緘度登釣覽客鵬二十五日據大鵬右營守備吳占稟稱守備京旋於十一月二十四日回任後卽赴洋巡緝查得洋面現有快蟹巡船懸掛燈旂安設鎗刀炮械同船舵水約五十餘人在洋追趕商船假以盤查爲名實係訛索搶奪守備跟踪追拿該船人眾一見兵船卽飛駛逃竄追至黑夜因瞭望不清未能速獲現仍督率舟師臺汛時刻畱心如該船到境定卽合力拿解等情當卽批飭該備務卽查明該

匪船踪跡速將人犯船械設法檢獲以清洋面如稍  
玩延定干叅辦批飭去後本年正月初該備來署面  
稟遵奉鈞批守備卽與各弁委分投訪拿昨已查明  
此項巡船係福永司巡檢所管業經函達新安縣查  
辦當又諄飭該備以此等匪徒旣已攢湊多金僱船  
製械懸掛號旗銜燈又四五十人同聚一船每日食  
用亦復不少今投在巡檢屬下假公濟私藉以盤查  
任情勒索搶奪雖已函致盛令縱卽撤回憑照而此  
等匪徒數月以來業已習慣斷不歇手更應多派弁

兵上緊查拿務獲解辦諄諄諭飭茲於本月二十四日守備吳占拿獲船犯稟解前來除備公牘卽飭守備吳占將船犯器械押解來省聽候飭司收審並卽飛札香山大鵬及本標左營將未獲各犯迅速拿獲另解歸案惟守備吳占應對半係土語不甚了了茲加派本標署右營遊擊何駿龍督同該備押犯來轅以備顧問一切情形云云

道光十六年正月 二十四 日



籌海初集目錄

卷之四

春秋操練炮準水軍歲需火藥分營製造稿

春秋操練炮準歲需火藥札飭中營承造稿

札營分造火藥稿

配藥火硝應請提淨交營以免虧折稿

打單圖記印單果否書列姓名咨請示覆稿

籌備生息長資練習以嚴守禦奏稿

十六年春巡閱西路各營官兵奏稿

中西兩路師船臺汛咨請查辦稿

賠鑄新炮工竣懇將都司黃廷彪開復摺

總督主稿

月給口糧購買薪米曉諭防兵稿

遴選員弁請陞各缺稿

澄海協都司李賢越陞叅將摺

總督主稿

准咨再議分兵訓練章程稿

議添協濟臺兵泗水爬桅等兵口糧稿

奏增協濟臺兵及泗水各兵口糧摺

總督主稿

創設秋操通行曉諭稿

秋濤浴鉄圖

師船水操號令說

中流擊楫圖

水軍泅水號令說

伏波洗甲圖

奏報虎門秋操會銜摺稿

附祭八臺大砲文

--	--	--	--	--	--	--	--	--	--



春秋操練炮準水軍歲需火藥分營製造稿

爲札催事道光十五年十二月二十七日准

三司糧  
貴司道

道咨呈奉兼署督部堂祁憲札案於道光十五年十

月十三日准水師提督關咨開爲照本提督昨將籌

議操練章程咨請鑒核旋荷飭議辦理咨覆到本提

督准此惟是籌備演習炮準操練水軍需用各項通

盤計算有應造存留爲儲備者有應每年造辦列爲

歲需者有應按季製辦者有應遞年歲修者欲善其

事先利其器有備無虞最爲上策第經費有常又不

得不倍加撙節本提督僅將應辦各件列單咨請衡  
奪或應增減刪改祈再飭議核覆等因當經飭行籌  
議第炮臺工竣在卽亟須會核辦理合就札催札司  
立卽會同迅將咨內粘單需用一切按條悉心籌議  
刻日詳覆以憑會核

奏辦毋再稽延等因奉此查本案先奉督憲牌行業經  
移行會議去後日久未據議覆茲奉前因除移行遵  
照籌議外第籌議需時所有火藥應先製造合先咨  
呈希將演習炮準操練水軍核計應需火藥若干飭

營赴局具領硝磺回營製造所需價銀由貴提督核  
明移會兩院並照司借款支給另籌歸補免悞軍火  
其餘各條俟議覆到日另行咨呈核辦等因到本提  
督准此查虎門新舊炮臺八座議定章程每年春秋  
二次演練炮準需用火藥一萬一千九百三十八觔  
八兩又調撥本標中左右及香山大鵬七營米艇十  
隻操練水軍每年春秋二次需用火藥二萬一千六  
百觔以上兩項共需用火藥三萬三千五百三十八  
觔八兩每百觔需硝八十觔共需硝二萬六千八百

三十觔零十二兩八錢每硝百觔例該銀四兩二錢  
三分一厘二毫五絲共該銀一千一百三十五兩二  
錢七分八厘每百觔需磺十觔共需磺三千三百五  
十三觔八兩八錢每磺百觔例該銀三兩一錢共該  
銀一百零三兩九錢六分火藥每百觔需用工膠柴  
炭銀一兩八錢零五厘共需銀六百零五兩三錢六  
分九厘九毫以上共計銀一千八百四十四兩六錢  
零七厘九毫自應遵照赴領至操船火藥二萬一千  
六百觔本標中右二營成造火藥過多誠恐趕辦不

及議請分給各營自領硝磺炭工承造其中右兩營配操米艇四隻應造火藥八千六百四十觔除札本標前後二營各代造藥一千五百觔順德新會四營各代造火藥一千四百一十觔核計硝磺工膠柴炭等項由各該協營備具妥文冊領差弁請領回營趕造成藥解交中右二營分船應用至本標左營配操米艇二隻歲需火藥四千三百二十觔香山大鵬各左右二營各配操船一隻每船歲需火藥二千一百六十觔已札飭各該協營核計硝磺工膠柴炭銀兩

備具安文冊領差弁徑赴請領併札本標中右二營  
將各臺遞年歲需演練炮準火藥一萬一千九百三  
十八觔由該營核計硝磺工膠柴炭銀兩備具安文  
冊領請領回營製造以應急需  
合咨查照檄飭藩司  
除咨督撫照司查照  
借款支給以免延悞施行

一咨

督

撫院

照會布政司

道光十六年正月

十六

日

春秋操練炮準歲需火藥札飭中營承造稿

爲札遵事照得遞年各臺演練炮準調撥米艇操練水軍需藥太多若俱由該營製造必致趕辦不及查本標左營香山大鵬營各配操船二隻每船需用火藥二千一百六十觔分飭各營自行配造其中右兩營操船四隻共歲需火藥八千六百四十觔已飭本標前後二營每營代造藥一千五百觔又順德協左右二營新會左右二營每營各代造一千四百一十觔卽由各該營核計硝磺工膠柴炭銀兩徑赴布政

司請領外合就札遵札到該署叅將即便移行本標  
中右二營遵照除船操硝磺不領外其各臺遞年歲  
需演練炮準火藥一萬一千九百三十八觔八兩仍  
由該營核計硝磺工膠柴炭等項銀兩備具妥文冊  
領差弁請領回營製造火藥以應急需毋違

一札署本標中軍

道光十六年正月 十六 日



札營分造火藥稿

爲飭遵事照得虎門新舊炮臺八座新議章程每年春秋二次演練炮準需用火藥一萬一千九百三十八觔八兩又調撥本標中左右及香山大鵬七營米艇十隻操演水軍每年春秋二次需用火藥二萬一千六百觔以上兩項共需用火藥三萬三千五百三十八觔八兩但藥數過多若分交中右兩營製造必致趕辦不及議請分給各該營代造合就札遵札到

該營卽便轉行

遵照代造火藥一千五百觔  
左右二營遵照每營代造火藥一千  
遵照遞年出船二隻歲需火藥四千

四百一十觔核計每藥百觔需硝八十觔需磺十觔

三百二十觔

需用工膠柴炭銀一兩八錢零五厘每硝百觔例價

銀四兩二錢三分一厘二毫每磺百觔例價銀三兩

一錢由該營備具妥文冊領差弁赴司借款支給領

回迅速製造火藥

造竣卽差弁送交中右二營分配

師船以資操用毋違

一札本標前營 本標後營 順德協 新會營

本標左營 香山協 大鵬營

道光十六年正月 十六 日

配藥火硝應請提淨交營以免虧折稿

爲

咨明  
札知

提淨硝觔以免虧折事照得虎門新舊炮臺

八座議定章程每年春秋二次演練炮準需用火藥  
一萬一千九百三十八觔八兩又調撥本標中左右  
及香山大鵬各營米艇十隻操演水軍每年需用火  
藥二萬一千六百觔以上兩項共需火藥三萬三千  
五百三十八觔八兩每藥百觔需硝八十觔共需硝  
二萬六千八百三十觔零十二兩八錢查遞年領買  
生硝提淨止存六折計虧淨硝一萬有零照所虧數

目應少造火藥一萬三千數百觔硝磺例禁私買無  
可通融今虧折過多應請飭議由局提淨交營抑或  
由營派弁赴局提煎其虧折情形業經面陳貴督部堂

飭令理事同知妥議示覆除行提屬各營及照會布

政司外合咨貴督部堂飭議或由局提淨交營抑派營

弁赴局煎提之處核示飭遵施行照會貴司施行合札遵照毋違

一咨 督院 照會布政司

一札提屬十四營

道光十六年正月 十七 日

打單圖記印單果否書列姓名咨請示覆稿

爲咨覆事道光十六年正月二十六日准貴部堂專咨內開爲咨催事案於道光十五年八月內准貴提督咨開據中軍叅將余清稟報署千總譚鴻飛把總區廷璋等拿獲在洋疊次搶奪匪犯李亞法何桀籠陳洪貴鍾祖有四名併搜獲火藥圖記紙單專差外委楊永芳等賚解請飭發審辦等因當經前署部堂將解到匪犯李亞法等四名連火藥圖記紙單一併發司委員審辦嗣據委員前署廣州府知府潘尙楫

等會稟提訊李亞法等各犯堅稱並未爲匪且各不  
認識併據訊何桀籠供稱圖記印單實不知來歷係  
弁兵查拿時掉在船內刑訊不移該府等查驗圖記  
印單並無姓名紙色印色灰舊似非目下行用之物  
現據該犯等父母呈求察釋是現訊供情與營稟大  
相徑庭是否該犯等狡卸抑係弁兵查拿未實又經  
批司速飭該府等再行提犯研鞫錄供通報察核並  
據稟移咨貴提督查明弁兵當日查拿實在情形咨  
覆飭知各在案迄今日久未准咨覆亦未據該府錄

供通報現已開篆亟應查訊明確分別辦理未便再  
延除札催東臬司查照先今批檄速飭廣州府等再  
行提犯虛衷研鞫務得確情錄供通報察核毋再稽  
延外合就咨催煩爲查照希卽查明弁兵當日查拿  
實在情形咨覆飭知或令引拿線人陳亞進把總區  
廷璋赴府當面質實訊辦以杜狡展而免枉縱竝切  
等因到本提督准此查此案係陞署提標中軍叅將  
余清於上年下班輪巡期內遵奉前督部堂盧通行  
札飭查拿各縣匪徒糾結夥黨在於水陸各處搶奪

行劫擄人打單等犯務獲解辦並經本提督札行前  
由飭令訪拿各在案嗣於上年八月初四日據余叅  
將稟稱督率千把弁委在洋拿獲匪犯李亞法何桀  
籠陳洪貴鍾祖有四名並獲三板艇一隻蝦筍艇二  
隻繒仔船一隻濕水火藥一包約二觔餘圖記四個  
單紙十三張稟解前來卽經備咨委弁將犯人船隻  
圖記單紙一併解省飭發審辦在案卽於八月十七  
日准前署部堂祁咨覆飭司收管委員研審在案十  
月二十七日又准前署部堂祁咨開道光十五年十



月十一日據署廣州府知府潘尙楫候補通判朱樞  
會稟卑署府等遵卽提犯逐加研訊據李亞法供番  
禺縣蛋民年二十一歲父親李葉容已故母親郭氏  
現年七十歲並無兄弟娶妻楊氏生有一女小的向  
駕小艇採捕魚蝦度日本年七月二十八日上午時  
候在虎門沙角地方被官兵拿獲要小的作線帶拿  
賊匪小的因不知賊匪姓名不允作線就被解案的  
平日並無爲匪現獲的鍾祖有陳洪貴何桀籠向不  
認識並未在營供及搶劫之案亦未供有陳洪貴鍾

祖有之名是實據何桀籠供香山縣蛋民年三十四  
歲父親何朋憲現年七十歲母親鍾氏現年六十四  
歲並無弟兄娶妻黃氏未生子女小的與黃桀良周  
之順在馬泗和船上採捕魚蝦度日因船主有病回  
家七月二十八日小的與黃桀良周之順把船駛至  
香山縣屬大角河面捕魚被不識姓名賊匪駕艇攔  
近小的船邊圖搶黃桀良周之順先行梟水逃走小  
的被賊匪連艇捉獲把小的關禁艙底是日下午時  
候被官兵查拿那賊匪逃走把小的獲解的平日並

無爲匪現獲的李亞法們向不認識是實據陳洪貴  
供番禺縣蛋民年四十七歲父親陳高意已故母親  
李氏年八十二歲並無弟兄娶妻彭氏未生子女向  
駕繪船採捕魚蝦度日本年七月二十九日在虎門  
沙角地方因風大小的船隻創壞官兵巡船官兵要  
小的賠還小的不允致被獲解的平日並無爲匪現  
獲的李亞法們向不認識現有七門埠鹽票船照存  
據埠保周廷認等可以保結是實據鍾祖有供新安  
縣人年三十八歲父親鍾朋鳳已故母親鄭氏現年

七十八歲並無弟兄娶妻羅氏生一子受僱在鄭可知船上撐賣竹排度日本年八月初一日早往本鄉澁狗布地方蔗田掘草已牌時候適官兵經過圍拿賊匪小的往看致被營兵悞拿平日並無爲匪現獲的李亞法們向不認識是實各等供卑署府等以弁兵在何桀籠所乘蝦笱艇內獲有打單圖記印單該犯等俱稱並未爲匪明係狡賴復向嚴詰據何桀籠供稱圖記印單伊實不知來歷係弁兵查拿時掉在船內再三刑究堅供不移並據何桀籠之父何朋憲

同陳洪貴之母陳李氏赴府呈稱伊子何桀籠陳洪貴一向採捕魚蝦度日並未爲匪籲求察釋卑署府等查匪徒打單似必於印單內書立姓名而提驗解到圖記印單並無姓名且紙色印色俱屬灰舊似非目下行用之物事涉可疑但弁兵旣將該犯等拿獲自必確係匪徒今該犯等堅稱並未爲匪且各不認識現訊供情與奉行營稟大相徑庭是否該犯等狡卸抑係弁兵查拿未實理合將現訊供情稟請察核移咨提憲查明實在情形俟奉批行到日再行查訊

分別究釋等由到本兼署部堂據此當批據稟提訊李亞法等各犯堅稱並未爲匪且不認識併據訊何桀籠供稱圖記印單實不知來歷係弁兵查拿時掉在船內刑訊不移該府等查驗圖記印單並無姓名紙色印色灰舊似非目下行用之物現據該犯等父母呈求察釋是現訊供情與營稟大相逕庭是否該犯等狡卸抑係弁兵查拿未實總須平心審辦仰東按察司速飭該府等再行提犯虛衷研鞫務得確情錄供通報察核仍候據稟移咨水師提督查明實在

情形咨覆飭知或令引拿線人陳亞進把總區廷璋赴府當面質實訊辦以杜狡展而免枉縱等因印發外咨會查照希卽查明弁兵當日查拿實在情形咨覆飭知或令引拿線人陳亞進把總區廷璋赴府當面質實訊辦以杜狡展而免枉縱施行等因准此卽經飭行查覆去後緣線人陳亞進係隨時購來民人急切查傳未到且此案匪犯係叅將余清在洋督率弁委分投拿獲詢明稟辦非如各弁委之各拿各犯者可比其中原委必得該叅將京旋方能核實至余

清係由陞署遊擊尙未實授復蒙前督部堂盧以該員誠實可靠

奏請陞署提標中軍叅將於上年十月內領咨進京歷隨本提督辦事將及一載謹慎小心斷不致有誣栽情事况據委員訊明何桀籠一犯供稱被不識姓名賊匪駕艇攏近小的船邊圖搶黃桀良周之順先行梟水逃走小的被賊匪連艇捉獲把小的關禁艙底是日下午被官兵查拿那賊匪逃走把小的獲解的等供文內又云卑署府等以弁兵在何桀籠所乘蝦



筍艇內獲有打單圖記印單該犯等俱稱並未爲匪  
明係狡賴復向嚴詰據何桀籠供稱圖記印單實不  
知來歷係弁兵查拿時掉在船內再三刑究堅供不  
移等語試思何桀籠所座之船旣被賊匪搶座將伊  
關禁艙底迨經官兵查拿賊匪逃走當其時何桀籠  
仍然關禁艙底該匪又何所據指定圖記印單係弁  
兵查拿時掉在船內犯供矛盾已屬顯然該委員等  
應卽從此跟追自可得實又稱卑署府等查匪徒打  
單似必於印單內書立姓名而提驗解到圖記印單

並無姓名且紙色印色均屬灰舊似非目下行之物事涉可疑等語本提督復查打單勒贖見諸公牘者外省誠少見聞惟廣東爲最盛自本提督蒞任以來水師各營報獲者亦復不少卽本標中右兩營上年亦連獲數起查驗紙色印色均不新鮮而圖記印單內並無書刻姓名或者府縣衙門歷年辦理打單之案必以印單內書立姓名又須紙色印色均屬新鮮者方得謂之實在打單人犯若圖記印單內並無姓名而紙色印色又不新鮮者概不得謂之打單人

犯本提督歷官江省於打單勒贖之案向未經歷刻  
下服官斯土緝拿匪犯各營均當認真尤慮營員不  
知此等分別情節或致枉拿不可不早爲咨請定式  
應請飭承將近年打單各起成案檢出數起飭令府  
縣檢卷呈驗明悉卽賜示覆俾獲通行所屬各營遵  
奉定式此後遇有拿獲打單人犯查其圖記印單內  
書有姓名者方准解辦以免枉拿至原獲線人陳亞  
進刻又飭營查傳一俟傳到再飭把總區廷璋一同  
赴府候質惟此案匪犯係叅將余清一手經理似須

該叅將京旋方能確覆合併聲明緣准咨催合先咨  
覆察核施行

一咨 督院

道光十六年正月 二十六 日

籌備生息長資練習以嚴守禦奏稿

總督主稿

兩廣總督臣鄧廷楨  
廣東巡撫臣祁墳跪

奏爲遵

旨查議防夷經費必須籌備生息方能長資練習以嚴守禦而壯聲威恭摺

奏祈

聖鑒事竊道光十六年正月十五日臣鄧廷楨承准軍機大臣字寄十五年十二月二十五日奉

上諭據祁墳奏請將與夷人交結案犯入官家產器物估

變作爲防夷經費等語此案逸犯姚九區寬曉習夷字  
夷語與夷人通信交結開設窑口販烟圖利與私通外  
國無異自應照例辦理將該犯等家產器物估變入官  
至所奏籌備虎門海口增建炮臺每年練習礮兵歲需  
炮子火藥及調操水師加賞口糧等項卽將此項入官  
家產估變作爲防夷經費著鄧廷楨到任後查明妥議  
具奏將此諭令知之欽此遵

旨寄信前來

臣

鄧廷楨於去冬蒞任卽向

臣

祁墳面詢情

形兩月以來周咨博訪查得虎門海口爲廣東中路

咽喉前因水師踈防致被擘嘍夷船闖入經前督  
臣盧坤與臣祁墳臣關天培會議添建炮臺增鑄大  
炮以嚴守禦奏奉

硃批所議周妥之至務須練習精純方能得力震懾羣夷

也欽此嗣臣關天培於督催臺工之際往來洋面將防

禦海口一切章程悉心熟計必須預籌經費方能操  
練精純曾函商臣祁墳預爲籌議是以擬將逸犯姚  
九等入官家產估變仰懇

聖恩作爲防夷經費旋馳往虎門會驗修竣炮臺工程又

經臣關天培面商各炮臺應加操練火藥鐵彈及合  
操口糧獎賞並各項費用所需約有十三款

奏明俟臣鄧廷楨到任後會籌辦理在案茲欽奉

諭旨著臣鄧廷楨查明妥議具奏事關防禦外夷爲

國家邊圉要務臣等受

恩深重敢不通盤籌計以期有備無患永遠可行遵會查  
得虎門新舊炮臺八座安設新舊炮位共二百三十  
四尊內新建永安鞏固兩臺係水師提標右營管轄  
配防臺兵應增七十名方足敷額先經前督臣盧坤



與臣關天培酌議於兵丁稍多之水師提標左前兩營及南澳香山海門澄海平海鎮協各營內抽撥添入提標右營以足新建防臺兵額茲臣鄧廷楨蒞粵詳察形勢防兵難於額外議增自應照議抽撥辦理惟兵力固期充足而武畧尤貴操防必須恪凜

綸言練習精純方能得力查虎門各臺傍山臨海臺依山建舟趁潮行操練之方迥殊陸路其攻堅致遠第一以炮準爲先此外則舵工宜解占上風壯丁宜善泅深水至於一切火藥器具均須預爲製造俾得應手

無虞其最要者尤在上官董率將領操練精嚴共之以苦甘鼓之以賞罰使耳目習於號令膽氣練於波濤然後身手相和腹心可寄今臣等公同酌擬於每年二月杪八月初由提督分飭本標中右兩營將備率領城汛親兵五百十八名分赴威遠鎮遠橫檔大虎永安鞏固六臺連原派防兵三百三十名派定每兵四名管炮一尊專司練習炮準其沙角大角臺汛員弁管領防兵五十名專司號炮號旂再調提標中左右三營米艇六隻香山大鵬左右營米艇四隻共

船十隻每船配兵六十四名共兵六百四十名每船  
派官一員春季以大鵬營叅將總領水操秋季以提  
標左營遊擊總領水操兼管各項火器及斗手爬桅  
水兵泅水等技預期調齊海口先飭將備教練炮準  
務使高低遠近不爽毫釐師船調絨輕靈鎗炮層疊  
聯貫水兵則浮潛並用火器則奇正兼施俟操練漸  
純提督親臨較閱凡弁兵便捷勇壯者賞必從優拙  
劣庸懦者罰不容貸務使心齊令一士氣奮興每次  
操演以十日爲度仍選舊炮十尊運置公所按十日

一次派弁專督挑就各兵演習裝藥下子操練一應手法務俾得心應手久而益精庶幾餉不虛糜兵皆得力

天朝聲威遠播足可懾服羣夷惟核計每年操練兩次應用火藥羣子封門鐵彈及調操水師加賞口糧等項加以添製裝藥布袋及一切隨炮器具合計各項所費不貲通盤樽節約估歲需銀五千七百餘兩另加預備賞犒銀一千兩共銀六千七百餘兩

國家經費有常自應預爲熟籌方可臨期支應

臣祁墳

前奏查抄逸犯姚九區寬等入官家產器物飭令府縣估變作爲防夷經費臣鄧廷楨因前項抄產係卸署廣州府佛岡同知潘尙楫暨卸署番禺縣知縣張錫蕃經手辦理該員等均須請咨引

見當商之

臣

祁頊飭令暫緩請咨會同現任廣州府珠爾

杭阿番禺縣徐應照先行確切查估據稱約可變銀五萬餘兩飭催如數變價解繳藩庫收貯伏查遞年操練歲需費用銀六千七百餘兩如卽將此項儘數爲防夷經費僅敷數年之用實非經久良圖茲據

藩司阿勒清阿會同臬司王青蓮運司李振翥督糧道鄭開禧公同熟計此項歲需費用擬將抄產估變銀五萬餘兩發典週年一分生息歲可得息銀五千餘兩尚不敷銀一千餘兩查有從前奏設三路內河巡船三十隻配巡弁兵口糧在關鹽盈餘項下動支現在今昔情形不同應酌裁十隻每月節省口糧銀三百餘兩通年可節省銀三千六百餘兩其抄產變價生息不敷即可於裁撤巡船節省項下撥給支應以免延誤據該司道議詳前來

臣鄧廷楨臣祁墳謹

將臣關天培前議應需十三款覆加詳核其間有常年必需亦有隨時可以節省並有一年製備可用數年總在按年按款撙節動支冀歸實用以垂永久查整飭水陸營務係臣鄧廷楨專責且虎門距省不遠臣鄧廷楨當隨時親詣巡查臣關天培身任全省水師重寄職任攸關務使防禦常嚴羣夷胥惕以期仰

副

聖主綏戢重洋震疊懷柔之至意謹合詞會同水師提督

臣關天培恭摺具

奏並將會議操防需費十三款敬繕清單恭呈

御覽是否有當伏乞

皇上聖鑒訓示謹

奏

謹將會議虎門操防炮準及練習水操需費十三款  
謹繕清單恭呈

御覽

一各臺大炮應添火藥封門鐵彈羣子以資儲備也  
據臣關天培議稱查威遠鎮遠橫檔大虎沙角大



角鞏固永安炮臺八座共安大小鐵炮二百三十  
四尊每年春秋操演炮準每次下子各放三出兩  
次各放六出每年需用火藥並封門鐵彈各重一  
萬一千九百餘觔歲需羣子計重一千零八十八  
觔十兩以上封門鐵彈羣子兩項內新炮五十六  
尊業經每炮鑄有封門子四十個羣子各四百個  
卽以此項雷爲儲備其舊炮一百七十八尊本有  
儲備存貯營局雖多寡不能盡一均尙可用毋庸  
添造惟配炮火藥向無貯備歷年正九兩月各臺

演洗炮位均於鎗兵儲備藥內墊用隨時請領造  
補歸款此時操防緊要每歲春秋又須演習炮準  
用藥甚多營中儲備不敷墊用况造藥需時若不  
預爲儲備勢難濟用應請籌添儲備大炮火藥三  
萬六千觔分貯提標中右兩營有備無虞又炮彈  
向大海施放不同陸地萬難拘泥檢七銷三之例  
致滋兵累不能不按數製給等語臣鄧廷楨臣祁  
墳會查向來虎門舊有炮臺每年正九兩月演洗  
炮位應用火藥例在停操節省火藥內抵用其鉛

彈雖例應檢七銷三而炮彈向海施放勢難拘泥成例係屬實情飭據司道公議現在修造各臺添鑄大炮議於春秋練習炮準應用火藥自需加增但係專爲儲備而設尙可毋須如此之多查有各營領回連州軍需案內餘存火藥先後提撥一萬勛並飭理事同知撥給製備火藥二千勛解交提標中右二營領存備用如果不敷隨時再行籌備其炮彈一項應卽如數製給需用銀兩由司在於籌備經費項下動支給領核實報銷

一各臺大炮每年兩次演準應添歲需火藥羣子封門鐵彈以資操練也據臣關天培議稱虎門新舊炮臺八座共設大炮二百三十四尊每炮下子試準一出需用火藥一千九百八十九觔十二兩春秋兩次各放六出共用火藥一萬一千九百三十八觔八兩共用封門鐵彈一萬一千九百三十八觔八兩共用羣子一千零八十八觔十兩按配造精緻火藥每百觔該工料銀五兩五錢封門鐵彈每百觔照現辦價值該銀六兩羣子每百觔照現

辦價值該銀八兩三項共需銀一千四百六十兩  
一分七厘五毫等語臣等會查操練炮準春秋兩  
次應用火藥羣子鐵彈在所必需惟查准銷之例  
炮位需用火藥應在遇雨封印暑月停操出差病  
假及輪流出巡出海捕盜各鎗兵節省火藥內撥  
補若實在增添炮位操練多用例無准銷者自應  
核計籌備貼補現在虎門炮臺八座其中增添新  
建者雖止有永安鞏固二臺但各臺練習炮準春  
秋調操師船均爲防夷新定章程非同正九兩月

演洗炮位可比若不將新舊炮位應用火藥羣彈  
一併籌備必致臨時不敷應操應如所議添製備  
用共需銀一千四百六十兩零由司在於籌備經  
費項下支給理事同知承領製造由營領回備用  
年終核實報銷

一每年操練水軍與炮臺互相應援宜添備歲需火  
藥以供訓練也據臣關天培議稱每年春秋兩次  
調用提標中左右香山大鵬每營各調米艇二隻  
共船十隻每隻配鎗炮兵四十四名柁繚斗旋兵

十名洒水兵十名各配炮十二尊大小牽算每炮以一千觔重爲率每操一陣每炮各放十二出兩次共操六陣每炮各放七十二出每出應用火藥二觔八兩共用火藥一百八十觔十船共炮一百二十尊共需火藥二萬一千六百觔該價一千一百八十八兩等語臣等會查師船水軍與炮臺合操互爲聲援表裏相應爲練習防夷要法應需火藥實不可少應如所議每年准添火藥二萬一千六百觔共該價銀一千一百八十八兩由司在於

籌備經費項下撥給理事同知領項製造移營領  
回備用年終核實報銷

一每年六七八九四個月宜籌添防兵口糧以期果  
腹也據臣關天培議稱虎門炮臺八座共派防兵  
三百八十名依山傍海四無居鄰與存城防汛情  
形不同兵丁月支餉米本屬無餘家口同居已難  
足用派守炮臺必須分爨在空閒之日原准其替  
換購買薪米自六月起至十月初止則夷船絡繹  
而來正防範吃緊之際若任其離臺購辦實恐曠



悞可否仿照巡洋各兵月給口糧之例定以六七八九四個月爲度每名賞給口糧銀四分通計一百二十日共需銀一千八百二十四兩按月支給庶防兵心無內顧果腹有資等語臣等會查八臺依山傍海四無居鄰自六月至九月止正防夷吃緊之際分爨旣形竭蹶回家又恐疎虞此一百二十日內自應加以體恤賞給口糧俾資果腹應如所議計需口糧銀一千八百二十四兩由司在於籌備經費項下撥給領回按名散給核實報銷

一每年二八月兩次練習炮準調練水兵宜嚴賞罰以示勸懲也據臣關天培議稱查各臺原派防兵三百八十名演炮之際不敷配用應於存城操演兵內添派兵五百十八名分赴各臺會同練習又調操水兵共用師船十隻共配兵六百四十名二共添配兵一千一百五十八名春秋兩次共操二十日必須勸勤懲惰賞罰嚴明俾各兵咸知感畏庶期日漸精純是賞需亟應預籌等語臣等會查練習炮準調操水軍齊集多兵自須加以賞罰俾

知觀感奮興應如所議除懦弱懶惰不堪造就者隨時責革外其應行賞賚弁兵由司在於籌備經費項下每次提銀五百兩移交提督屆期備賞事竣造冊報銷如有餘剩留爲下屆之用

一各臺應添脚船以資濟渡也據

臣

關天培議稱查

虎門海口新舊炮臺八座孤懸海面濟渡需船向例夷商船隻一進虎門沙角防弁卽須稟報知會前途其鎮遠橫檔弁兵亦須輪流押送至黃埔交替且不獨公事需船卽弁兵日食所需無一不赴

內地採買各臺本各設有三板船一隻或因年久朽爛或因遇颶擊碎若不亟爲籌添必致公私兼悞查前項各船因工料無多船身板薄易於壞爛應請製造身長二丈四尺寬八尺三板船八隻分給八臺應用等語臣等會查虎門各炮臺向有例設三板船濟渡長寬丈尺舊有定式每隻准銷銀十二兩六錢四分五厘動支營中公費造報今因年久壞爛無存先據提標中右二營議請添製每隻估需銀四五十兩稟經提督咨行籌辦因核與

例案不符尙未定議詳明給造查估造向有定例  
原難額外增估惟臺兵需船孔亟營員廉俸無多  
勢難賠墊未便拘泥成例應酌定每船准給銀二  
十四兩八船共需銀一百九十二兩在於籌備經  
費項下動支給領由提標中右二營自行製造以  
資濟渡遇有壞爛亦在籌備經費項內貼補支應  
由司核實報銷毋庸再動公費報部

一新舊大炮宜添炮蓋以免銹蝕並製火藥布袋隨  
炮器具以資應用也據臣關天培議稱查八臺大

炮共二百三十四尊各安炮架分置各臺日晒雨淋毫無苦蓋不特炮架木質易朽炮位亦易銹蝕應請各添一寸厚木板二塊照依炮架長短做成人字式炮罩以資遮蓋又每年兩季操練炮準水操共需火藥三萬三千五百三十餘觔每藥二觔八兩配裝布袋一個應用粗紅布一尺歲需布一千三百四十一丈五尺紅布每丈銀一錢八分共需銀二百四十一兩四錢七分查常年演洗大炮所用布袋因爲數無多向係由營捐辦今遞年操

練所用十倍於前營員捐辦力有不逮又八臺大炮二百三十四尊隨炮器具每尊配用鐵炮鑊一把春藥木棍一根藤帚一條鐵門針一根鉛星一副攢炮襍木棍四條火龍杆一枝皮巴掌一個炮眼蓋錫一塊又每炮二尊合用水缸一隻以上各件歲需修理添補一次每炮一尊需銀八錢大炮二百三十四尊共需歲修銀一百八十七兩二錢應請籌給等語臣等會查裝藥布袋及隨炮器具均係必需之物炮蓋一項亦爲經久起見今據

約估工料銀七百餘兩均應如所議在於籌備經費項下支給製造惟炮蓋及隨炮器具經此次製備之後嗣後止須歲修應由臣關天培按年勘驗覈實請領以杜冒濫仍由司彙案報銷

一各臺原派防兵臨事不敷派用應預練存城兵丁以備協濟也據臣關天培議稱查炮臺防兵向有定額營中巡洋防汛兵數無餘以致臺兵不能加派卽如威遠鎮遠橫檔三臺每臺各安大炮四十尊每臺僅派防兵六十名是每兵二名管炮兩尊



施放焉能敷用是以逢操遇事必須調派城汛操兵分往協濟若不預爲操練雖營兵無異市人現將存局舊炮挑出十尊分置中右兩營衙門箭道選定鎗炮兵五百十八名專派千把於每月逢五日期操練裝藥下子描準燃火一應事宜旣免別增耗費而各兵心思手法可期漸就精純以之調派到臺方可與臺兵合用但舊炮雖係虛演必須添製炮架門針春藥木棍炮鏟皮巴掌攢炮木棍及鉛星斗火龍杆等項十副以備逐件練習計炮

架等件每製一副約銀八兩十副共需銀八十兩俾演習有具訓練方能得力等語<sub>臣</sub>等會查練兵全在平時而器具必須應手所需工料爲數無多應如所議在於籌備經費項下動給製備由司彙案報銷

一師船備用火器宜隨時製造以免周章也據<sub>臣</sub>關天培議稱粵省硝性斥鹵造成火器不堪久貯雖安置高燥之處兩月以後卽行回潮不能致遠所有大小火箭五虎箭羣火箭噴筒火罐火號箭箱

溜筒等項必須按季製辦方能得力約計每季製辦一次需銀三十兩每年需工料銀一百二十兩等語臣等會查師船備用火器貴在迅發遠攻自應按季製造俾免回潮而資利用此項歲需無多應如所議在於籌備經費項下按季領回自行製辦備用由司彙案報銷

一八臺大炮應添製歲需火繩以免兵累也據臣關天培議稱查每年按期演試炮準需用火繩四百六十八丈以榕樹根成造每丈價銀五分應請每

年添製大炮火繩五百丈計銀二十五兩如有餘  
存卽畱爲儲備向來火繩由兵自備今用數較多  
應由官備以恤兵艱等語臣等會查火繩向例由  
兵自備今臺兵操練大炮需用較多自應官爲製  
備以恤兵艱計每年製備火繩五百丈歲需工料  
銀二十五兩在官爲數無多而兵可免累應如所  
議在於籌備經費項下製備彙案報銷

一 每年春初應購柴草以資備用也據臣關天培議  
稱海口備禦第一以炮位爲先次則以火攻爲要

應請於每年二月間儲積山柴茅草八百担堆貯空所久之潮濕乾透見火卽燃統計柴草八百担連運脚約需銀一百兩此外火船及應配一切燃火料物均俟遇事購辦等語臣等會查購貯柴草以資備用係爲火攻起見此項柴草價值歲需無多應如所議在於籌備經費項下動支購買堆貯由司彙案報銷

一各臺每年應更換誌樁一次以測潮水而助炮準也據臣關天培議稱威遠鎮遠橫檔大虎及新建

永安鞏固六處炮臺每臺左右應於水中安釘誌  
椿木二根以測潮水俾弁兵知潮水之長落以定  
炮口之高低庶子出不致過於低昂於炮準最關  
緊要惟海內蠔蟲蛀木易斷每年須更換一次此  
項誌椿僅用圍圓一尺四五寸杉木每根約計價  
銀四兩六臺共誌椿木十二根約需銀四十八兩  
所費有限獲益實多等語臣等會查此項誌椿爲  
向例所無而藉以測量高下實屬在所必需每年  
植立海中蠔蟲齧蛀易損應如所議在於籌備經

費內遞年領銀製換由司彙案報銷

一各臺添製燈旗應按年易新以壯觀瞻也據臣關  
天培議稱虎門炮臺八座本各有旗杆一根黃布  
旗一面日間懸掛號旗夜間懸掛號燈惟終年日  
晒雨淋易於黻舊必應按年更換以新耳目而壯  
觀瞻八臺共需旗布銀九兩六錢再六七八九等  
月每夜每臺應給油燭銀三分八臺四個月共給  
油銀二十八兩八錢以資守望等語臣等會查前  
項燈旗爲觀瞻所繫高懸臺畔易爲風雨推殘自

應按年更換一次至每臺給四個月油燭亦屬在所必需應如所議在於籌備經費項下遞年領項自辦由司彙案報銷以上十三款臣鄧廷楨與臣祁墳同司道悉心核議實屬練習費用所必需臣等因經費有常其例准開銷者歲有常經例難准銷者自應籌項貼補庶期練習精純兵皆得用是以議將私通夷人犯產估變入官作爲防夷經費籌議生息連裁撤巡船節省弁兵口糧添補以資操練臺防調遣水軍之用洵屬以公濟公是否有



當謹條分件繫繕具清單恭呈

御覽

道光十六年三月

初七

日會奏

道光十六年五月十一日奉到

硃批另有旨欽此同日承准

軍機處錄寄道光十六年四月初九日內閣奉

上諭鄧廷楨等奏請籌備生息以資防夷經費一摺廣東  
虎門各炮臺防夷兵丁據該督等查明每年操練應用  
火藥鐵彈及加賞口糧等項共需銀六千七百餘兩自

應及早預籌以備支應著照所請准其將查抄逸犯姚九區寬等入官家產五萬餘兩發典生息一年所得息銀五千餘兩作爲經費其不敷銀一千餘兩著准其於內河裁撤巡船節省項下撥給該督等仍當按年按款樽節動支務必費歸實用以垂永久至單開會議操防需費十三款所議俱妥要在實力行之切勿日久生懈凜之該部知道單併發欽此

十六年春巡閱西路各營官兵奏稿

廣東水師提督臣關天培跪

奏爲校閱中路西路各營官兵技藝巡查海面演試炮  
準情形恭摺

奏祈

聖鑒事竊臣仰沐

天恩補授廣東水師提督蒞任後卽親詣中路洋面察看  
山形海勢履勘各處炮臺測量海口潮汐凡必需增  
改者均悉心籌議與前督臣盧坤節次函商已將增

改緣由會銜奏蒙

俞允並議於每歲春秋操演各臺炮準練習各船水兵其應用火藥等項咨商督撫籌款製辦又核定訓練巡防更替章程通行各營遵照務使兵技純熟出洋習慣風濤俾操巡兼收實效至虎門海口爲中路咽喉雖添臺增炮兵船分合巡防聲勢現已聯絡第炮不勤演則子出無準兵技欠精則膽力不壯臣於炮臺左右水面各安誌樁二根劃明尺寸又將炮口安高炮尾加添木墊蒸就木排懸簾作靶放入中流隨潮

進退督率官兵按期打準教以視誌椿知潮水長落  
加木墊定炮口高低手眼練熟則子出有準心專氣  
壯則遠近咸宜惟是水師人材本少而廣東營伍誠  
如

聖諭風氣虛浮水師廢弛尤甚當

臣

到任之初更不得不

舍短用長擇人任事勸勤懲惰賞罰兼行一載以來  
官兵積習漸就湔除操巡亦漸有起色至出入海口  
民夷貨船均恪遵法度刻下載貨夷船乘風回棹洋  
面現無緊要事件

臣

酌帶兵船於二月初六日自虎

門放洋由香山廣海陽江一帶經瓊州鎮所屬各洋面遍歷巡查周覽形勢就船點閱巡洋官弁併各水兵駕駛折戢把舵爬桅俱尙靈便經由沿海臺汛查驗防守弁兵尙無老弱配船配臺炮械均屬整齊搜查濶洲斜陽禁島並無潛匿奸民諄飭各段巡洋員弁激發天良和衷實力有盜卽拿不得稍分畛域務使安益求安臣卽挨次較閱官兵轉至海口會同署瓊州鎮總兵臣劉得高閱海口營官兵由海安硃洲等營閱至陽江會同陽江鎮臣何岳鍾閱陽江官兵

由廣海香山前山大鵬逐營較閱進巡內河查閱新會順德及提標後營前營內河水師官兵回至虎門較閱提標中左右三營官兵陣式並合操外海兵船其轉篷調戩搶占上風尙屬便捷試放火箭噴筒等項亦能迅速致遠演放虎門新舊各臺大炮聲威甚壯於四月初五日事竣臣每到一營詳細較閱所演陣式進退步伐連環鎗炮併籐牌長矛雜技大致均尙可觀鎗箭各靶悉遵部式中靶亦及分數查點各營馬匹軍裝器械火藥錢糧均足額無虧至各營官

兵內凡人材技藝較優緝捕勤能者均分別等第當場獎賞存記其弓力不足鎗箭少準而年力漢仗尙堪造就者亦均分別責懲限習惟署海安營遊擊之陽江鎮標右營都司徐成章署海安營守備之本營千總林茂菁均訓練無方以致兵技不純應將徐成章降爲守備林茂菁降爲外委又廣海寨守備鄭大斌年力就衰應卽勒令休致廣海寨千總李元彪署吳川營千總之硃洲營把總林建功聲名平常弓馬生疎提標中營外委陳正勳東山營外委招繼宗廣



海塞外委朱朝莊弓馬軟弱以上五弁均應斥革提  
標前營把總梁輝熊礪洲營把總蘇維畧廣海寨把  
總陳朝壯均弓軟無準應降補外委陽江右營外委  
潘奇韜吳川營外委林萬年箭無準頭年力尙壯應  
降補額外外委差操以觀後效並據該管鎮將揭報  
前來現在咨會督臣鄧廷楨

題 叅咨部勒休降革統計閱過各營等第以提標中左  
右前後陽江左營順德協左右新會左營等九營人  
材弓力鎗箭準頭較優香山協左營新會右營大鵬

右營東山海口龍門協左右崖州協水師等八營次  
之海安碇洲吳川陽江右廣海香山右前山等七營  
又次之伏思廣東營伍積習相沿因循已非一日雖  
水師首重巡防然必須兵技精強緝捕方能得力臣  
受

恩深重訓兵防海是其專責惟有竭盡駑駘實心整頓嚴  
飭各營將脩認真操練巡防以肅營伍如有玩懈不  
力之員弁立即分別叅革不敢稍事姑容以期仰副  
聖主慎重海疆修明武備之至意謹將查閱過中路西路

官兵營伍分別核辦情形理合恭摺具

奏伏乞

皇上聖鑒訓示謹 奏

再臣查看沿海一帶炮臺墩汛營房因年久失修坍塌

殘過甚其陽江瓊州兩鎮所屬兵船修造未盡堅固

必須趕緊興辦庶沿海聲威聯絡巡防期收實效於

海疆實有裨益臣路過省城會商督臣鄧廷楨撫臣

祁墳分別緊緩先將最要炮臺汛房估工趕辦再及

次要並嚴飭承辦船工之員此後凡屆拆造兵船進

廠務將長寬丈尺及釘灰船縫一律加工如法承造  
工竣派委道將大員詣廠會同驗收交管如敢仍前  
草率由督臣叅

奏責令賠造合將臣查明沿海臺汛兵船會商籌辦緣  
由謹附片

奏聞伏乞

聖鑒謹

奏

道光十六年四月

初六日

道光十六年六月二十七日奉到

硃批知道了欽此



中西兩路師船臺汛咨請查辦稿

為咨會事為照中西二路各廠承造師船或桅舵購造不能如法或配釘稀少或艙縫不堅並驗有改收窄短不敷則例尺寸者是以每年夏秋一遇颶風大風卽沉失船隻炮械淹斃弁兵之案層見叠出又查驗沿海墩汛炮臺因年久失修有全行坍塌者有坍塌過半者有兵房殘損弁兵不堪棲止者本提督此次西下閱兵卽帶同各營官弁查悉大概情形業將兵船造修未盡堅固炮臺墩汛因年久失修附片具

奏惟是船不堅固則難禦風浪臺汛坍殘致弁兵無處棲身易啟推諉之漸且沿海聲勢因而斷續不通於巡防大有關係業將具

奏緣由面陳大概並將奏稿咨明水案除又飛咨陽江瓊州二鎮並專札中路各營汛將各處炮臺墩汛再行逐細確查分別完整坍殘註明最要次要即日另造細冊呈送外合就咨請希卽轉飭中西兩路鎮協各營並行各縣會營速將所隸炮臺墩汛確勘分別緊緩或應報部請項興修或由地方官次第捐修之



處伏祈衡奪示覆施行

一咨

督撫院

道光十六年四月 十一 日



賠鑄新炮工竣懇將都司黃廷彪開復摺

總督主稿

兩廣總督臣鄧廷楨  
水師提督臣關天培跪

奏爲委員督匠賠造炮位現已完竣驗收請

旨賞還頂戴仰祈

聖鑒事竊照前署督臣祁墳會同臣關天培查驗虎門新

修改造各炮臺工程完固惟演放新鑄炮位內有炸

裂當經恭摺劾叅請將辦理不慎之委員推陞遊擊

留署廣州協左營都司黃廷彪革去頂戴責令督匠

賠造

奏奉

上諭祁墳等奏會勘各炮臺工程及查驗炮位情形一摺  
廣東虎門地方修造各炮臺及添鑄炮位各工完竣經  
祁墳等查明新鑄大炮五十九位炸裂至十位之多實  
屬辦理不慎所有監鑄委員推陞遊擊留署廣州協左  
營都司黃廷彪著革去頂戴責令督匠加工提鍊如數  
賠造倘再不能妥善卽著嚴行叅處等因欽此時臣鄧  
廷楨先於去冬蒞任會查得各炮臺新鑄大炮四十  
位又添鑄大炮十九位內先後炸裂十位併造不如

法四位共十四位除業經爐匠賠造八位運臺補行  
安配外尙應賠造大炮六位欽奉前因遵卽飭催委  
員上緊督匠加工提鍊如數賠造去後旋據委員黃  
廷彪等督匠賠造齊全由廣州協副將郭宏升稟請  
驗收前來適臣鄧廷楨因

欽差蒞粵有應行會審案件未克分身前往當卽咨經臣

關天培就近行委署本標中軍叅將李賢會同委員  
將賠造大炮六位逐一演放三出搬運上臺安置併  
于五月初四日親赴威遠鎮遠兩炮臺督同將脩委

員飭將前項炮位照數裝藥下子各放二出炮身均無損裂當經收明竣事臣等伏查現在虎門新舊炮臺八座安設新舊炮位二百三十四尊增兵籌費加意防維海壩實壯聲威島夷足資懾服臣等受

恩深重惟有恪遵

聖訓查照奏定練習守禦章程合力同心行之以實斷不敢日久生懈以期壁壘常堅至該委員黃廷彪前因督鑄未善致炮位多有炸裂今於被叅後勉力督匠加工提鍊將應賠各炮補鑄全完業經運臺演試均

堪合用是該員疎忽于前尙能認真于後合無仰懇  
大恩將該委員黃廷彪革去頂戴之案俯准賞還開復俾  
知益加感奮查該員先于預保案內保

題續奉推陞福建寧鎮左營遊擊經前督臣盧坤  
奏准留粵補用惟預保之案仍應赴部引

見如蒙

俞允恭候

命下之日卽行照例給咨送部合併陳明所有委員督匠  
賠造炮位現已完竣驗收緣由謹合詞恭摺具

奏伏乞

皇上聖鑒訓示謹

奏

道光十六年五月

十七

日會奏

道光十六年七月二十八日奉到

硃批另有旨欽此同日承准

軍機處錄寄道光十六年六月二十日內閣奉

上諭鄧廷楨等奏請將賠造炮位完竣之委員開復頂帶  
一摺署廣東廣州協左營都司推陞福建建寧鎮左營



遊擊黃廷彪前因辦理炮位不慎降旨革去頂帶責令  
如數賠造茲據該督等奏稱該員于被叅後勉力督匠  
加工提鍊將應賠各炮位補鑄全完業經如數運臺演  
試均堪合用黃廷彪着准其開復頂帶所有該員預保  
之案仍着赴部引見該部知道欽此



月給口糧購買薪米曉諭防兵稿

爲明白曉諭事照得本軍門籌議防夷款內以鎮遠威遠橫檔大虎永安鞏固沙角大角炮臺八座爲防夷扼要弁兵不容稍曠每年自六月起至十月初止正各國夷商船隻雲集之期亦護貨夷兵船來泊外洋之候守臺弁兵更不准片刻離臺以期嚴肅而資整備念爾各兵月領餉米不敷分膳經本軍門咨商督部堂議於每年籌給防兵四個月口糧每兵每日銀四分購買柴米按月發給俾各兵合夥煮食以免

分炊悞事其鍋竈等件每臺二分上年已經購辦交  
臺昨准督部院籌款生息會銜奏蒙

俞允業經飭行遵照分月脩文赴司請領在案茲據中軍  
稟稱六月分八臺防兵三百八十名口糧銀四百四  
十兩八錢尙未領回應如數籌墊卽經購買白米一  
百一十四擔松柴二萬二千八百觔照三十日分派  
每兵各給米三斗木柴各六十觔已飭各臺弁兵將  
分到柴米收貯公所按日公同稱量每日輪派兵四  
名經管煮飯以均勞逸計六月分柴米兩項用去銀

兩外餘存銀兩俟下月接算另報等情面稟前來查  
防臺各兵本有月支銀米守臺練藝分所當然今

奏定每年加給四個月口糧購買柴米貯臺公用以銀  
盡爲度此係格外體卹爾眾兵務宜知感知奮勤練  
技能勇敢任事庶不負督部堂本軍門教養兼施之  
意也合行曉諭爲此諭仰防臺眾兵一體遵照毋違  
特示

一出示沙角 大角 鎮遠 威遠 橫檔

大虎 永安 鞏固各炮臺

道光十六年六月 十三日

遴選員弁請陞各缺稿

爲咨商事道光十六年六月十一日准貴部堂咨開  
現准兵部咨大鵬營叅將林開疆海門營叅將鄧旋  
明均經病故碣石鎮中軍遊擊奈清陞任所遺各缺  
均輪用現任應題人員又龍門協右營守備周弼病  
故遺缺輪用改用外海水師人員又新會營右營守  
備姚夢鵬告病遺缺輪用預保無人以上各缺均行  
令照例分別揀選題補等因相應咨商煩爲查照希  
將各缺每缺揀選一二員移覆以憑核奪會疏

題補施行等因到本提督准此爲照前項員缺有管轄  
通營之責督率駕馭訓練操防在在均關緊要必須  
勤能熟諳之員方克勝任茲於現任人員及准改外  
海水師之候補候調守備內詳加揀選查有堪陞前  
項員缺者開列咨送可否分別

題補

奏署聽候銜奪相應咨覆合咨查照核辦示覆施行

計送清摺一扣

一咨 督院



謹將遴選堪陞叅將遊擊守備各項人員開列清摺

咨請銜奪分別

題補

奏摺

廣海寨遊擊一員

曹飛揚

年四十六歲潮州府南澳同知轄屬人由  
行伍道光十五年閏六月十六日到任歷  
獲各案盜犯三十二名道光十三年於護  
理碣石鎮中軍遊擊任內有職員林振瑞  
當店被劫拒傷工人身死一案業經開列  
職名咨部尙未議覆該員勤謹誠實辦事  
小心若以之陞補叅將尙能勝任其承緝  
之案雖係公罪惟未准議覆應請酌核再

前送摺內以該員歷俸未滿尙須察看此時因乏員請陞而該員扣至本年六月十六日歷俸已滿合併聲明

### 澄海協中軍都司一員

李賢

年五十一歲肇慶府陽江縣人由行伍道光九年三月初六日到任道光十一年題陞海安營遊擊委署崖州協副將任內格殺洋盜楊就富案內夥盜多名生擒洋盜十二名擊沉盜船一隻拿獲盜船二隻干道光十三年奏奉

上諭

以應陞之缺陞用道光十五年於題陞遊擊案卸署領咨途次聞訃丁憂退回都司本任該員明白老練勤幹廉能且能耐烟瘴人亦體面若以之越陞參將堪期勝任惟該員尙未服闋於例稍有未符第水師人材難得且現在遊擊內無人選陞可否

援案聲明親喪未滿專摺  
奏請陞署之處恭候鈞裁再武員丁憂  
奏請陞署者有案江南 奏稿錄送

### 香山協左營都司一員

李邦漢

年五十二歲肇慶府陽春縣人由行伍道光十四年十一月初六日到任先後跟隨拿獲洋匪四十名首先生擒盜匪一名因遭風被淹幸獲生存奉准軍功加一級該員人尚誠實水務熟諳若以之陞補遊擊尚能勝任惟前准鈞咨不准預保此時出有遊擊兩缺乏員陞補應請鑒奪

### 大鵬營右營守備一員

吳占

年四十九歲惠州府海豐縣人由武進士道光十一年八月二十三日到任歷獲各

案盜犯三十六名匪艇三隻已預保註冊  
該員緝捕勤能水師去得已經預保應請  
以都司遊擊兼用

香山協右營守備一員

李茂青

年五十五歲肇慶府陽江縣人由行伍道  
光十年四月十八日到任歷獲盜犯五十  
九名奉准給與加一級紀錄二次已預保  
註冊任內有新會縣人陳傳益被搶一案  
派委錯悞奉議降二級留任該員勤慎小  
心辦事穩妥已經預保應請以都司遊擊  
兼用

順德協左營右哨內河水師千總一員

江連元

年五十六歲惠州府歸善縣人由行伍道  
光五年三月十九日接劄歷獲各案賊犯

一百七十二名奉准紀錄二次俸滿留任  
初次三年期滿改爲保送尙未給咨起京  
該弁操防老練于內河緝捕得力堪膺守  
備之選

### 前山營左哨頭司內河水師千總一員

蘇振邦

年四十六歲廣州府東莞縣人由行伍道  
光十五年六月十六日接劄歷獲案犯一

百四十二名本年二月內奉准部咨首先  
拿獲僑境斬梟盜犯周亞連等三名核與

送部引

見之例相符現在行調領咨該弁緝捕勤能人  
亦去得堪膺守備之選惟歷俸未滿二年

### 順德協右營左哨內河水師千總一員

蔣大彪

年三十歲廣州府東莞縣人由行伍道光  
十四年九月初三日接劄歷獲案犯二百

四十二名任內有嫡母喪扣至道光十七年五月二十三日服滿該弁年力富強勤于捕盜人亦精明若以之陞補守備可期得力惟歷俸未滿兼有親喪

南澳鎮標右營承襲雲騎尉候補水師守備二員

謝慶燕

年三十三歲廣東潮州府南澳廳人道光八年八月初六日引

見奉

旨著發回本省以外海水師守備補用該員年力強壯弓馬去得

黃慶元

年四十歲廣東潮州府南澳廳人道光九年八月十一日引

見奉

旨著發回本省以外海水師守備補用該員現署澄海協中軍都司辦事尙勤弓馬未經考驗

肇慶內河水師營中軍守備一員

羅曉風

年四十一歲廣州府順德縣人由武舉道光十五年四月內奉准改用外海水師俟有該省外海水師守備缺出酌量調補該員人材雄壯水師練習

道光十六年六月 十四 日





澄海協都司李賢越陞叅將摺

總督主稿

兩廣總督臣鄧廷楨跪

奏爲外海水師叅將員缺緊要懇

恩俯准陞署以重海疆仰祈

聖鑒事竊照廣東大鵬營叅將林開疆病故遺缺係外海水師題補之缺接准部咨輪用現任應題人員行令照例揀選題補等因臣查大鵬營叅將駐劄新安縣大鵬所城管理伶仃一帶洋面盜艇出没靡常巡緝最關緊要且統轄之大嶼山孤懸海外爲商船夷船

經由寄泊之區防範尤宜嚴密必須熟悉情形幹練  
有爲之員方足以資經理臣與水師提督臣關天培  
在於粵省外海水師遊擊內逐加揀選非有事故違  
礙卽屬人地未宜實無合例堪補之員惟查有澄海  
協中軍都司李賢年五十一歲廣東陽江縣人由行  
伍遞拔于總海陞今職該員先經前督臣李鴻賓具  
疏

題准陞補海安營遊擊旋於委署崖州協副將任內剿  
辦越南夷洋盜匪陳加海楊就富等出力又經前督

臣 盧坤會摺

奏奉

諭旨李賢著以應陞之缺陞用欽此嗣因該員陞補遊擊  
案內尙未引

見適遇丁憂退回都司原任該員才具開展巡緝認真於  
伶仃大嶼一帶洋面巡防扼要情形素所熟悉且曾  
經陞補遊擊因剿辦洋匪出力續又

奏准應以叅將陞用之員以之陞署大鵬營叅將實堪  
勝任惟該員尙未服闋請由退回都司任內越級陞

卷之三十一

三十一

署與例稍有未符但員缺係屬要區水師人材難得  
臣與提臣關天培往返咨商從前如粵省之水師提  
標前營都司余得彪越級陞署肇慶水師營叅將又  
提臣關天培前在江蘇川沙營叅將任內服制未滿  
陞署太湖營水師副將均蒙

特旨允准在案合無仰懇

聖主逾格恩施俯念水師員缺緊要人地實在相需准以  
李賢陞署大鵬營叅將洵於營伍海洋均有裨益如

蒙

俞允仍俟該員服闋及扣滿歷俸年限再請實授給咨送

部引

見恭候

欽定其所遺澄海協中軍都司係外海水師題補之缺俟

部覆開缺時照例辦理臣爲外海要缺得人起見謹

會同水師提督臣關天培恭摺具

奏伏乞

皇上聖鑒訓示謹

奏

道光十六年七月二十七日

道光十六年九月初一日內閣奉

上諭鄧廷楨奏揀員陞署海疆要缺叅將一摺着照所請  
廣東大鵬營叅將准其以李賢陞署仍俟該員服闋扣  
滿年限再請實授照例送部引見該部知道欽此

准咨再議分兵訓練章程稿

爲議覆事道光十六年六月二十七日准咨內開照得本部堂考驗得澄海協左右營來省請領俸餉硝磺各弁兵內該協右營右哨千總李英隆馬步箭中二枝應與僅中一枝之右營戰兵謝鵬飛均限一月回營練習限滿由鎮覆看左營左哨頭司外委把總楊逢陞右營右哨頭司外委把總陳鏞馬步全空均降爲馬兵右營額外姚廷鳳馬步全空降爲步戰兵左營戰兵范兆熊步箭全空應降爲守兵右營戰兵

蔡國光僅中一枝內三枝不到靶已打十棍應降爲  
守兵此次該協來官四員中步箭一枝兵五名中箭  
七枝該管上司所司何事所有署該協中軍都司事  
承襲雲騎尉黃慶元署左營守備事該營右哨千總  
蔡先攀署右營守備事左營左哨千總陳忠平日不  
能督率訓練應各記大過三次以觀後效署澄海協  
副將事候補水師副將譚安聽候另議澄海重地營  
伍廢弛至於如此除咨貴提督設法整頓並示諭遵  
照及札南澳鎮轉飭外委楊逢陞陳鏞刻日離任降



爲馬兵額外姚廷鳳降爲步戰兵取具各離任日期  
報查追出各原領委牌鈴記分別存銷其所遺外委  
額外各缺並卽挑選技藝嫻熟緝捕勤能著有勞績  
合例弁目考驗拔補具報並將戰兵范兆熊蔡國光  
降爲守兵勒令千總李英隆戰兵謝飛鵬勤加練習  
務期弓馬改觀俟一月限滿卽由該鎮考驗稟覆察  
奪一面將黃慶元蔡先攀陳忠各記大過三次註冊  
外咨會查照希將澄海協營弁兵技藝應如何設法  
整頓之處迅卽議覆以憑核奪飭遵等因到本提督

准此查廣東地處海疆武備最關緊要雖水師官兵首重巡防而捕盜擒奸全憑武勇必須兵技精純膽力方能猛壯是操練巡防相關表裏缺一不可惟廣東水師營員不揣其本每以風濤兇險止練操舟遂置訓練爲奉行故事本提督蒞任之初查悉大概情形卽核定分替訓練章程派定經操弁委專管一年以歸責成通行各營咨明四鎮在案奈各營積習相沿始勤終怠言之實堪痛恨茲奉鈞咨以澄海協屬請餉弁兵技疎無準除分別責革限習咨會設法整

頓妥議移覆本提督展閱來咨抱慚無似查署澄海  
協副將譚安年力就衰難期振作業經函商核辦並  
咨請南澳沈鎮破除情面就近實力整頓外第事無  
專責則易於諉卸若界限分清則責無旁貸再四思  
維應請仍照本提督上年正月所定分替操巡章程  
稍加通變飭行各營立定條規卽自本年秋季爲始  
各營派定弁委專管操兵俟來年六月底再行更換  
並將該營額設兵丁除去字識吹手以及舵工斗手  
繚手槌手不入操演外其餘弓箭鳥鎗刀牌各技兵

丁分爲三股以兩股分任巡洋防汛以一股留營專責派定經操之弁認真操練先以三個月爲限三月以後凡呈送考驗兵冊內均令註明經操官某人字樣並飭各營先將留營操演兵數分別枝藝造具清冊卽於冊首註明經操一年弁委銜名造冊通報如三月後所送考驗兵內弓箭準頭以中靶五分爲合式鳥鎗準頭以中靶六成爲合式若屢次箭準均在六成以上鎗準均在七成以上者則將經操官記名遇缺陞擢設箭準屢次不及五分鎗準不及六分卽

照所短分數將經操官降調仍飭行將備隨時考察  
舉優懲劣若將備徇情姑息一經上司察出連將備  
一併叅辦如此則事有專司責無旁貸且照此替換  
操練三年則通營無不練之兵事歸專責則官弁各  
自認真矣所有謬議操練緣由咨覆查照核覆以便  
通飭施行

一咨 督院

道光十六年六月 二十九 日



議添協濟臺兵泗水爬梳等兵口糧稿

爲籌議添給操兵口糧咨請飭司議覆事竊照虎門海口春秋二季演習炮準操練水軍每年所需火藥鐵彈藥袋火繩誌椿布旂及增給八臺防兵口糧燈油賞號等項仰承籌款生息會銜奏蒙

俞允飭行遵照在案查誌椿布旂藥袋火繩及堆貯柴草

隨炮器具八臺三板據報業已辦齊各臺炮罩刻亦解板興工火藥硝磺現已領回製造各項火器亦分投製辦領到口糧已購買柴米分給防兵同鍋煮食

各臺旂燈燈油分給臺弁率兵守望此外應添旂幟  
器械及一切零星均已次第辦理月內總可一律齊  
全茲據中軍叅將余清署右營遊擊楊德雄稟稱竊  
查七營會合水操共配米艇十隻每船派舵水鎗炮  
等兵六十四名十船共計兵六百四十名此項船兵  
均係各營派巡船隻各兵本有月給口糧至八臺防  
兵三百八十名亦蒙大憲體卹兵艱每年增給口糧  
銀一千八百二十四兩均已果腹有資毋庸再議惟  
八臺防兵臨操不敷配用原議至期將存營操兵添



撥五百十八名分臺協濟卑職等遵奉憲札自四月初一日起每逢一五卯期督率千把操練各兵裝藥下子描準各種手法刻已漸就純熟又自五月初起遵照奉發泅水陣操圖號令挑選演習泅水陣式兵六十八名又挑選水中對械兵十二名又選出爬桅兵十六名又練出能鳧深水兵三十四名按期操練此時泅水陣式業已可觀爬桅各兵上下便捷鳧水兵均能於深水中浮潛遊行此項泅水爬桅鳧水兵共一百三十名所需勇字號衣短腿窄襠小褲及漆

製旂幟器械斗手衣褲等項業蒙憲臺發銀造齊賞給各兵配執穿用惟是每年會操二次每次十日刻下八臺防兵三百八十名各營師船水兵六百四十八名均有日給口糧獨是協濟各臺操兵五百一十八名泗水爬梳鳧水兵一百三十名並未議給口糧雖營兵操演是其分內第相形之下未免向隅卑職等不揣冒昧懇乞鴻慈可否咨商督憲一體恩施做照臺兵日給口糧四分每次總以十日爲度計協濟臺兵及泗水爬梳鳧水四項共兵六百四十八名春秋

兩次每次十日共需口糧銀二百五十九兩二錢每  
年共需銀五百一十八兩四錢按兩次由營請領照  
數散給俾各兵不致向隅而憲德汪洋恩膏普被矣  
是否有當伏乞鈞裁等情據此查協濟各臺操兵五  
百一十八名泗水爬梳等兵一百三十名同一操練  
現在配船配臺各兵均有口糧而泗水鳧水爬梳等  
兵衝風破浪浮沉於波浪之中較之船臺各兵倍加  
苦險緣本提督當日漏未議及今據該將等所稟情  
節似應增給以免向隅合亟據情咨請煩爲查照可

否一視同仁俯如所請准賜飭司籌議照防臺各兵  
日給口糧四分每次以十日爲度准予給領之處出  
自鈞裁如荷准行仍希示覆以便轉飭遵照施行

一咨 督院

道光十六年七月初二日

奏增協濟臺兵及泗水各兵口糧摺

總督主稿

兩廣總督臣鄧廷楨  
廣東巡撫臣祁 墳 跪

奏爲酌增協濟臺操及泗水各兵口糧以示體卹恭摺

奏祈

聖鑒事竊照廣東虎門海口炮臺春秋演習炮準調配師

船操練水軍前經

臣

等會同提

臣

關天培

奏明新舊八臺共派防兵三百八十名每年增給口糧

銀一千八百二十四兩臨操兵額不敷在於存城操

兵內添撥五百一十八名分臺協濟在案惟此外尙

有泗水陣對械兵八十名鳧水兵三十四名爬桅兵  
十六名共計一百三十名均應按期操練因原議漏  
未聲叙致與添撥協濟兵丁口糧俱未議及茲准提  
臣關天培咨據提標中軍叅將余清署右營遊擊楊  
德雄稟稱竊查七營會合水操共配米艇十隻每船  
派舵水鎗炮等兵六十四名共計兵六百四十名此  
項船兵均係各營派巡船隻各兵本有增給口糧其  
八臺防兵三百八十名亦蒙體卹兵艱每年增給口  
糧銀兩均已果腹有資毋庸再議至八臺防兵臨操

不敷配用原議屆期將存營操兵添撥五百一十八名分臺協濟叅將等遵奉札飭自四月初一日起每逢一五卯期督率千把操練各兵放炮裝藥下子描準各種手法刻已漸就純熟又自五月初旬起遵照奉發泗水陣圖挑選演習泗水陣式兵六十八名水中對械兵十二名爬桅兵十六名又練出能鳧深水兵三十四名按期操練此時泗水陣式業已可觀爬桅各兵上下便捷鳧水兵均能於深水中浮潛遊行惟是每年會操二次每次十日該協濟臺操及泗水

爬梳皂水各兵並未議給口糧可否倣照臺兵日給口糧銀四分每次計日酌給俾各兵不致向隅等情飭據司道議詳前來臣等伏查本案遞年操練歲需火藥鐵彈及加賞口糧等項共需經費銀六千七百餘兩前經

奏請將查抄逸犯姚九區寬等入官家產估變銀五萬餘兩發典生息歲可得息銀五千餘兩尙不敷銀一千餘兩請在裁撤三路內河巡船十隻遞年節省弁兵口糧銀三千餘兩項下撥給支應欽奉



上諭著照所請准其撥給按年按款樽節動支務必費歸實用以垂永久等因欽此欽遵在案今此項泗水鳧水爬梳等兵衝風破浪浮沉於波濤之中較之船臺各兵倍加苦險而協濟之兵亦與專防臺兵一同演習所有配船配臺各兵既有增給口糧則協濟泗水等兵事同一例合無仰懇

天恩俯將協濟各臺操兵五百一十八名泗水鳧水爬梳兵一百三十名准其於操演之時每兵日給口糧銀四分春秋兩次每次操演十日計需口糧銀二百五

十九兩二錢每年共需銀五百一十八兩四錢卽於前項籌定經費項下按次由營請領照數散給則

惠閭均霑同深奮迅有裨操防可垂久遠矣所有酌增協

濟泗水各兵口糧緣由謹合詞會同水師提督臣關

天培恭摺具

奏伏乞

皇上聖鑒訓示謹

奏

道光十六年八月

日

道光十六年十月二十三日奉到

硃批另有旨欽此同日承准

軍機處錄寄內閣奉

上諭鄧廷楨奏酌增協濟臺操及泗水各兵口糧一摺廣東虎門海口炮臺操演水軍據該督等查明原派防兵俱經增給口糧尙有協濟臺操兵五百十八名泗水鳧水爬桅兵一百三十名應增口糧未經議及該兵丁等與專防臺兵一同演習自應加恩增給口糧以示體卹着照所請所有需用口糧銀五百十八兩零准其於前

項籌定經費項下按次發營照數散給欽此

創設秋操通行曉諭稿

提督水師軍門關 爲核定號令條規預行通飭弁  
兵一體遵奉以期整肅而免違犯事照得虎門海口  
乃全粵咽喉省城屏翰當商漁總匯之衝途爲華夷  
互市之要隘防奸捕匪武備宜嚴是以本軍門於蒞  
任之初卽通行訓練章程挑選精壯士卒增臺造炮  
添械加兵修器具設誌椿操臺兵之炮準儲柴草製  
神器脩水面之火攻卹士卒之艱辛籌給口糧賞號  
除弁兵之攤扣議添藥袋火繩增油燭免守望之疎

虞造三板濟往來之樵採凡有益於海防者莫不盡

心籌備茲當秋操在邇特先曉諭合亟札飭爲此札示

仰該叅將各炮臺弁兵一體遵照立將後開各款逐

件講求務使各炮臺師船弁兵遵守規條靜聽號令

緣春秋二季操練炮準演放火器會合水操以及泗

水爬梳等件係本軍門上年創立章程咨商督撫部堂

核議於本年三月會銜具

奏奉

旨允准茲當初次舉行誠恐向未經歷之弁兵一經違令

法必嚴加惟念爾衆兵荷戈入伍未識整暇若待犯  
而後懲轉失本軍門平素教養之懷爰定號令條規  
預期布告諄飭弁兵互相傳誦務須了然胸中俾知  
軍令無私犯則不宥則令一心齊官兵咸登整肅庶  
不負本軍門愛人執法一片苦心其各凜之慎之毋  
違毋忽特

札諭

計開

號令條規

一協濟炮臺弁兵擇吉八月初六日起身該中軍叅

將先期傳諭各官兵一體聽令是日交四鼓於南  
門城上先放頭炮一聲各兵聞炮卽各自造飯交  
五鼓放二炮各兵飽殮天微明放三炮各兵携帶  
本身器械齊赴較場將脩齊集本軍門差官賞賞  
鹽菜錢文中軍叅將卽陞堂按冊點名分賞各兵  
訖領隊官將大纛五桿安置將臺正面設香案中  
軍叅將行裝祭旗纛仍回演武廳少坐執令官稟  
起鼓將臺上插第一通鼓領隊官率同隊目將大  
纛五杆照序排列將臺上插第二通鼓衆兵認飄



帶各歸隊伍分行站定將臺上播第三通鼓開路  
官執大紅方旗赴大纛前站定巡察官執大紅尖  
旗赴督陣旗後站定掌行營號領隊官均上馬陞  
炮三聲各隊齊起鼓吹前導中軍叅將在第一隊  
巡察旗後督押各兵赴威遠炮臺中營守備督押  
第二隊赴鎮遠炮臺右營遊擊督押第三隊赴橫  
檣炮臺右營守備督押第四隊赴大虎炮臺候補  
守備曾授綸督押第五隊赴永安炮臺候補守備  
萬蔭昌先赴太平汛調派船隻仍隨船赴鞏固炮

臺經理各隊官兵按行伍進朝陽門出迎薰門至  
太平汛挨次紮定將備等下馬詣渡口帳房內陞  
座發號令衆兵聽令下船

一先期調集師船十隻編定號數挨次拋泊太平墟  
河面各船三板齊集渡口俟各隊官兵紮定中軍  
叅將傳諭各兵挨次登舟不許雜亂號炮一聲第  
一隊開路旗帶兵二十四名上第一號三板大纛  
旗帶兵二十四名上第二號三板什長旗五面帶  
兵二十名上第三號三板巡察旗帶兵二十四名

上第四號三板分赴中營第一第二號師船歸隊  
俟該四船開行後號炮二聲第二隊旗幟兵丁如  
前式分赴第五第六第七第八號三板分投左營  
第三第四號師船歸隊俟前項第一起三板回至  
渡口號炮三聲第三隊旗幟兵丁分赴第九第十  
及第一第二號三板開行至右營第五第六號師  
船歸隊仍候第二起三板攏岸號炮四聲第四隊  
旗幟兵丁分上第三第四第五第六號三板分赴  
香山第七第八號師船歸隊號炮五聲第五隊旗

幟兵丁分赴第七第八第九第十號三板赴六鵬  
第九第十號師船歸隊俟五隊兵丁全行登舟將  
脩各歸座船中軍將坐第一號師船發令箭派  
弁赴各船查點兵數齊全稟覆後卽傳令插五色  
旗掌第一號各船陞篷掌第二號各船起樁掌第  
三號中軍船陞炮鳴鑼各船魚貫開行分赴汛地  
拋定督率各兵分起上岸歸臺

一協濟兵五百十八名分坐師船十隻在船之日卽  
與各船水兵同食兩餐本軍門先期派弁將柴米

發交各船押江經管以免枵腹

一將脩六員帶兵分赴威遠鎮遠橫櫓大虎永安鞏固六臺到臺後卽將各炮火彈藥及新製隨炮器具各項火器旗圖及各兵配執軍械衣帽等項逐件點查務須旗幟鮮明刀鎗鋒利炮火整齊官兵肅靜如有短缺殘損卽惟該臺弁是問迨本軍門詣臺親查設有刀鎗鏤暗器具虧短則惟該將脩是問此次初定章程賞罰無私令在必行該官兵幸勿身試

一協濟兵五百十八名分配到臺卽與原防各兵一同炊爨日需柴米本軍門派弁先期運貯各臺交臺弁經管以資果腹而卹兵艱

一協濟兵分配各臺會演炮火雖已在營操熟究與原防各兵日逐在臺練準者不同該將脩應將每炮一尊派原臺兵一名專管描準其裝藥下子攢炮洗炮燃火等項卽派協濟兵梆同配合每炮一尊派定兵四名內原臺兵一名協濟兵三名其正面八千觔六千觔大炮應派原臺兵二名協濟兵

二名一經派定卽不准兼管他炮並於各炮尾後掛一小腰牌正面書列炮位號數配藥子若干背面分寫四兵名姓以專責成而憑賞罰切切毋忽

一此次秋操會演各臺大炮紮就靶船隨潮闖駛以練炮準各兵預將藥彈羣子烘藥裝好靶船行近炮臺描準兵卽預先描準燃火兵執火龍杆在左催火兵執皮巴掌在右看定火門不許他視一經對準描準兵卽撲手一下不准言語燃火兵卽用火龍杆燃火催火兵用皮巴掌向火門一撲如炮

子中靶司令官卽押旗記圈號手兵鳴鑼三下描  
準兵將炮尾所掛腰牌取下懸于胸前以備該四  
兵一同領賞如子不中靶者不得妄取腰牌敢有  
捏稱中靶者查明貫耳

一各臺演試炮準必候長潮水勢溜急則船行迅速  
一炮之後靶船已過炮口無庸再裝藥彈然靶船  
尙不能駛過炮臺該一號炮兵四名且不必洗炮  
攆炮預將大火箭及溜筒火香安放垛口俟炮子  
放出描準兵卽將溜筒火箭配好候靶船一對棗



口卽燃火對篷施放第二炮兵丁四名于放炮後  
改用五虎箭在第二垛口內對篷施放第三號炮  
兵燃炮後用噴筒在第三垛口內對篷施放第四  
號炮兵用羣虎箭在第四垛口對篷施放以次各  
炮炮兵均於放炮後卽改放一項火器並諄飭各  
兵必候靶船直對垛口方可燃火不得早放緣火  
器之力不如炮子之能致遠也切記毋違

一 條兵船火船于上流不礙炮子處拋泊如靶船未  
過鎮遠已被大炮轟沉或被火器焚毀則不必起

梃不必燃火設使靶船未沉未焚闖過鎮遠火船  
卽起梃直向靶船飛駛發火後火兵卽鳧水登岸  
師船迎頭轟擊務將靶船焚沉爲止

一南山鎮遠橫檔三處各派弁一員字識一名號手  
一名于試炮之先分立于各炮臺後山頂高處專  
記炮準該外委手執大紅尖旗字識手捧炮冊號  
手執大鑼一面比如鎮遠炮臺第一炮中靶該外  
委卽將所執紅旗一押號手鳴鑼三聲字識卽用  
墨筆於冊內第一號炮上註一圓圈如炮子並未

中靶卽不必押旗鳴鑼註圈以下各炮同其南山  
橫檔各臺山頂均派外委字識號手與鎮遠同

一閱操之日各臺官兵預先整脩齊全俟本軍門會  
同督部堂船詣橫檔各官行裝勒撒袋帶領弁兵  
各在各臺跪接俟船抵馬頭泊定仍候潮水長至  
三分以上右營遊擊差弁稟請登臺閱操本軍門  
與督部堂同詣橫檔大臺至操臺陞座定大鵬營  
叅將呈送八臺官弁兵冊

每臺一本

右營遊擊跪

稟請令演炮巡捕官稟發令該遊擊執令旗至月

臺正中梁口上展旗三次詣望樓邊執令站定威  
遠臺弁接展令旗三次沙角臺弁見兩臺令旗揮  
動卽放信炮一聲大角炮臺接放信炮一聲威遠  
炮臺接放信炮一聲以次鎮遠橫櫓永安鞏固而  
至大虎均各接放信炮一聲俟八臺信炮放畢沙  
角大角兩臺大炮每炮下子各放一出不必過快  
亦不必太慢總以數快字一百個卽放一炮

一威遠炮臺以南預將靶船安泊中泓夾以快蟹船  
二隻靜候沙角大角大炮二十一聲之後快蟹船

上放炮一聲卽離開靶船向東南戢駛遠閉炮火  
以便靶船向內闖駛各臺炮兵卽描準挨次轟擊  
每一炮放出後該炮兵卽改放火器一件諄囑各  
兵炮口務對靶船舢邊不可過低施放火器描頭  
務向蓆篷中上切記切記

一靶船行近飯籬排三臺大炮卽連環轟擊火器接  
連施放俟靶船上火發各臺炮聲火器齊止執令  
官執旗至月臺中間向上跪稟云稟大人各臺大  
炮轟沉靶船稟畢執令傍立

一鳧水兵四十名預伏於大米艇上用大三板四隻  
排列大船左右俟靶船被焚後該鳧水兵分赴三  
板每船十名由中泓向北飛掉俟操臺上將次瞭  
見執令官至月臺中間跪報云請大人閱水兵鳧  
水稟畢傍立俟水兵船將近飯籬排橫檔月臺放  
炮一聲兩船水兵吶喊逐對跳入中流或浮或潛  
隨潮赴岸俟過橫檔月臺執令官稟云稟大人操  
演畢繳令

一七營師船會合操首重舵兵繚手推舵靈便則

曲折自由篷脚緊鬆則遲速任意秤風力之重輕  
定篷頭之高下看潮流之順逆別舵杆之正偏司  
令者立於艏樓高處照顧後船司炮火者分別排  
炮連環疾徐自合衆兵除吶喊之外不許高聲火  
藥必加苦蓋以免遺延此水操之總論餘載圖說  
篇中

一爬桅兵原因瞭遠而設舊制頭大桅頂向懸望斗  
爬桅兵夜間登高瞭望防賊暗算例帶鏢鎗此古  
制也此次搽練爬桅崑爲演習手脚第一以捷速

爲主不准遲鈍卽施放火器弓箭亦須隨手施放  
放畢卽由橫繩而下切速毋違

一泗水陣各兵專以跣水高者爲最水過於乳則不  
及矣凡演陣務宜肅靜吶喊必要高聲走隊須合  
圖形排列更當齊捷在對械鳴鎗本倍難於陸地  
而衝波躍浪庶無愧乎水軍總之年力剛強則吞  
吐無妨於巨浪氣血壯盛則呼吸能伏乎洪濤是  
在該將脩之留心選擇也

右列演習炮準操練水軍大概規條該將脩弁兵各



照本身專司執事悉心記誦臨時耳聽號令目視  
旌旗心定神寧毋忘毋忘

軍政曰言不相聞故爲之金鼓視不相見故爲之旌  
旗夫金鼓旌旗所以一人之耳目也故兵法曰無  
恃其不來恃吾有以待之今虎門海口春秋操練  
炮準水軍此誠籌海之良規禦夷之上策孫子曰  
百戰百勝非善之善者也不戰而屈人之兵善之  
善者也夫戰必勝攻必克使之不敢抗衡者由於  
賞罰明進退肅威令整也是令也者乃主將受

命

之權衡實三軍生死之關係也今當初次齊集合操會閱期屆合將軍令應禁各條分別頒示其各凜遵毋違

凡各兵逢操遇事一經該管上司傳喚卽如期前往教場或公所候操聽令不可遲悞如上司已經點名該兵尙未到場者此謂慢軍一次薄責二次重責三次不到者法當革伍

凡兵丁入伍各有本身技藝如果勤習何患不精若屢次生疎者此謂惰軍教而不改徒費錢糧法應

責革

凡兵丁把執器械均應修飭整齊如鎗刀銹缺箭羽凋殘火藥潮濕等類以致臨場不能得用者此謂懈軍法應細打

凡擺列隊伍或操陣式或演九進排鎗等項各兵照派定次序進退曲折不得絲毫雜亂若任意攙前越後混亂行伍者此謂亂軍一經干犯法當貫耳示衆

凡在臺炮兵師船水兵及協濟各兵每逢操練一經

發令各歸汧地卽啣枚肅靜不得擅離寸步如遺忘什物出位奪取或大聲招呼者此謂輕軍一有干犯法當貫耳

凡兵丁毋論派管何項執事經該管各官或而飭其非或令其加意經理該兵均應聽命而行敢有不遵約束出言頂撞者此謂橫軍法當貫耳責革

凡軍裝火藥等項必須派兵經管慎司出納敢有遺失及盜賣等弊此謂盜軍一經查出於法當誅卽先貫耳重責仍交有司照例治罪如該管官知情

不舉者罪加本兵一等不知情者革職究明治罪  
凡炮臺師船及較場一應公所係衆兵聚集之處均  
應謹守營規敢有私自飲酒藉端滋事者此謂狂  
軍法應細押俟酒醒貫耳責革仍交有司枷示

凡在伍兵丁差操俱應輪流俾均勻勞逸不得偏累  
如各兵中有藉父兄聲勢親戚官階欺凌同伍藐  
視本官以及面是背非陽奉陰違者此謂驕軍一  
有於此法當責革

凡遇緊要公事傳聞不確必須派人密探飛稟以資

防範該探事兵如探報不實捏詞稟覆或以無作  
有以實爲虛致悞機宜者此謂欺軍如係軍務重  
情於法當斬卽非軍情亦應貫耳枷示

凡春秋二季操演炮準每季下子試靶三出如三次  
全不中靶是描準炮兵心神不定以致遠近高低  
毫無把握此等炮兵非魯拙不堪卽心志昏聩此  
謂廢軍法當責革

凡會合水操各船進退轉折全仗舵兵繚手視風水  
之順逆定船行之疾徐方合準繩如操演三次該

船行駛不能畫一者此謂鈍軍法應嚴懲舵兵繚手

以上禁令十二條既簡且明吏士均當熟記軍法無私各宜凜慎

一札中軍叅將 左營遊擊 右營遊擊


一示各臺船弁兵

道光十六年七月二十四日







秋濤浴鐵圖














--	--	--	--

4  
1



師船水操號令說

七營師船十隻以八隻分左右兩股逐對拋泊  
總領一船在八船之前督陣一船在八船之後  
居中拋定總領船鼓吹迎接 憲駕至操臺陞  
座中軍叅將呈送操圖請令宣令官接令跪稟  
發令水操陞炮三聲令旗一展各船官兵肅靜  
聽令

第一陣萬派朝宗

總領船揮五色旗掌平號放炮一聲各船齊起

大篷掌平號放炮三聲各船起棹掌潮水號總  
領船開行左右股逐對魚貫前進督陣船押尾  
隨行總領船揮紅旗掌天鵞號號炮一聲各船  
炮火齊放衆兵助威吶喊一疊再揮紅旗掌天  
鵞號號炮一聲各船又齊放鎗炮衆兵助威吶  
喊一疊再揮紅旗掌號陞炮一聲各船再齊放  
鎗炮助威吶喊一疊總領船號炮一聲掌平號  
揮藍旗各船轉舵變成雙鳳穿花陣  
第二陣雙鳳穿花

總領船揮紅旗號炮一聲掌催尖號左右股各  
船對面衝攻衆兵助威吶喊各船齊放斗頭腰  
邊尾送鎗炮聯環攻打候總領船押紅旗鎗炮  
吶喊齊止總領船揮黃旗號炮一聲變成一統  
昇平陣

第三陣一統昇平

總領船揮紅旗掌號陞炮一聲各船齊放鎗炮  
助威吶喊一疊又揮紅旗掌號陞炮一聲各船  
再齊放鎗炮助威吶喊一疊又揮紅旗掌號陞

炮一聲各船又齊放鎗炮助威吶喊一疊總領  
船押紅旗鎗炮吶喊齊止

第四陣海洋靜肅

總領船陞炮三聲吹得勝令揮五方旗總領船  
中央拋定各船照安營式分股下旋依序安泊  
鼓吹繳令

中流擊楫圖

水捺拋船式






萬派朝宗式











會州不集  
一統昇平式



舟



海洋靜肅收隊式









水軍泅水陣號令說

先將水軍二隊分船隱伏聽候 大人駕臨各  
船官兵跪接號令船奏樂連陞三炮候陞座畢  
樂止中軍官跪呈操圖請令官稟請發令奏樂  
陞炮三聲樂止掌平號一聲尖號一聲五色旗  
一招信炮一聲騎兵下水上馬又掌平號二聲  
尖號一聲五色旗一招信炮一聲二層水兵下  
水又掌平號三聲尖號一聲五色旗一招信炮  
一聲三層水兵下水掌行隊號點鼓水兵分兩

翼向前執令官舉黃旗吹海螺兩隊水兵雁行  
分列舉藍白旗佈成龍游陣

第一龍游陣

號令船掌平尖號一聲藍旗一招信炮一聲吹  
海螺擂鼓兩隊水兵交鋒對壘衆兵吶喊助威  
俟左股大旗與右股紅旗相對鳴金一聲喊止  
敲金邊水馬兵冲出排列第一層刀牌兵排列  
第二層雜技兵排列第三層變成三才陣

第二三才陣

號令船掌平號三聲尖號一聲執令官揮紅旗  
信炮一聲水馬兵放牌鎗一次再掌平號三聲  
尖號一聲紅旗一招信炮一聲水馬兵又放排  
鎗一次再掌平號三聲尖號一聲紅旗一招信  
炮一聲水馬兵又放排鎗一次揮藍旗變成偃  
月陣

### 第三偃月陣

執令官舉藍旗點鼓牌刀手演武伍步搗鼓牌  
兵水面滾伏雜技各兵冲出又點鼓演武伍步

鳴金壹聲舞止皂旗一招敲鼓邊匪船冲陣揮  
五方旗變成一氣渾元陣

第四一氣渾元陣

號令船插鼓水馬兵分佈外層雜技兵圍裏第  
二層刀牌兵環繞第三層圍住匪船掌天鷲號  
揮紅旗信炮一聲插緊鼓各兵八面衝攻鎗炮  
齊發擒獲匪船鳴金三聲鎗械齊止五色旗一  
招信炮三聲奏得勝令變成四夷拱服陣


第五四夷拱服陣

各水兵分四層排列奏凱回營赴座船報捷歸  
隊上船



伏波洗甲圖


水兵聽探式








龍遊陣式






三才陣式










一氣渾元陣式









四夷拱服式











奏報虎門秋操會銜摺稿

兩廣總督 臣 鄧廷楨跪

奏爲履勘海口炮臺形勢演試炮準併會閱虎門秋操  
情形恭摺

奏祈

聖鑒事竊 臣 於本年八月十八日起程出省查閱廣東西  
路營伍並先赴中路虎門海口查驗炮臺閱看秋操  
業經

奏報在案茲 臣 由水路於八月十九日辰刻馳抵虎門

當會同提

臣

關天培親赴沙角大角橫檔鎮遠大虎

五處原設炮臺並上年添建之威遠永安鞏固三處  
新臺勘得沙角大角炮臺二座內原安炮共二十二  
位該二臺東西遙對外臨大海內通省河爲商夷出  
入衝途係中路第一層門戶建臺設守本極得宜惟  
因口門寬至一千三百餘丈炮火力有不及是以改  
爲瞭望號令炮臺復移舟至威遠鎮遠橫檔三臺內  
橫檔一臺安炮四十位四面環水阻截於西威遠鎮  
遠二臺各安炮四十位佈列於東形如品字中流海



道寬止三百八十餘丈炮火緊湊形勢天成實爲外  
海咽喉內洋第二層關鍵至新造永安炮臺建於橫  
檔山後安炮四十位與斜對之蘆灣山脚鞏固新臺  
東西斜峙鞏固臺座較小僅安炮二十位查悉民夷  
商船向由橫檔山前行駛緣山後海道寬深建此兩  
臺防其繞越亦屬周密橫檔之北相離五里卽是大  
虎炮臺爲海口第三層門戶該臺安炮三十二位對  
面離臺九十八丈之外水底有暗沙一道沙面現安  
梅花椿七處椿之四圍加拋石塊擁護椿根夷船趨

避椿石必須靠近炮臺行駛炮火較爲得力臣復登

山周覽形勢層層控制均臻妥協查驗各臺弁兵並

無老弱軍火器械整肅齊全足資防禦臣隨與提臣

較閱各臺炮準先經備用小船一隻船內實以蘆葦

船之兩旁紮就蓆牆中豎桅木三根懸掛蓆帆以作

炮靶其高寬丈尺僅及夷船十分之一於潮長五分

時放入中流船隨潮進風逐帆行一近口門沙角大

角兩臺先放號炮知會各臺准備俟靶船行近威遠

鎮遠橫檔海面各臺大炮連環轟擊各項火器對準

施放火箭炮子紛紛中靶船卽登時燃燒聲威極其  
雄壯迨靶船方過橫檔業已焚燬將盡又閱大虎及  
永安鞏固三臺演練炮準中靶分數大畧相同並閱  
驗鳧水及對械兵四十六名均能於十丈以外深水  
急溜之中浮潛上下兼用短械於水中對仗其泗水  
陣式係選水兵六十八名於海口中央下水分兩翼  
蹈水而進如陸地走陣形勢由兩翼分列三才變爲  
偃月鳴鎗對械變成天圓旋即分布四層作爲四夷  
拱服陣式然後收隊歸船而止又提標中左右及香

山大鵬各左右七營共配大號船十隻排列海口練習駛風調箴進退轉折頗覺靈便炮火亦極聯絡其各船斗手兵丁爬桅均能站立桅杪施放火器鎗箭等技雖未能中的然膽壯氣雄允合水師之用臣於閱畢炮準水軍後並閱視各臺兵丁合演九子三疊鎗陣號令進止均尙嚴整合度當將

奏定秋操賞號銀五百兩分賞八臺十船及泗水鳧水爬桅各項弁兵外臣復分別優劣加賞各官弁兵丁衣料銀牌制錢以示激勸惟是兵技貴精勤操則熟

此時虎門海口臣已親歷秋操各炮臺憑海依山星羅碁佈均經目觀其控制扼要及現在聲威已足懾服羣夷克稱天險臣仍與提督臣面飭水師將備務須從此講習不懈精益求精永期有備無患以冀仰副聖主綏靖海疆至意除前赴肇慶查閱臣標及肇慶協各營官兵並西路陽江高州等鎮協營伍另行奏

聞外所有履勘海口炮臺演試炮準會閱虎門秋操緣由謹會同廣東水師提督臣關天培恭摺具

奏伏乞

皇上聖鑒訓示謹

奏

道光十六年九月 十八 日

再粵東虎門海口添建永安鞏固二炮臺安配新鑄  
四五千觔大炮十位又舊鑄一二三四千觔大炮五  
十位先經前署督臣祁墳將勘驗演試情形列單奏  
聞在案嗣因該二臺安配舊炮內有三千觔炮六位演放  
均不得力省局舊存炮內又無堪以選用之炮自應  
另爲鑄造又蕉門炮臺原配炮位過小不能及遠亦

應添鑄三千觔大炮三位以資防禦臣當卽札司確  
估籌項委員監鑄去後茲據布政使阿勒清阿詳稱  
准監鑄委員署增城營叅將洪發科署撫標右營遊  
擊黃廷彪將添鑄三千觔大炮九位共估需工料銀  
一千六百二十兩移請照數給領興鑄查前次修建  
各炮臺及添鑄大炮所需經費經前任總督盧坤

奏明由洋商捐辦仍飭先於司庫雜款陸續動支給領  
辦理在案此次添鑄三千觔大炮九位共需工料銀  
兩事同一例急需支用應請亦在於司庫雜款項內

墊支統俟洋商原認捐銀兩按限捐繳歸款彙案造報以免動項隨將前項工料銀一千六百二十兩在於雜款項內墊支給發監鑄委員督飭匠人於本年六月初五日興工至七月三十日鑄造完竣運赴永安鞏固蕉門各炮臺分別安置試演堅固完好等情詳請具

奏前來臣覆查無異所有墊支工費添鑄炮位安配緣由謹會同廣東巡撫臣祁墳廣東水師提督臣闕天培合詞附片具



奏伏乞

聖鑒謹

奏

道光十六年十一月二十六日奉到

硃批操演準備均屬妥協但日久萬不可廢弛也勉益加  
勉欽此

片奏添鑄炮位摺同日奉到

硃批好欽此



附祭八臺大砲文

維

大清道光十有七年歲在丁酉廣東水師提督關天培謹  
昭告於

天祐助威大將軍之神曰惟神性秉堅剛聲同霹靂振  
軍威無堅不破佐元勳有敵皆摧溯創造宏模雖起  
自軒轅上古受

勅封

盛典實始於

卷之二

五

聖主天聰顯烈，彌彰英名，聿著茲復，登我疆圉，固我扼要。  
 大震雷霆，遠銷烽燧，威宣銅柱，鼓角無聞，永鎮金湯。  
 含沙絕影，壯橫雲於虎渚，四境平安，擋逆浪於龍潭。  
 八蠻拱服，今屆仲春，演試吉期，虔以清酒香花，上獻  
 伏願

陰垂細柳將士蒙

麻更冀掃蕩么魔海疆永奠尙饗